

## **ASO LUA, 22 SETEMA 2020**

*Na nofoia le Nofoa e le Fofoga Fetalai i le itula e 9:15 i le taeao e tusa ai ma Polokalame o Fonotaga a le Palemene 2020/2021.*

Tatalo.

**FOFOGA FETALAI:** Ou te faasilasila atu ua toe amatalia nei Taulumaga ma Galuega a le Fono Aoaofaitulafono.

O le a taoto ia faamaene o tai loloto le paia maualuga o Samoa i le amata mai i Malaetele seia paia Fili ma Puletuu na tauilo ai manu o Malo aua o Samoa o le atunuu tofi, o le i'a iviivia e le gafataulimaina i sa matou tala i lenei taeao. Ae ua ou manatu o le avanoa leni ou te faatalofa atu ai ma le agaga faaaloalo i le paia maualuga o le Palemene i lana Fonousu, i le afio o lau Afioga i le Palemia ma le Kapeneta, ae faapea foi le paia maualuga i Minisita Lagolago. Liliu mai i lea itu o le Maota i le afio o Taitaifono o Komiti a le Palemene, ae faapea foi sui usufono mamalu o tupu ma ee ua faapena ona faia mai le fuifui tatou te sailia manu o Malo e ala i le Fono a le Palemene.

Ou te faatalofa atu foi i le paia maualuga i Ofisa Sili o Pulega o Matagaluega ma Faalapotopotoga a le Malo. Afea foi leni avanoa ou te faatalofa atu ai i le paia maualuga o Samoa ua faapena ona potopoto mai i lenei taeao, aemaise o le itumalo o Gagaifomauga Nu.3, latou te molimauina le faatautoina o le latou sui usufono. Malo faafetai i leni taeao. E faafoi le viiga i le Atua ona o Lona alofa ma Lona agalelei ua mafai ai ona tatou maua Lona filemu ma lona matagofie.

## **TUSI FAAMAONIA O LE FILIFILIA**

**TUSA AI** ma aiaiga o le Fuaiupu 84 (2) o le Tulafono o Faiga Palota 2019, o **A'U, TUIMALEALI'IFANO VA'ALETOA SUALAUVI II**, Ao o le Malo, ua tu'uina atu ai nei le Tusi Faamaonia o le filifilia o lē ua taua le Suafa i nei ua filifilia e avea ma Sui Usufono o le Palemene o le Malo Tutoatasi o Samoa:

## **LAAULI POLATAIVAO Leuatea**

TU'UINA ATU i lou nei lima i Vaialele i lenei aso, 31 o Aokuso 2020.

Sainia: Tuimaleali'ifano Va'aletoa Sualauvi II  
**AO O LE MALO.**

### **FAATAUTOINA O LE SUI USUFONO MO GAGAIFOMAUGA NU.3**

**FOFOGA FETALAI:** Ae le i afio mai le sui usufono o le Palemene i luma o le laulau mo le tautoga, ou te valaau atu ina ia tulai i luga lau Afioga a o ou faitauina Tulafono Laiti o Amioga Taualoa Faa-Palemene,

### **TULAFONO LAITITI O AMIO TAUALOA FAA-PALEMENE**

#### **FAAMATALAGA O FAAMOEMOEGA**

O le matafaioi patino a Sui Usufono uma o le Palemene o le tausisia lea o tulaga aupito i sili ona maualuga o uiga taualoa, e puipuia ma faatumauina ai le mamalu o le Palemene ma faia ai taumafaiga uma e faatumauina ai aiaiga autu o le Faavae.

O aiaiga autu ua taua ua faamoemoe e tuuina ai ni taiala i, ma ni tulaga i Sui Usufono taitasi o le Palemene, e tatau ona faatino ai o latou tiute ma matafaioi i se tulaga toatasi po o i le aotelega.

#### **O AIAIGA AUTU**

(1) **Faamaoni i le atunuu ma ona tagata**

O Sui Usufono uma e tatau ona tausisia mataupu o le Tautoga o le Loto Faamaoni i taimi uma ma tausia le mamalu ma le aloaia o le Malo Tutoatasi o Samoa, ana faalapotopotoga ma ona tagata.

(2) **Faaaloalo i Tulafono**

E tatau i Sui Usufono uma ona tausisia tulafono o Samoa ma puipuia aiaiga autu o lo o i totonu o le Faavae.

(3) **Faaaloalo i Tagata uma**

E tatau i Sui Usufono uma ona faaaloalo i isi Sui Usufono, tagata lautele ma ofisa mautofi o le Malo faapea foi ma le galue i tulaga mamalu, faamaoni, le lē faaituau aemaise le amiotonu i taimi uma.

(4) Faatinoga Lelei o Pule

E tatau i Sui Usufono uma ona:

- (a) Faatulaga a latou mataupu totino;
- (b) Faaaoga so o se faamatalaga ma faamatalaga uma na maua mai i o latou tofi faale-malo; ma
- (c) Faatinoina o so o se malosi po o se pule na maua i o latou tofi faale-malo,

Mo na o le lelei o tagata lautele ma pe afai e tulai mai o so o se tulaga talafeagai ma se tulaga moni e feteenai ai aia, pe i tulaga tau tupe a le Sui Usufono lava ia, tupe faaletulafono po o se aia a le Sui usufono e tatau ona manaomia e faasilasilaina atu ma le faia o so o se laasaga e aveese ai sea feteenaiga po o le le auai atu i lena feutagaiga tau pisinisi.

**Manaoga Faapitoa mo Minisita ma isi Tagata o lo o Umia Tofi Faale-Malo**

O Sui Usufono uma o lo o umia tofi faa-Palemene o so o se ituaiga ua manaomia e usitaia aiaiga autu e pei ona faamatalaina i luga ma e le tatau, i lalo o so o se tulaga ona faia o so o se faaiuga po o le tuuina atu o se malosi o so o se ituaiga, po o le a lava, e tusa ai i se mataupu o le a maua ai e le Sui usufono so o se faaopoopoga i ana meatotino po o se faamanuiaga.

**FAASALAGA**

O le solia o lenei tulafono laitiiti o le a ono tagofia e le Komiti o Tulaga Aloaia ma Amio Tualoa po o e pei ona o le a fuafuaina e le Palemene.

**FOFOGAFETALAI:** Mo le faatinoina o le Tautoga, ou te valaau atu i le Sui Usufono mo Gagaifomauga Nu.3 ina ia afio mai i le Laulau mo le faatinoina o lana Tautoga. Lau Afioga i le sui usufono mamalu, ia faitau le Tautoga ma ta'u lou suafa.

**TAUTOGA O LE LOTO FAAMAONI**

**“O AU O ..... OU TE TAUTO I LE ATUA E ONA LE MALOSI UMA LAVA, O LE A OU FAAMAONI MA TAUAVEINA TONU LE LOTONU FAAMAONI I LE MALO TUTOATASI O SAMOA, MA O LE A OU FAATAUNUINA MA LE TATAU AI MA LE FAAMAONI OU TIUTE E AVEA AI O SE SUI USUFONO O LE PALEMENE O SAMOA. IA FESOASOANI MAI LE ATUA IA TE AU.”**

**FOFOGA FETALAI:** Ae le i sainia le Tautoga o le Loto Faamaoni, ou te tapa lau Afioga ona o lea ua faatino lou suafa ma ua e taua o le Laaulialemalietoa, ae o Laauli Polataivao Leuatea lea e pei ona filifilia ai ma tuuina mai ai le Tusi Faamaonia o lou Filifilia e le O Le Ao o le Malo. Ma o eseese ia o lea sa feteenai ai lagona talu ai, ma e i le sailia o le amiotonu, e le mafai ona faaauau lau Tautoga, ma e le mafai ona ou talia oe e avea o se sui usufono o le Palemene, pe afai e te le tautino mai lou suafa sao. Aua e mafai ona ono molia oe i le tulaga ua e faatinoa lau Tautoga i se auala le faamaoni.

## **TAUTOGA O LE LOTO FAAMAONI**

**“O AU O ..... OU TE TAUTO I LE ATUA E ONA LE MALOSI UMA LAVA, O LE A OU FAAMAONI MA TAUAVEINA TONU LE LOTONU FAAMAONI I LE MALO TUTOATASI O SAMOA, MA O LE A OU FAATAUNUUNA MA LE TATAU AI MA LE FAAMAONI OU TIUTE E AVEA AI O SE SUI USUFONO O LE PALEMENE O SAMOA. IA FESOASOANI MA LE ATUA IA TE AU.”**

**FOFOGA FETALAI:** Malo faafetai. Ina ia tusa ai ma Tulafono, ia leaga o Tulafono o Amio Taualoa ma le Faamaoni e tatau ona faamaoni. Ia, ua maea, tautuana ma lau Afioga.

Ma lou faaaloalo, ou te tapa lau Afioga i le Palemia mo lau Saunoaga Faa-Minisita e amata ai le tatou Galuega i leni taeao.

### **SAUNOAGA FAA-MINISITA A LE AFIGOA I LE PALEMIA Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui**

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia):** Lau Afioga i le Fofoga Fetalai ou te tulai atu ma le agaga fiafia i leni taeao e momoli atu le faamalo i lau Afioga i le faafoeina o le tatou Fonotaga, aemaise le tatalo molia i lo tatou Matai Sili aua ana faamanuiaga i le Maota nei.

E faatalofa atu foi i le mamalu maualuga o sui usufono o le Fono Aoao Faitulafono a le Malo Tutoatasi o Samoa. E auala atu foi i le taeao leni le faamalo i lau Afioga i le sui usufono mo Gagaifomauga Nu.3, lau Susuga Laauli Polataivao Leuatea, o lou suafa lea ua tatou faalogologo uma i ai i le taeao leni o le a faalupe ai lau Afioga i totonu o le Maota leni.

E faatalofa foi i le faafogafoga mai a Samoa i ona tulaga faalupe i le paia O le Ao Mamalu o le tatou Malo, Sui Tofia faapea foi Faamasino o le Faamasinoga, tainane le tapuaiga i le paia o Aiga ma latou Tama faapea foi le Usoga a Tumua ma Puleono i Salafai.

Ae faaiu lava mea uma, e matua lava le tuu i le faafetai i le tapuaiga a ositaulaga, o le aufai tatalo o lo o latou faanonomanu mo le manuia o le Palemene lenei ma Samoa.

E faapea foi ona oooo se upu faafetai ma le faamalo i o tatou uso a Malo le afioga i le Kovana ma le Faigamalo i Amerika Samoa i le Faamasino Sili faapea foi Maota Faitulafono e lua, le Maota Maualuga i le Senate ma le Maota o Sui, le Fofoga Fetalai faapea foi le Peresetene. O paia faalupe lava ia aua le Faleagafulu ma le nofo a Maopu, le tapuaiga i Faatuiolemotu, Tootoo o le Faleula ma upu i le Manuatele. O paia atoa ia o Samoa na lua o lo o faafogafoga mai i le taeao lenei i le usuina o le Fonousu a Samoa i le malae i Tiafau. O se taeao taua tele lenei, o se Fonousu na valaau faapitoa e le masani ai, ona e taua mataupu o lo o feagai ma le Fonotaga lenei aua le tatou alofaiva i le Faiga Palota o lo o loma nei.

E faapitoa lau faamalo i lau Afioga i le Fofoga Fetalai i le toe faatepa o le Maota lenei i Tulafono a le tatou Maota nei e limataitaiina ai sui usufono uma, o Faauluuluga poo tootoo ia o itumalo o Samoa ua latou tauaveina le mamalu o alii ma faipule o afioaga uma lava i Samoa, lea ua tatou faafogafoga i le toe tolaulauina o Tulafono tatou te soifua ai i totonu o le Maota lenei ma fafo atu o le Maota. E le faapea e uma ai i totonu o le Maota lenei, ae faapena foi ona tatou tauave o tatou mamalu, o tatou o Taitai na filifilia e o tatou itumalo i luga o le musumusuga lilo a le Agaga Paia, ua mafua ai ona tatou nofoia nofoa nei, tatou te fai sao i le faatinoina o tonu fai. O le ala lea e taua ai tele le taeao lenei.

Ou te momoli ai le faamalo i lau Afioga Laauli i lou toe tofia mai, ua filifilia lau Afioga e lou itumalo i se faiga palota laitiiti na faia, e afua i luga o tatou Tulafono na pasia i totonu o le Maota lenei ina ia aloaia ai le finagalo faaalua o tatou itumalo na mafua ai ona tofia i tatou tatou te omai e soalaupule mataupu e taua mo le manuia auiluma o Samoa i luga o tatou folafolaga, o le a ou alu i le Pati lea ou te auai. Ma o le taimi lava e te see ese ai ma le Vaega Faaupufai, e tataua ona e toe foi i lou itumalo e te toe fesili ina ia aumai se latou faamanuiaga, ua sui le alavaa lea o le a e alu ai. E faigofie ona malamalama. O le mea lena e igoa o le amiotonu lea sa saunoa i ai le Fofoga Fetalai. Ma o le Tulafono lena, lea e i tua atu o le agaga lea, ina ia a? Ina ia maua se Malo ma se atunuu e toafilemu, ia ola fealofani i lalo o le Tulafono. Aua afai e toa 30 sui usufono latou te faia le mea lea o le tuua o se Vaega Faaupufai na folafola ai i lona itumalo o le a tiu ai i totonu o le Maota lenei, e ono oo le atunuu lenei i le 30 fesuiaiga o Malo i totonu o se Nofoaiga e 5 tausaga. E le o se mea lelei lea i le vaai mai a Malo i fafo, le vaai mai a latou

i fafo, e fetauai, e fevesiai. A o Afioga manino a lo tatou Alii, “E leai se Malo e tumau le fealofani pe a fevaevaeai.”

Lau Afioga i le Fofoga Fetalai, o le taua lena o lou faamanatu, ma le taua foi lena o Fonotaga faapenei e faatauto ai se sui i totonu o le Maota lenei e toe faamanatu mai ai ia i tatou uma le agaga o le Tulafono e pasia i totonu o le Maota lenei. E le pasia se Tulafono ina ia fai ai ni tifaga a se Vaega Faaupufai ina ia malo pea malo pea. Aisea? Aua e leai se Vaega Faaupufai e faavavau, e leai se Vaega Faaupufai e faavavau, e tumalo, aua o le Atua na te pulea Malo, na te tofia foi i tatou ma musumusuina e tulai mai vaega e tumalo ma toe mavae atu ae tumau pea le Malo. O le ala lena e le faia ai e se Vaega Faaupufai ni Tulafono mo so latou manuia, ae pasia Tulafono mo le manuia lautele o le tatou atunuu. O le faamalo lea, lea ua e toe tulai mai i masina o lo o totoe, faatino lau amiotonu. Sa i ai lava le manatu o le a e le toe tauva i le faiga palota ina ua e fulitua mai i uso nei o le Palemene, i le latou ote alofa mafatia, tuualalo, ma e alu atu ai lava. O lau tatalo i le taeao lenei i lou toe tulai mai, o le a maua oe i le loto faamagalo, faamagalo i ou uso ma tuafafine faipule o le Maota lenei sa sausaunoa i le latou fautua ia te oe i lena taeao.

E le mafai foi ona laaloa lau upu, e ao ona ou faamalo i le Afioga i le Sao Faapito, faamalo i lau tautua, sa tatou nutimea faatasi i le tele o tausaga ua mavae. Ia, ma o lau tautua lava lea i le tatou atunuu, ua tele lou sao na fai i le tatou Malo. O le ala lena e tatau ai ona ou faafetai, ma e le tatau ona ou gugu, e tatau ona ou faalauiloa aloaia mai i totonu o le Maota lenei sa tatou tafai tauto uma ai, o le a tatou tautua i lo tatou atunuu. Ia, saiga ane ai o le tai, ia maua le tofamamao e tatou te soalaupule ai faatasi tonufai mo le manuia auiluma o le tatou Malo. O aga lava ia o mea nei o tofi faapenei, o se taimi ua tutu faatasi, o se taimi ua fefulituaai.

Ona ou oo mai ai lea i le tulaga i le Komiti. E momoli atu lau faamalo i la outou Komiti, le Komiti o lo o solaupuleina nei Tulafono e 3, e Teuteu ai le Faavae. Ia ma ou te taofi foi, ua outou gasea. O le Tulafono lenei, e 2 soalaupulega na fai na tapa ai finagalo o le atunuu, mai lava i le 2016 i le masina o Mati, sa pasia ai le lafo i totonu o le Palemene lenei ina ia fai se Komiti Suesue a le tatou Palemene latou te soalaupuleina ma le atunuu atoa se i maua mai ni a latou fautuaga e faalelei atili ai le tatou Faamasinoga o Fanua ma Suafa. Aisea? E mafua ona o le lolofi mai o le atunuu e aumai a latou talosaga ua siliga taliiseu le sulufai atu i le Faamasinoga ona omai ai lea i le Malo. O le a la le mea e fai e au ma le Kapeneta pe a sulufai mai ma le Vaega Faaupufai lenei? E le mafai ona matou faapea atu, o i tai i le Faamasinoga. E atagia ai i le leai o se agaga fesoasoani i nai o tatou tagata e sulufai mai i a latou mataupu. O le ala lena o lea na faapogai ai ona aumai le Tulafono e afua i le lafo na faatu i le Maota lenei, e leai lava ma se isi na teena. Sa valaau ai le atunuu atoa. Ma o fautuaga uma lava na aumai e sui o le atunuu lea na mafua ai le lipoti na toe faataoto i le Laulau a Fono a le

Palemene lenei ma fai i ai o tatou manatu ma lagolago, e leai se manatu na faasalaese, e tataua loa ona tusia loa le Tulafono e tuu uma i ai finagalo ia o Samoa na faaalua e i latou uma na valaau. O le a la le mea lea ua tupu? O lea ua tuu i totonu o le Tulafono finagalo o Samoa sa gasolosolo mai ma tau mai o latou mafatiaga. O ai a sulu i ai? Ua leai se tali mai le Faamasinoga. Ona sulu mai lea ia i tatou, o tatou o sui filifilia o tatou itumalo. O se tatou galuega ea lea na tofia mai ai tatou. O le le faia o se tali mo tatou tagata e sulufa'i mai i ai tatou mo se fesoasoani? O le mea lea ou te faafetai ai i le iuga na fai i totonu o le Maota lenei, o le a tatou liliu e fai le fesoasoani. O lea e afua ai le Tulafono lenei. Ma o le Tulafono, e toe faamalosi ai le tutoatasi o le Faamasinoga o Fanua ma Suafa na i ai, na i ai lava, o lo o i ai ma o le a i ai pea e faapei ona faataoto e le Tulafono o lo o tau soalaupuleina. E i ai le taofi e faapea, o le tetee o nisi o le tatou atunuu, ona o lea e aafia ai fanua faaleaganuu. O lau lu'i la, so o se isi, so o se loia o ona silafia se faaupuga i totonu o le Tulafono e aafia ai fanua faaleaganuu, avane i o i le Komiti ma aumai ai e soloia, aveese, ma o le faatonuga foi lena o lea ua ou avatu i le Loia Sili. Aveese, solipala, solipala ma aveese. Aisea? E le o i ai se tulaga faapena i totonu o le Tulafono. Ae o le mea lea ua tupu, ua tele naunau i latou e tau faasese. O le ala lea e taua tele ai lou tutulai atu i le taeao lenei.

O lau lu'i lena, i so o se loia o lo o i ai, afai o silasila o aafia fanua faaleaganuu, logo le Komiti ae soloia ese, titina ese, tafi ese, solipala ina ia taunuu ai upu o lo o avatu e lo tatou Malo. O le manatu e faapea ua faaopoopo mea na aumai i le fautuaga a le Komiti. O le tofa mamao lena, o le utauta mamao lena, o le faamaite mea lelei lena ua fai. E faatino ai pe afai o ni mea e atili tapue ai le Tulafono, mo le puipuia o tatou tu ma tatou agaifanua. Ma e leai se tuaoi, leai se tapulaa e taofia ai ia le faautautaga ma le tofa mamao, e saga tapue ai Tulafono i totonu o le Maota lenei. O lo o faatali se tulaga o le fono faaiu e faia ai le finagalo o le Palemene lenei. O lou taofi, o Tulafono o lo o faataoto, tapue ai a tatou tu ma tatou agaifanua. Aisea? E le o i ai i totonu o le Faavae, se aiatatau toatele, aiatatau a alii ma faipule.

O le ala lena, a aumai ai ni mataupu e se nuu e faasaga i se matai, po o se isi lava ua faatuala i le pule mamalu a alii ma faipule. O a upu a le Faamasino Sili talu ai, na aloaia ma faalogologo uma i ai Faamasino ma Loia. Fai mai lana tala, "E tulai mai loa se mataupu faapenei, e faafeagai ai le aia toatasi ma le aia toatele, TKO loa ma alii ma faipule, TKO Technical Knock Out. O le gagana lena e masani ai matou e solisoli tapoleni. E TKO loa taofi ma le fusuaga ua e oti. O le mea lena, lea o lo o taumafai i ai le Malo, tapue tapue pulega mamalu a alii ma faipule. O le lava la e tetee i le Tulafono lea, e le o se Samoa, e le malamalama i tu ma agaifanua a Samoa, e le fia Samoa. O le a le mea lea e tupu i le tatou atunuu, ua i ai nuu ua vaivai pulega mamalu a alii ma faipule. Aisea? Ua fiu, ua fiu e omai i le faamasinoga ma faamataga atu i totonu o le faamasinoga. Aisea? Ona o le aiatatau lea a le tagata e toatasi. Ae leai se aiatatau a tagata e toatele e pei o alii ma faipule. A o i lava

i le mamalu o pulega mamalu a alii ma faipule, lea e faalagolago i ai le Malo i ana atinae mo le nuu ma le itumalo. O lea e faalagolago i ai le ekalesia mo le puipuiga o auauna tofofi a le Atua o lo o alala i totonu o nuu. O feagaiga taulagi a alii ma faipule o le nuu. E faalagolago i le mamalu o pulega mamalu a alii ma faipule. So o se isi lava la e tetee i i, afai o se matai, o le matai lena e le i ola ae i totonu o le nuu. Pe afai foi ua matai, e le oo ma saofai i totonu o fonotaga a le nuu. Afai foi e fai ni ana monotaga, o lona uiga o la e fai e lona aiga, po o avatu foi ni mea e fai ai ae le saofai lava i totonu o le fonu a le nuu. E matua le silafia le tagata te tuvaoina le fonu. E le silafia le vaiava, e le silafia le togisala ma le e vaesala, e matua le silafia le faasologa o lauga i totonu o le nuu. E le silafia le auala i le tofa mamao fetala'i, e faia ai faaiuga. O faaiuga a le nuu e masani ona sii i luga ae toe pau ifo i lalo. E faapena le liliuina o le tofa mamao, o mea nei o pulega mamalu a alii ma faipule.

Lau Afioga i le Fofoga Fetalai, o le tulaga lena ua taua ai le taeao lenei. O le fautuaga i le tou Komiti, o lea ua matau ua faaiuiu le galuega. Ona aumai ai lea i totonu o le tatou Maota nei, e toe tagofia ma toe saunoa i ai sui usufono uma o le Maota lenei. A o le agaga maualuga lena o le Malo, tatou o mai e fai le tatou galuega. A o le tetee i mea ia o le sui usufono lena e musu e fai ni suiga, e musu e fai se fofo. Ua faafia ea ona aumai upu lafovale ia te au ma le Kapeneta ma le Vaega lenei i le tou alai ma tagofia mea faigata ia. A o ai e faia? Ua tatau ona fai. Aua o le le fofoina i le taimi lenei, o ai a tuu i ai? o lea ua tuu mai e le Atua le laolao, tuu mai e le Atua le mafaufau ia i tatou, tuu mai e le Atua le lototele, tatou te faia ai teuteuga. Sa le mafai i nofoaiga i aso ua tuanai. Aisea? Ona sa leai ni faiga faavae e mafaia ai ona felagolagomai i se mea lelei.

Lau Afioga i le Fofoga Fetalai, o le taua lena o le taeao lenei, e le gata ina momoli atu ai lau faamalo i lau Afioga. I le toe tolaulau mai o Tulafono e limataitaiina ai le Maota lenei, le amio ma mea tatou te faia e mamalu ai le Maota. Faapea foi ona faamanuia atu i le galuega a le Komiti o le a faaiuiu.

Ma le faamanuia i lau Afioga Fiame, faapea foi lau Afioga Laauli, alo mai. A na valaau mai au, ou te alu atu e avatu se matou teutusi, se meaalofa i la outou Vaega. Ae o le a ou faatalitali se i tofi le tou taitai moni, ona ou avatu lea o sau faamanuiaga. A o le taimi lenei tatou alofaiva aua le faamoemoe na usuia ai le tatou Fonotaga i le aso lenei.

Soifua ma ia faamanuia mai le Atua, i le tatou Fonotaga.

**FOFOGA FETALAI:** Tulai mai le Minisita o Tina & Tamaitai, Atinae o Nuu ma Afioga ma Agafesootai.

**Afioga Hon TUITAMA TALALELEI TUITAMA:** Lau Afioga i le Fofoga Fetalai, ma le faafofoga a lenei Maota mamalu, ou te tulai atu e faatu



le lafo, *Ina ia faataatia le Saunoaga a le Afioga i le Palemia mo faamaumauga a lo tatou Maota.*

*Faaluaina e le Minisita mo Pisinisi, Alamanuia ma Leipa ma le Minisita mo Tagata Tafafao Maimoa Mai Fafu.*

*Na faamaonia le lafo.*

**FOFOGA FETALAI:** Malo faafetai i le saunoaga. E faapena aua le atugalua fua le tofa a lau Afioga i le Palemia. E i ai le upu a le isi Toeaina, a faatu e le tagata le tagata e le umi se taimi, ae a faatu e le Atua le tagata, seiloga foi e toe finagalo le Atua e lava le taimi ona faapena lea.

### **FAAALIGA MAI LE TATAI O LE MAOTA**

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoaofa Fautulafono mo le iloiloaina o le Tulafono Tau Faaofi ua faaaliga iinei.

1. Tulafono Tau Faaofi o Teuteuga o le Tulafono o Faiga Palota (Nu 2) 2020.

**TUUINA ATU** i lenei aso 21 o Setema i le tausaga 2020.

Sainia: Hon TUILAEPa Dr. Sailele Malielegaoi  
**TAITAI O LE MAOTA.**

### **TUSI FAAMAONIA O LE TULAGA FAANATINATI**

E tusa ai ma Tulafono Tumau e 100(2) ua tuuina atu nei le faaaliga i le Fono Aoaofa Fautulafono, mo le iloiloaina o le Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o le Teuteuga o le Tulafono o Faiga Palota (Nu 2) 2020.

**TUUINA ATU** i lenei aso 21 o Setema i le tausaga 2020.

Hon TUILAEPa Dr, Sailele Malielegaoi.  
**TAITAI O LE MAOTA.**

## **ISI FAASILASILAGA A LE FOFOGA FETALAI**

**FOFOGA FETALAI:** Mo le silafia e le mamalu o le Palemene, ua ou taulimaina le Teuteuga o le Poloaiga o Faalavelave Tutupu Faafuasei e pei ona sainia e le Afioga i le O Le Ao o Le Malo.

Ma ou te tapa le Susuga a le Failautusi o le Fono Aoa o le Fono Aoa mo le tolaulauina o ia Teuteuga ma faataatia i luga o le Laulau a Fono.

*Na tolaulau e le Failautusi le Teuteuga o le Poloaiga o Faalavelave Tutupu Faafuasei.*

### **TEUTEUGA O LE POLOAIGA O FAALAVELAVE TUTUPU FAAFUASEI MO LE KOVITI-19**

1. Malaga Faapitoa Togipau o vaalele.  
I le toe iloiloaina o lenei mataupu i le aso 4 Setema 2020, na faamaonia ai le toe fetuunai ai o aso o faigamalaga sa fuafua e taunuu mai i le Aso Faraile, 11 Setema 2020 i le aso 18 Setema 2020 ona o tulaga i vaalele.  
Peitai e leai se suiga i le malaga faapitoa togipau chartered flight mo tamaiti aoga ua maea aoaoga, ma nisi e nofomau i Samoa i Ausetalia e pei ona faatulafonoina, e faataunuaina i le vaiaso mulimuli o le masina o Setema.
2. Femalagaaiga faalotoifale a vaalele laiti, femalagaaiga i le va o Upolu ma Savaii, e tatala i Aso Sa mo le auina mai o gasegase tigaina.
3. Faletalavai tumaoti. O le a tatala faletalavai tumaoti i Aso Sa, mai le itula e 3 i le aoauli i le itula e 7 i le afiafi, mo le talaina o talavai mo gasegase.

O lenei teuteuga e amata faamamaluina i le aso 20 Setema 2020. E faatumauiina pea isi aiaiga o Poloaiga o Faalavelave Tutupu Faafuasei na muai tuuina atu.

O lenei faaiuga na faia i lona Tulaga Faanatinati, e tusa ai ma le Vaega 38(1)(c) o le Faavae o le Malo Tutoatasi o Samoa.

Afioga TUIMALEALIIFANO VAALETOA SUALAUVI II  
**O LE AO O LE MALO.**

## **TUUINA ATU O PEPA**

*Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).*

1. SR 2020/3, Tulafono o Teuteuga o le Tulafono o Faiaoga 2020 – Faasilasilaga o le Amata Faamamaluina.
2. P.P. 2020/2021 Nu 53, Lipoti Faaletausaga a le Matagaluega o le Soifua Maloloina 2018/2019.
3. P.P. 2020/2021 Nu 54, Faamatalaga o Sini Autasi a le Falemeli o Samoa 2021- 2024.

## **TUUINA ATU O LIPOTI A KOMITI FAAPALEMENE**

*Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).*

1. P.P. 2020/2021 Nu 55, Lipoti a le Komiti o le Vaega o Atinae Eseese i le P.P. 2019/2020 Nu. 128, Lipoti Faaletausaga a le Pulega o Uafu ma Taulaga 2018/2019.
2. P.P. 2020/2021 Nu 56, Lipoti a le Komiti o le Vaega o Atinae Eseese i le P.P. 2019/2020 Nu 136, Lipoti Faaletausaga a le Matagaluega o Galuega Felauaiga ma Atinae Eseese 2018/2019.
3. P.P. 2020/2021 Nu 57, Lipoti a le Komiti o le Vaega o Atinae Eseese i le P.P.2019/2020 Nu 208, Lipoti Faaletausaga a le Matagaluega o Fesootaiga ma Faamatalaga Tekonolosi 2018/2019.

## **TULAFONO TAU FAAOFI O TEUTEUGA O LE TULAFONO O FAIGA PALOTA (NU 2) 2020 – faitauga muamua.**

**Afioga Hon FAAOLESA KATOPAU T. AINUU (Minisita mo Faamasinoga ma Pulega Tau Faamasinoga):** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota (Nu 2) 2020 i lona faitauga muamua.*

*Faaluaina e le Minisita mo Fesootaiga, Faamatalaga ma Fesootaiga Vavave Faaneionapo, Minisita mo Aoga, Taaloga ma Aganuu, Minisita o Tupe ma le Minisita mo Tupe Maua.*

*Na faamaonia le lafo ma faitauina le Tulafono Tau Faaofi o Teuteuga o le Tulafono o Faiga Palota (Nu 2) 2020 i lona faitauga muamua.*

## **TULAFONO TAU FAAOFI O TEUTEUGA O LE TULAFONO O FAIGA PALOTA (NU 2) 2020 – faitauga faalua**

**Afioga Hon FAAOLESA KATOPAU T. AINUU:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota (Nu 2) 2020 i lona faitauga faalua, ma ou te fia tautala faamalamalama i ai.*

*Faaluaina e le Minisita mo Aoga, Taaloga ma Aganuu, Minisita mo Tupe Maua ma le Minisita mo Fesootaiga, Faamatalaga ma Fesootaiga Vavave Faaneionapo.*

**FOFOGA FETALAI:** Tulai mai lau Afioga e saunoa faamalamalama.

**Afioga Hon FAAOLESA KATOPAU T. AINUU:** Faafetai mo lou avanoa lau Afioga i le Fofoga Fetalai. Ou te muai faatulou i le mamalu o le Maota i ona tulaga faalupe. Ae ua ou tulai atu ma le agaga faaaloalo e faamalamalama teuteuga ua tuuina mai o le Tulafono Tau Faaofi o Faiga Palota 2020.

Mo le manino o sui mamalu faapea le Maota nei, o itumalo faaalalafaga e eseese ma itumalo Palota. O itumalo faaalalafaga lea e i ai i le taimi nei, a o itumalo palota faatoa mamaluina pe a faataape le tatou Palemene i le tausaga fou ia Ianuari 2021, mo le silafia e lo tatou Maota.

E 4 ni sini autu ua tapena mai mo lenei teuteuga. (1) Ina ia faamanino atili le agaga o le Tulafono Autu ma ona aiaiga i so o se tagata e faamoemoe e tauva i le Palota tele, i se itumalo palota afua mai o vaeveaga o itumalo faaalalafaga, e tusa ai ma Tulafono palota 2019. (2) Ina ia faamanino atili foi o lea Tulafono Tau Faaofi, o tuutuuga mo se tagata o lo o faamoemoe e tauva i le Faiga Palota tele. Ae ua aafia i tapu o femalagaaiga ona o faamai o le Koviti-19. (3) Ia foia nisi o vaeveaga o le Tulafono Autu, na matauina e le Komesina o Faiga Palota, i le taimi na faatino ai le Faiga Palota laititi, le itumalo o Faasaleleaga Nu 2 ma Gagaifomauga Nu 3. Aemaise o le faatinoina o le fautuaga a le Komiti Faa-palemene, lea sa mafua ona sui mai i le 3 masina i le 6 masina, le nomination date. (4) Ina ia faamanino atili le agaga rationale, na ala ai ona tuuina i totonu o le Tulafono o Faiga Palota aiaiga o sui tauva uma e tauva i le faiga Palota, o matai e fai a latou monotaga faale-aganuu mo se vaitaimi, e le i lalo ifo o le 3 tausaga.

A o teuteuga la nei. Fuaiupu 1, ua tuuina mai le igoa puupuu o le Tulafono ma le Amataga. Fuaiupu 2, ua teuteu ai le fuaiupu 8 o le Tulafono Autu. Ua toe teuteuina ai le tuutuuga o le agavaa o le monotaga ina ia matua manino lelei le sootaga o le monotaga e le itiiti ifo i le 3 tausaga i totonu o se nuu e faaogaina ai le suafa matai. Ua maea foi ona lesitalaina faaletulafono, e le

i lalo ifo o le 3 tausaga, o lo o finagalo se sui tauva e faaaoga e faaulu ai lona suafa i le filifiliga, nomination mo le Faiga Palota.

Ua teuteuina le fuaiupu 8(2) o le Tulafono, e faamanino ai le le agavaa o sui tauva, pe a le ausia uma agavaa faaletulafono, e tusa ai le fuaiupu 8(2) o le Tulafono. Ua toe teuteuina la le fuaiupu ma tuuina i lalo o le fuaiupu 47 o le Tulafono Autu. Ina ia manino ai le iloiloaina e le Komesina o pepa mo filifiliga o se sui tauva, ma fai sana faaiuga e talia pe teena le faauluina o sui tauva.

Ona ua suia taimi faatapulaa e tatau ona i ai sui tauva i totonu o Samoa mai le 240 aso i le 305 aso i le tausaga. O lea e tatau ai ona sui le numera o lo o i lalo o le fuaiupu 8 (3)(d) o le Tulafono Autu, mai le 125 aso i le 60 aso ina ia atoa le 365 aso i le tausaga. Ona o aafiaga o le lalolagi o lo o feagai ai i lenei vaitaimi i le faamai o le Koviti-19, ma tapu o femalagaaiga, o le a mafai ai e se sui tauva, e nofo mau lava i Samoa, ae ua le atoa le 355 aso, e nofo ai i Samoa nei, ona o tapu o femalagaaiga o le Koviti-19 ona faamalieina vaega lea o le Tulafono, e tusa pe le atoa le 305 aso e pei ona manaomia i le Tulafono Autu. Fuaiupu 4, ua faaopoopoina le fuaiupu 46A, ina ia faia se auala ina ia mafai ai ona tuuina mai pepa o filifiliga nomination e se tagata o faimalaga atu i atunuu i fafo. Ae ua le mafai ona toe foi mai, ona o lo o noanoatia i tapu o femalagaaiga mo le iloiloga a le Komesina. E tatau i lenei tagata ona tuuina mai se tusi i le Komesina e faailoa mai ai le tagata e fai ma ona sui, e faatinoina le tuuina mai i le Ofisa o le Komesina o Faiga Palota pepa mo le filifiliga. Fuaiupu 5, ua teuteuina le Fuaiupu 47 ina ia le avanoa, e mafai ai e le sui tauva ona finauina se faaiuga a le Komesina e talia pe teena se talosaga o filifiliga e avea ai ma sui tauva. O lenei suiga ua tuuina mai, e mafai ai ona tuuina mai se Poloaiuga a le Faamasinoga maualuga e faaleaogaina pe talia le faaiuga a le Komesina e faatatau i le filifiliga a se sui tauva. Fuaiupu 6, ua toe teuteuina le Fuaiupu 53, e faaleaogaina le avea o se tagata o lo o toesea ma Samoa, ona o tapu o femalagaaiga o le Koviti-19, ae sa taliaina e le Komesina le talosaga sa faauluina mai i le taimi o le filifiliga. E tatau ona taliu mai lenei tagata, ia le itititi ifo i le 14 aso a o le i faia le Faiga Palota ia Aperila. Fuaiupu 7 toe teuteuina le fuaiupu 58(4) ina ia faamanino ai le faasologa o suafa matai o le a faaaogaina e se sui tauva i luga o le pepa palota. O suafa matai o lo o faamalieina ai le monotaga mo le 3 tausaga e tatau lava ona muamua i le faasologa o igoa i luga o le pepa palota. Fuaiupu 8 ia toe teuteuina le fuaiupu 141(2) ina ia maioio ai le mafuaaga e ono avanoa ai se nofoa o le Fono Aoao Faitulafono. O lenei teuteuga o le a faamanino ai aafiaga faitulafono e tulai mai, pe a faamavae pe auai atu se sui usufono i se isi Vaega Faaupufai e tusa ai ma le Vaega 46 o le Faavae o Samoa. Fuaiupu 9, ua teuteuina le fuaiupu 152 o le Tulafono Autu, e suia le fuainumera 48 i le 46 ina ia faamausali ai o fuaiupu uma o lo o faaaogaina i le palota tele, e tatau foi ona faaaogaina i palota laiti. Fuaiupu 10, o lenei teuteuga e faamanino atili ai le agaga po o le policy rationale, e faatulafonoina ai le

tatau e sui tauva uma mo faiga palota o Samoa ona faatinoina a latou monotaga faaleaganuu mo le le i lalo ifo o le 3 tausaga e auala atu i le suafa matai ua filifilia e faaaogaina e alu ai i le faiga palota. O le faiga lenei ua laugatasia ai sui tauva uma o lo o fia tauva i le Faiga Palota tele 2021 se i vagana ai vaega ia e 2.

(1) Mo se sui itumalo faaalaalafaga tu taulaga ia faaaogaina ai lea o le monotaga mai se suafa matai a se sui o itumalo tu taulaga ina ia faamalieina ai le 3 tausaga o lo o manaomia e le manaoga o lenei monotaga. O lenei faiga ina ia atagia ai le aafia o nei itumalo lea o le a aveeseina, dissolved, pe a faataape le Palemene i tausaga fou.

(2) Mo se sui itumalo faaalaalafaga o lo o aafia i le vaevaega, o le mafai e se sui tauva na te umia se suafa mafai mai se itumalo faaalaalafaga, ua vaevaeina i le vaevaega fou o itumalo palota ona faaaogaina le monotaga o lona suafa matai lea mai totonu o le itumalo faaalaalafaga lenei e tauva ai pe afai e le ausia le suafa matai o lo o fuafua e tauva ai i le 3 tausaga o le monotaga. E le faaaogaina lenei fetuunaiga i isi itumalo palota uma o le a i ai nei.

O le a faaopoopoina i lenei Teuteuga le faauigaina o upu o le monotaga mo lenei Teuteuga e faamanino ai le sootaga o itumalo sa aafia i le vaevaega fou. Aiaia ai le tuusaunoaina ma moomiaga o le nofo ai i Samoa mo se vaitaimi e le i lalo ifo o le 3 tausaga o se tagata o lo o aafia i tapu o femalagaiga ona o le Koviti-19.

Fuaiupu 11 o lo o tuuina i totonu o le Faamatalaga i totonu o le Tulafono Autu le lisiina o itumalo faaalaalafaga ma itumalo palota lea o lo o aafia i Teuteuga o le Fuaiupu Tau Faaofi 156(c).

O le Fuaiupu 12, o Teuteuga Faatupulaia. O le Teuteuga 1 ua mafua ona o itumalo palota e 51 lea ua i ai, e faatoa mafai ona faaaogaina ma aloaia pe a faataape le Palemene ia Ianuari 2021, ae ona o le moomiaga o itumalo palota fou nei mo le faatinoina o le faauluina o sui tauva, nomination ia Oketopa po o le masina fou, o lea ua alagata ai ona teuteuina le Fuaiupu 5 o le Tulafono o Itumalo Palota 2019, ina ia aloaia itumalo palota 51 mo le faatinoina o le faauluina o sui tauva i le faiga palota 2021.

Fuaiupu 13, e faamanino ai se vaega e faasaoina i lenei Tulafono Teuteu, e aloaia ai se faamai pipisi ua uma ona folafolaina ae le i amata faamamaluina lenei Tulafono Tau Faaofi. O lea tulaga e faamausali ai le Poloiga o le Faamai Pipisi i Samoa le Koviti-19, o le mafuaaga lea o nei Teuteuga Tau Faaofi.

Lau Afioga i le Fofoga Fetalai, o le faamalamalamaina lena o le Tulafono Tau Faaofi e pei ona taumafai i ai le Komesina o Faiga Palota ma le Loia Sili ina ia mafai ona manino mai Taiala faaetulafono aua le sauni atu o le atunuu i le Faiga Palota ia Aperila 2021. Soifua.

**FOFOGA FETALAI:** Malo faafetai saunoa i lau Afioga i le Minisita, o lele foi la ua manino auofala, ua malamalama foi le tulaga...

**Susuga Hon Laauli Polataivao Leuatea (Gagaifomauga Nu.3):** Lau Afioga i le Fofoga Fetalai, o se avanoa lau Afioga ma le agaga faaaloalo.

**FOFOGA FETALAI:** O mataupu e pei ona e saunoa i ai aua le tatou galuega.

Ona i ai lea o le manatu, o le a faataatiaese Galuega a le Fono Aoaofaitulafono mo lana malologa masani se i taumafa se tatou... fai se faasiliga malosi ona tatou omai lea faaauau le tatou Galuega.

O le a faataatiaese Galuega a le Fono Aoaofaitulafono mo lana malologa masani.

*Na faataatiaese Galuega a le Fono Aoaofaitulafono mo lana malologa masani i le itula e 10:21 i le taeao ma toe amatalia i le itula e 11:10 i le taeao.*

*Na toe faaauau felafolafoaiga i luga o le faitauga faalua o le Tulafono Tau Faaofi o Teuteuga o le Tulafono o Faiga Palota (Nu.2) 2020.*

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoaofaitulafono.

E faia le malologa ua maea ona saunoa le Minisita mo le Ofisa o Faiga Palota i lana saunoaga e faamanino ma faamalamalama le uiga tonu ma le aano moni e pei ona tulai mai ai le Teuteuga. Ma o lea ua see mai ai loa le tulaga o nisi o finagalo faaalua o le sui usufono mamalu o le Palemene, ma o lea ua tulai mai le Afioga ia Laauli o le sui usufono mai le itumalo o Gagaifomauga Nu.3. Ia, saunoa ia lau Afioga.

**Susuga Hon LAAULI POLATAIVAO LEUATEA:** Faafetai tele i lau Afioga i le Fofoga Fetalai o le faa-ao o le Palemene o Samoa mo lou avanoa e avatu ai foi se tautalaga a lou sui usufono aemaise se malelega a lou itumalo.

Ia malie ia te oe upu a lou gutu ma mafauauga o lou loto, le Alii e o Oe o lou papa ma lou olataga ma o Le na ia togiolaina au. *“Salamo 35: Fuaiupu 1 seia faagata i le Fuaiupu 6 – “Le Alii e, ia e finau ma i latou o e finau mai ia te au. Ia e tau ma i latou o e faasagatau mai ia te au. Ia e tago i le talita ma le talipupuni ma ia e tulai atu e fesoasoani mai ia te au. Ia e to ae le tao ma ia e pupuni atu i e tuliloa mai ia te au. Ia e fetalai mai lou agaga lou Faaola e, o au lava lea. Ia faamaina ma maasiasi o e saili ia oti au. Ia liutuaina ma tau faamaina i latou o e manatunatu i se mea e leaga ai au. Ia*

*avea i latou o aputi e saito e lelea i le matagi, ia tuleia i latou e agelu a le Alii. Ia pouliuli ma ia maseese o latou ala. Ma ia tuliloaina i latou e le agelu a le Alii.”*

Ou te manatu e le sili mea ua fai i le na faia mea, e le sili foi le na auina atu i le na auina mai. Ma e le sili foi le auaina i Lona Matai. O le a ou le toe sueia fuefuesina po o tuaoi taoto o alofisa o tupu o Samoa. Ae muamua ona ou fuli le maa ae ou faailoa le ao o le malamalama. Sosofa laia o le la fala ma le la afa ae faeava le lupe o le talalelei ma le lau olive o le faaolataga aua o le lago sa folau lea o le Atua ma lana faatufugaga mo Samoa. O Lona alofa tunoa i le taeao lenei ua utu ai ota loimata ina ua toe maua sou nofoaga i le Maota i Tiafau, o le malae e taape ai tofiga a manusisina e le soaina aua Samoa ma lona manuia nei ma a taeao.

Tulouna lava le paia o Aiga, Aiga o Tupu, Aiga o Nofo, Aiga o Papa ma Aiga na Tafaifa, tainane Aiga i le ite a le malama, na emo ai le malama i Saua ae suluia Samoa i le malamalama o le Faaolataga. Tulouna ou mamalu faale-Talalelei, tulouna ou mamalu faale-Malo, tulouna ia ou mamalu faale-atunuu.

Tulouna lau Afioga i le O Le Ao Mamalu o le Malo o Samoa ma lau Masiofo, lau Afioga i le Sui o le Fono a Sui Tofia ma lou faletua.

Tulouna ia lau Afioga i le Fofoga Fetalai o le Maota Fono o Samoa, tulouna lau Afioga i le Palemia ma lau Kapeneta mamalu. Tulouna le Faamasino Sili, le Peresetene ma le ituvai o le Faamasinoga, alii ma tamaitai o le Faamasinoga a Samoa, Ofisa Sili o Pulega o Matagaluega ma Faalapotopotoga Tumaoti a le Malo ua tatou faatasi i lenei aso.

Tulouna le paia o Samoa ua ee, o paia aua Aiga ma latou Tama, Tama ma o latou Aiga, le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Tulouna oe lou itumalo pele, le paia aua Aiga Sa Tupua ma Aiga Sa Malietoa ma le Faletolu, le paia i le Aiga o Mavaega, le Falelima ma Saeseese ma lau tofa i le Tuua.

Ou te faapai foi aua le paia maualuga o le tapuaiga a Samoa i so o se tafa e fia o le lalolagi, tupu ma ee, tamalii ma failauga, faletua ma tausii, saoa ma tamaitai, o outou maua mai lou iuleo i lenei taeao manuia.

E le faagalo le tatou va nonofo ai ma Tutuila ma Manua, tasi le tama, tasi le tina, aiga tatou. Le paia lau Afioga i le faigamalo a le Kovana Sili, le Lutena Kovana, lau Afioga i le Fofoga Fetalai, le Peresetene o le Senate ma le faigamalo. Le paia lava lea aua Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Tama a le Manuatele ma le Faleagafulu o le Motu, le Tootoo o le Faleula ma le Laau na Amotasi.

Ua ou manatu o le a ou le toe toli niu fitifiti pe ou te toe asaasaina le vai na pisi, o le vai foi ua mai aua le Tagaloa Aopo, o le vai foi ua fatitoto ina ua ta tu, ua ta tui ma ta tagi tele. Talofa e Faatuliaupolu ua fasia oe e ou fili a o fea ou aiga, aua le tapuaiga a Samoa aemaise Puleono ma le motu tele i



Salafai. Ui o lea, ia viia oe le Atua e faavavau, o le Atua o Samoa, ua faafetaia Lou alofa ma Lou aao laveai. Ua uimagalo ai le ava nai le fale Salemuliga, ae ou tofutuola i le vai o le fale Tuamasaga.

Ona ou manatu lea, o le a tau ia ina ou asaasa i tai tafola e fetai ai vai mai vasa ma vai mai mauga o galuega mamana a le Atua Soifua, o Ia ua tatou fesilafai ai i lenei taeao manino ma le taeao totoa i le Maota i Tiafau. Ae o le toe upu lenei a le tatou Alii Faaola i ona toe taimi i luga o le koluse: “Ua taunuu, ua maea, ia fai lenei mo tatou. Ia fai lenei mo au, ia fai lenei mo oe.” O le koluse o le faalumaina ma le faamaina ua fanau ai measina.

Ae ou te avea lenei avanoa taua i lou agaga faaaloalo e faaleoina ai le agaga faafetai i le tapuaiga a Samoa aoao. Samoa o oe lava o le ua e faalanumaaveave, o le i'a e iviivia e leai se poto po o se vave na te toe autalaina ou sa ma ou faiga. Fai mai le tagi talatala a Ulufanuasesee i lana fanau o Taema ma Tilafaiga, “Fuga e, se ua talalua lo oulua po fetalai, tautuana le ausaga, a ia oulua matatau ia Samoa.” E faapena se lagona o le paia ia Sa Tupua ma Sa Malietoa ma Aiga, le mamalu i le Faletolu aemaise le Aiga o Mavaega ma le tofa i le Tuua ma le Falelima o Sanaeseese.

E momoli lo matou faafetai i le tapuaiga a faafeagaiga taulagi i so o se fatafaitaulaga, Taitai uma o Ekalesia ma so o se tovine sa outou tatalo ma outou faanonomanu a o alo lenei itumalo i lana toe filifiliga o se tasi e toe foi mai i le Maota lenei e faaauau le tautua a le itumalo. Faafetai atu aiga, uo ma e masani, sa outou fusia le fusi o le fau o malo a o feagai lenei itumalo ma faafitauli, ma le tatalo sa tuu i le Atua i se laolao lelei faapenei tatou te lauluafesilafai ai se i toe momoli le faafetai i le Atua i lana topule ma lana pule faasoa ua mafai ai ona tatou lauluafesilafai i lenei taeao manuia.

E momoli lau faafetai tele i lau Afioga i le Fofoga Fetalai, malo afua ailao ua maua lou soifua ma lau auaunaga mo le atunuu. E le mafai e au upu ma tala, ona ou malu i lou afeafe i taimi uma e lualuta ai le gataifale o tuleiga ma saunoaga. Faafetai i lou aapa faa-matua moepo ma faa-matua moeao e leoina le mamalu o le Maota i ona vaega eseese. Ua maea ona ou faalalolalo atu ma ou faatoese atu i lo ta va faafeagai ai, Toleafoa, e silafia e le Atua mea uma i le va faafeagai ai, na ou tuumuli gugu ese ai i le aso na ou faamavae ai tuugutu i totonu o le Maota lenei ona o le tulaga na e silafia, na ou pule ai i lou loto ona o lou ava ma lou alofa i le itumalo i tuleiga ma saunoaga sa saunoa i ai sui usufono. Ae faafetai tele, faafetai tele sa e mau iumaea ma mulimulitai ma e apaapa pea i le tatou va nonofo ma le va tapuia, o le agaga faafetai lea.

Le paia e o sui usufono mamalu uma o le tatou Maota Fono, sui usufono mamalu uma o le paia ia Tumua ma Pule, Aiga ma Tama, tainane Faleupolu o Tofiga. O le tatou va faafeagai ai, ia outou finagalo malilie i futia ua sola ma aso ua alu. O se tu ma se aga ma se upu ma se tala sa toia ai le va i le tatou faafeagai ai, e silafia e le Atua mea uma. A o le tatalo sa tuuina atu i le Atua, ina ia o tatou omai e fau Samoa ina ia manuia. E leai ni avanoa o toe

fefulituaaiga po o ni avanoa e tatou te faatupu ai ni maseiga i ni faalavelave tatou te le manaomia, a o le agaga atoa o lou toe foi mai i le Maota i le taeao lenei, e tasi lava le vaaiga ia manuia le atunuu.

E faapitoaugafa sau faafetai tele i sui usufono tutoatasi o le Maota, i lau Afioga i le Sao Faapito lau Afioga Fiamē Mataafa Mulinuu le II, aemaise lau Afioga Olo Fiti Vaai faapea foi lau Afioga Leatinuu Faumuina Wayne Fong. Faafetai i la outou faaaloalo, aemaise foi la outou tapuaiga i mea uma sa feagai ma lenei itumalo. E silafia e le Atua le agaga ma le manatu ma le lagona ia tatou galulue faatasi aua le manuia o Samoa nei ma a taeao.

Ou te faaaogaina foi lenei avanoa taua e momoli ai le agaga faafetai tele, e ui ina e le i aloaia i totonu o le Maota Fono lenei i Tiafau, ae momoli le agaga faafetai i le Vaega Faaupufai a le SNDP i ona tupu ma ona ee ma ona tamalii ma ona faleupolu o tofiga, aemaise le tauavagameaina o le taumafaiga aua le tatou alo atu i le faiga palota mo le lumanai. Faamalo le pule, faafetai le faaaloalo. Tainane le Vaega Faaupufai o le Puleono ma Tumua, faafetai i la outou faatuatuaga ua tuuina mai i lenei Vaega Faaupufai ua faatuina aloaia i totonu o le tatou atunuu, o le Faatuatua i le Atua Samoa ua Tasi po o le FAST Party. O lo o loloma le faiga filifiliga a Samoa, ma e leai se isi e soona sii sona vaa e le i malele le atunuu. A ua ou faaaogaina lenei avanoa taua e momoli atu ai lou agaga faafetai tele ona o lo outou finagalo faaalua e lafo la outou faatuatuaga e ala i le Faatuatua i le Atua Samoa ua Tasi tatou te militino ma fusi le fau o Malo aua le manuia o Samoa nei ma a taeao.

Lau Afioga i le Palemia, Susuga Tuilaepa Naiti Aiono Sailele Malielegaoi, ua faafofoga Samoa i upu ma tala, ma e leai se mea e tasi o toe lilo i tualumaga ma mea uma o lo o fai nei i upega o faamatalaga. Ou te toe faaoo atu foi lau faamauualoga i lau Afioga, ona o tulaga i upu ma tala ma mea uma o lo o ta fetuunai ai i peau o le ea a o faalogologo le atunuu. Na pau lava lea o lau tatalo lau Afioga i le Taitai o le Malo, ia e seu silasila i sa matou foi taumafai atu. O le Maota Fono i Tiafau o le faata e afua mai ai mauga manuia, o le filemu ma le saolotoga o si o tatou atunuu. Ia sala uta, a ia tonu pea tai, a ia tumau le tatou va fealoaloai ma lo tatou va tapuia, e tausi ai le filemu, o lo o tapuai le atunuu. O le tatalo lea a Aiga Sa Tupua ma Aiga Sa Malietoa, e folo pea le maasiasi, e folo pea le oona ma le tiga o puapuaga ma faigata i lau savaliga i lenei Nofoaiga, ona e tumu i le ava ma le faaaloalo i le va faafeagai ai ma lau Afioga i le Taitai o le Malo, na afua ai ona ou tumuli mai i le Vaega Faaupufai na fau e lima o le itumalo ma Samoa atoa. O alofaaga molipo na ma alofaaga faivavale na o lenei itumalo, aua le tatou Vaega Faaupufai. E ui o lea, ua le ogatasi le futia ma le umele i so matou lagona. O le upu ou te fai ma ou tautala ai ma ou gagana ai, o le tofa faaali lena ma le malelega lena a Aiga Sa Tupua ma Aiga Sa Malietoa, lea e mafua ai ona ou toe tu atu i inei ma momoli atu le tautalaga aloaia ma le faaaloalo i lenei taeao. A o le matou faanaunautaga i tulaga ua e saunoa i ai i le matou

taumafaiga, alofagia e le Atua, e matou te le sii se ta pe faataumatatao pe matou te agai e fau ni mea e le talafeagai, ae tau ia ina matou taialalo le ia a Sa Saumani ma matou saili i lalo Malo, aua le manuia o Samoa. O mea le talafeagai e fai atu pea, o mea e le sagatonu e fautua atu pea ina ia manuia le sa folau o Samoa nei ma a taeao.

O lou tulaga i le Vaega Faaupufai, e pei ona e saunoa e le i filifilia se taitai mautu, mo le silafia e le Maota, o au o le Taitai o le Vaega Faaupufai Faatuatua i le Atua Samoa ua Tasi. O le tapenga lena o lo o taupule seia lalata i le vaitau seia fesili ia Samoa ona filitagaga lea, o ala na o mea. A o le taimi lenei, ua ou toe foi mai i le Maota i le tulaga lena, ma lou agaga faaaloalo.

Lau Afioga i le Minisita e a ia le Tulafono, ou te tautala lava ma le faaaloalo leaga o le Tulafono lenei na mafua ai ona fai le faaiuga e aveese au ma le Pati, le Tulafono lenei o Faiga Palota. Sa ou tuitui malofie ma ou tatatuli ona o le alofa i le faigamalo, ona o le naunau ina ia taatia i lagatonu tulaga uma o le Tulafono lenei, e le faigofie le faiga filifiliga lea a Samoa, sama se mago fili se tautai, tautai se potu e filifili ai tatou o sui usufono o le Palemene. Peitai, ia, e vaai lava ma le faanoanoa, o lenei ua toe o se aga, ua toe 6, 7 masina, a o lenei lava e auai mai lava suiga, e le o ni suiga faigofie, o suiga e matua oia ai faiga faavae i le va faafeagai ai o itumalo, va faafeagai ai o nuu ma afioaga e aafia uma ai tagata palota uma o le atunuu. Faatoa uma nei la matou faiga filifiliga, faatoa maea atu nei le faiga filifiliga na faatino ai aiaiga o le Tulafono sa matuai ou tatalo atu ai ma le agaga faaaloalo e te seu silasila i suiga nei.

Saunoa foi le Taitaifono i taimi uma sa taumafai atu ai, ua uma ona matua soalaupule mea uma e ala i maioio ma mea uma o lenei Tulafono. O le a sa tatou silasila i lenei taeao? Ia o lea foi ua toe aumai le isi 12 suiga maioio o le Tulafono lenei. Ae pei lava ona taumafai atu i futia ua sola ma aso ua alu, e le mafai ona tatou tuli tamoea pe tatou te fai faataga fai pe tago tumutumulima, e aafia le atunuu, e matua aafia. Aisea? E aafia le aiatatau, e aafia le pule mamalu a alii ma faipule, e aafia sootaga i suli e tau i suafa, tau i fanua, ona o le tatou Tulafono lenei. Ua tatou o ese mai ai i itumalo faaalaalafaga sa tatou masani mai ai, a ua tatou agai i itumalo faafuainumera ina ia tau lava ina faataua le palota.

Lau Afioga i le Minisita, ia o lea foi ua tatou toe agai e fai le faanatinati. E le i lava ea lea lau Afioga? Mata o maasiasi le avatu i le faamasinoga, a o lea foi ua toe momoli mai? E le i lava ea lea atuvasa, o lea e tuualalo atu lava lau Afioga i le Minisita, lea ua toe aumai, o lea foi ua tatou suia, ua foia nisi mea, a o lea foi ua toe aliai mai isi mea e toe tupu ai foi nisi faafitauli. O le agaga lau Afioga i le Minisita...

**FOFOGA FETALAI:** Toe 2 minute o le sui usufono.

**Susuga Hon LAAULI POLATAIVAO LEUATEA:** E le uma lava le manatu atu...

**Tofa Olo Fiti Afoa Vaai (Salega):** Lau Afioga i le Fofoga Fetalai, e faamalulu atu i le sui usufono mamalu mo Gagaifomauga Nu.3. Leai ou te tulai ma le faaaloalo lau Afioga, talu ai foi ona o le Saunoaga Faataupou lea a le Afioga a le sui usufono mamalu. Ia o aga masani lava a le tatou Palemene, e tuuafu lava le saunoaga. O le mea lea e faamalie atu lau Afioga, o lena ua e saunoa toe 2, *Ia e a pe a faaopoopo se isi 20 minute.*  
Ma le faaaloalo lava.

**FOFOGA FETALAI:** Malo faafetai.

*Faaluaina e le sui usufono mo le Nuu Tu Taulaga i Sisifo.*

**FOFOGA FETALAI:** Ia, tatou te alu lava i ala o mea, e ui lava ina sui usufono fou, ae o le Paeaiga lava lena, e uso lava taivai ma taimiu, o le tulaga lena, i sala le gagana, a o le upu foi mai ona o lea ua faatu mai le lafo, o le ala lena o le le tuu tiutalaloa e le Nofoa. O Laauli o le isi sui usufono sinia, o le fai taai o le Paeaiga lena, na ona sui lava o le nofoaga, toe foi mai i le faiga palota, ae le aveesea le tulaga o le sinia o Laauli i totonu o le Palemene.

O le mea la lea ua faatu mai le lafo ina ia faaopoopo se isi 5 minute, ia se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, e tataua ona faamanino le mea lea. Se i faamolemole lau Afioga, leaga o lea ua sau i lalo o le Saunoaga Faataupou. Ua leva lava ona pau le sui usufono. Ua ou le iloa po ua faatolu ea ona pau, a o lea la ou te fia fesili atu ai, o le a tonu lava lau faaiuga? O toe sui taupou ea pe leai? O le Saunoga Taupou ea lea e fai pe leai?

**FOFOGA FETALAI:** Ia, o le avanoa lava latou na tuu ia Laauli e 30 minute, a o tulaga masani o le saunoaga a se sui usufono i mataupu faapenei e 20 minute.

**Susuga Hon LAAULI POLATAIVAO LEUATEA:** Lau Afioga i le Fofoga Fetalai ua ou ava atu, ua ou ava atu...

**FOFOGA FETALAI:** Ia, a o le agaga lava o le faaaloalo lea na tuu ia Laauli le 30 minute. O le mea la lea, o le faaiuga a le Nofoa, malie Laauli faauma maia lau saunoaga i le 30 minute.

**Tofa Hon Lopao Natanielu Mua (Minisita mo Faatoaga ma Faigafaiva):** Lau Afioga i le Fofoga Fetalai e fia maua se avanoa...

**Susuga Hon LAAULI POLATAIVAO LEUATEA:** Aua ia le poia Faleolo i lau Afioga i le Fofoga Fetalai, aua e te atugalu.

**FOFOGA FETALAI:** Malie ia lau Afioga le sui usufono mo Gagaifomauga Nu 3, se i tulai mai le Minisita o Faatoaga.

**Tofa Hon Lopao Natanielu Mua:** Faafetai tele lava. E le fia faalavelave foi i le saunoaga matagofie a le sui mamalu. Ae na ona faapea atu, e i ai nai faaupuga laititi e tatau ona faasao semeamanu e lei uma, leaga e faigata o faamaumauga a lo tatou Maota nei e tumau.

O le faaupuga lea e faapea, na ala ona faatea e le HRPP le Afioga i le sui usufono mamalu ona o le Tulafono lea. E tatau ona faasao, leaga o au nei sa i ai i fonotaga uma lava a le Vaega Faaupufai, e le i taua se mea ua faatea Laauli ona o le tulaga lea lau Afioga ma le faaaloalo ina ia faasao le tulaga lea. Ma le faaaloalo lava.

**Susuga Hon LAAULI POLATAIVAO LEUATEA:** Faafetai. E i ai le tamaloa o le matou nuu e igoa ia [.....] Ae aua ia le tee le uluga i lau Afioga i le Minisita. Sa ou manatu e malu le isi Pule i le isi Pule.

**FOFOGA FETALAI:** Ua ou tapa le sui usufono o lo o saunoa, se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, na amata mai o lea e olo a le fua a o folau le vaatele i le saunoaga a le sui usufono. E anoano lava mea sese ia sa ia taua, a o lea lava sa olo lava le fua se i faaauau lana saunoaga. E tasi la lea mea na tulai mai ai le Minisita o le Kapeneta, aemaise le tulaga o le Tulafono lea tatou te talanoaina nei. E pei o lea e faa'alo'alo i le Tulafono lea, a o le Tulafono lea e agai i ai, o Tulafono ia e soalaupule i le taimi nei o lo o afifi uma mai ai mea ia. E toe faapea atu, i le tulaga na palota ese ai le sui usufono i le pasiaina o Tulafono, Tulafono la ia e faatalanoaina nei. O le tulaga lena, ua uma ona lotea i totonu o le Kapeneta ia Tulafono lea e soalaupule nei, ma sa auai ia Laauli i le fono a le Kapeneta, ma faamaonia ai ia Tulafono ia e 3. Ma o le tulaga la lena, oi tulafono lea e faatulaga ai ia itumalo ua le o toe ta'ua o itumalo faaalalafaga ae ua ta'u o itumalo faapalota. Ina ia ogatasi ai ia faaupuga o mea o tofiga faale-Malo e pei foi o fomai, e leai se fomai faapitoa i se itumalo e tasi po o se nuu e tasi. O tofiga ia faale-Malo lea na ala ai ona sui le faalupega, ua le

toe ta'ua o ni itumalo faaalalafaga ae ua ta'u o itumalo faapalota. O mea ia sa matou soalaupuleina a o saofai Laauli i totonu o le Kapeneta, lea sa ou faasilasilaina atu, ae le i oo i le taimi na faamavae ai. E leai ma se leo e teena ma teena o lona uiga na ioeina, ae ua oo i le taimi na pasia ai le Tulafono i totonu o le Fonotaga lenei, ona tu ae lea toe teena. Ou te manatu e tataua ona faasao mea ia, leaga o lea e aveseseina, e oo foi la i le teuteuga lenei lea o le a fai i le aso. O lea e faapea mai ua vave, pe ua toe fai ua i luga o le agaga Faiga Palota. Na ona faapea atu i le tausaga e 2015, sa tatou faia ai foi ia teuteuga i luga o le Tulafono o Faiga Palota i na taimi i le fetuunaiga o itumalo o le au palota e le o ni matai. Lea sa fai foi i le faaiuga o lona foi tausaga a o lumanai le faiga palota, faaiuga o le 2015. A o Minisita ia Fiamē i le Faamasinoga, sa ia vaaia itu ia e aofia ai tulaga o faiga palota. Ma sa faia foi lona palota i le tulaga faanatinati.

Lau Afioga i le Fofoga Fetalai, e mau lava e faalele upu ae i ai foi e e mataua upu.

**FOFOGA FETALAI:** Malie le sui usufono mo Gagaifomauga Nu 3 se i fai atu lava le upu lea a le Nofoa.

Masalo ina ia faamanino le mea lea mo le agai i luma mo le tausiga o le Fono. E pei lava ona ou avatu e le agavaa Laauli mo le Saunoaga Faataupou, e pei ona masani ai sui fou. A o le avanoa masani pe a talanoaina ni teuteuga o ni Tulafono e 20 minute. Ae ua ou tuu atu le afa itula, i le agaga foi lea o le avafatafata. Ma e mamafa ia te au le tapuaiga a lou itumalo, e manatu ai ia lava si ou taimi le 30 minute, mo le faamaninoga o le itu lea. Ae ui lava ina faapena e pei ona tulai mai le lafo, a o le agaga faaloalo lava e faapena ona faamanino le vala lea. E ui lava i le tatou Tulafono Tumau ae taualuga lava i le avafatafata. Ou te faatonuina foi le Ofisa o le Fono ina ia aveese le upu lea sa e lafoina i le Minisita o Faatoaga o le sui osovale.

Ona e manino i tatou Tulafono Tumau, e tulai mai le Malo e faamanino ma faamalamalama, e faasao se mea e tataua ona faasao ma faamalamalama. O le tulai mai lona o le Minisita o Faatoaga. Ma ou te faamalulu atu i le Minisita o Faatoaga, e i ai le manatu o oe foi o le tagata o le Alii, e faapena ona e finagalo faamagalo. Laauli o lea ua ou faatonuina ia faapena ona toe faai i tua ia au saunoaga.

O le faasaoga o le mataupu e pei ona tulai mai ai, ona o lea sa felafuai lava le tulaga o le Malo e faamalamalama nisi o mataupu, o mea na i tua atu. Malie Laauli a fai le tala a le Nofoa ona e afio mai lea i lalo.

A o le mataupu tonu lea na e faamavae ai, o le lipoti a le Komiti o Tulaga Aloaia a le Maota. O i ina tonu lava lea na vevesi ai lea na tulai mai ai lau faamavaega. O le sao lona ua ou fai atu ai. Ma a saili mai faamaumauga, o faamaumauga na. Ma o le mea lea ua ou manatu ai, e aua le toe asa i tua ae faauma mai lau saunoaga faamolemole le sui mamalu.

[Upu na faatonuina e le Fofoga Fetalai e aveese mai faamaumauga o le saunoaga a le sui usufono mo Gagaifomauga Nu.3: - “*O le Sui Osovale.*”]

**Susuga Hon LAAULI POLATAIVAO LEUATEA:** Faafetai i lau Afioga i le Fofoga Fetalai, ia o lo o manino pea le...sa fai atu lava le tautalaga a lenei itu, o le Tulafono lea, o le Tulafono lea na fai ai le faaiuga ia te au e le Vaega Faaupufai. Ona o lou teena o le Tulafono lea i le faiga o le Faavae. O i na ou tulai ai, tulou foi le saunoaga a le Palemia faapea sa ou i ai ae sa ou ioe. Silasila le Atua, o le faatinoga o lou tetee na faatino i le Maota, faatino i le Maota. Ma o le mea lena o lea sa ou taumafai atu e faasao le saunoaga a le Afioga i le Minisita ona o lea e sese mai lana oso. Ia faafoi maia lau upu, osovale sese lana oso. O lea foi e fai atu o le Tulafono lea, ona o le Tulafono lea sa ou le auai i le palotaina.

**FOFOGA FETALAI:** Ua ou manatu sa e i le Nofoa foi lenei. E ao ona e faapea mai, ua sese le tulai mai o le Minisita. Ae o le tulai mai o le Minisita, o le tulaga o le mea e fia faasao po o le fia faamalamalama. Leaga o la e faafofoga mai foi le itumalo o le Minisita ia, ma e faapena. O lea faatoa uma nei lava ona fai lau tautoga o le loto faamaoni. Aua e te faia ni upu foi nei e tuitiitia ai le mamalu i totonu o le Palemene. A o lea e matau atu, o lea e le i uma le aso, ae ua e toe soli foi lau tautoga na fai. O le mea lea, na ona faamanatu atu lava. Ae faamuta ai ii lea mataupu.

**Susuga Hon LAAULI POLATAIVAO LEUATEA:** E le toe faia se leo i lau saunoaga. Leaga e pule toatasi lava lau Afioga i le tatou Tulafono Tumau. Na ona o matou tuituimalofie, o lo o i ina le pule. E ui foi i se matou taumafai atu, i se uluai saunoaga a lenei itumalo, gaumaleau so matou taofi. I nai avanoa o le matou fai atu, ia tasi ia ae foi e na o le toatolu i matou. Faafetai Leatinuu, faafetai Olo, onosai, onosai ma taialalo le ia a sa Saumani, ia saili i lalo Malo. Our time will come. Onosai, ae tatou alu i le taimi lenei, leaga o la e tulai latou... it is their time. O le agaga lena lau Afioga i le Fofoga Fetalai, faamalulu atu foi i le sui usufono mai Salafai. O lea ua tatou vaai i ai, e le toe malu Pule ia Pule, ioe e faapena se lagona. Ae ui i lea, ma le agaga faaalalo i lau Afioga i le Fofoga Fetalai, e faapena se lagona e tau avatu. O le aso foi lea na ou faamavae ai ma le Palemene, e tau solomusa lava i le nofoapule le fai upu. O fea lo ta malu, o fea lo ta maluapapa e fesili i ai e fealofani le nofo a Pule.

**FOFOGA FETALAI:** Ia faafofoga mai le itumalo, se i onosai mai lava. O le a la se tou faafofoga ma se tou silasila i le taofi atu e le Fofoga Fetalai ae tulai mai lava. O le mea lea e igoa o le solifono. Fai mai le Tulafono Tumau, o le solifono ma le le manatu i le Nofoa pe a faapea e fai atu le Nofoa

ma tuualalo atu le Nofoa ae tulai mai lava le sui usufono. Ona o le manatu i le va la lea, aua o upu ia e fetogia. Aua o le tiute o le Nofoa o le taumafai e faagasolo i le tulaga e pei ona i ai le Tulafono Tumau ina ia lelei ma aua le sopotuaoui le tulaga o saunoaga a le isi sui i le isi sui.

O le mea la lea, Laauli o le mea sili o lea ua faafofoga lou itumalo i le mea lea e te i ai. O lea lava e silasila i ai e le o ni tala ave. O lea lava ua silasila i ai, ua faafia ona ou tapa atu a o lea lava e te tulai mai. Ae ui i lea, se i faatali se i tulai mai le Minisita lea e tulai mai lana faauilavea. Tulai mai le Minisita.

**Tofa Hon Lopao Natanielu Mua:** Faafetai i lau Afioga i le Fofoga Fetalai, e leai e tele lava pesega ae matua lava i le oo. E leai o le fautuaga lea e fia avatu i le sui mamalu. E le faapea e aumai faaupuga e le fetau ma le sao, ona manatu lea e o mai Pule e o mai e opogi le sese lea. E le tatau ona faia le mea lena i totonu o le Maota lenei. Lau Afioga i le Fofoga Fetalai, ma le faaaloalo tele lava. Leaga ua leva ma ou fono uma i fono a le HRPP na fai, e leai se faaiuga faapea e tea Laauli ma le pati ona o le mataupu lea. O lea ou te molimau atu, o lea foi e molimau le pati, ma le faaaloalo lava o le mea e fia faasao. A o le mea lea e faapea o le le puipua e Pule se sui o Salafai, e leai la, e le o le mea lena e tatau ona tatou faia. O lea e faafofoga mai lou itumalo ma le faaaloalo lava.

**FOFOGA FETALAI:** Tulai mai le sui usufono mo Gagaifomauga Nu 3. Faamaea mai lau saunoaga.

**Susuga Hon LAAULI POLATAIVAO LEUATEA:** O le a le toe ta i tua se faamatalaga lau Afioga. Ta te fiu lava e ta te apapa atu e faamalamalama le uiga o upu na fai, ae leaga o lea foi e finau mai le Afioga i le Minisita. O lea ua ou taumafai atu, o le Tulafono lea na ou tetee ai i le Vaega Faaupufai, lea na fai ai le faaiuga ia te au. O le agaga lena. E ese mamao ma le mea lea na saunoa i ai le Minisita. Ae ui o lea o le a faatea lea mataupu.

Lau Afioga i le Taitai o le Malo, o lea foi ua ou toe tuutuomalofie atu i lau Afioga. E pei o lea foi ua agai le saunoaga i lau Afioga i le Fofoga Fetalai, e tolaulau si ou solifono a o faafofoga si ou itumalo. Ae o lo o manino pea ma malamalama le uiga o le taumafai atu, ina ia maua avanoa e faaleo ai manatu ma lagona. O le a le matou taumafai atu lau Afioga i le Fofoga Fetalai, e tasi lava le auga, ina ia fai le fesoasoani mo le tatou Malo. Fai le fesoasoani aua le tapuaiga a si o tatou atunuu. O a foi tulaga o le le tutusa o avanoa, ma le tulaga ua tatou i ai i lenei taimi, e le mafai ai ona matou manofonofa e faaleo pea lagona ma manatu. Aua o le mea lena na ala ai ona o mai i le Maota Fono lenei. E faaleo manatu ma lagona ma le tofa.... A o le agaga ma le faamoemoe lau Afioga i le Fofoga Fetalai....



**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O le mea e fia faasao...

**FOFOGA FETALAI:** Malie lau Afioga i le sui usufono o lo o saunoa, se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Faatoa uma nei lava ona e faatulaga mai ia Tulafono e limataitaiina ai ia tatou felafolafoaiga iinei i le Maota. Ma o Tulafono Tumau o lena o lo o manino. O saunoaga a le sui usufono, o le le tutusa o avanoa. O le a tonu lava le uiga o le upu lea, le le tutusa o avanoa? Lau Afioga i le Fofoga Fetalai, e agai tonu lava i lau faafoega o le tatou Fono. E pei e foliga mai i le saunoaga a le sui usufono, e te solitulafono. A o lea e te faataoto mai ia Tulafono Tumau o taualuamga o le tatou Fonotaga. O le mea lena ua ou le manofonofo ai, leaga e uiga upu, e uiga upu. E ala ona matou tutulai atu, ona o avanoa ia e aumai i lalo o le Tulafono Tumau ina ia faasao se mataupu ma faamalamalama se mataupu. Ma o le isi lena tiute o au o le Taitai o le Maota lenei, e le o manatu isi o le Maota lenei o au o se Taitai o le Maota. O au o le Taitai o le Maota lenei e lagolago atu i lau galuega, i le tulaga o le tausisia o tatou Tulafono Tumau. A o se lafoga e le tutusa ia avanoa, e matua matuia tele lea lafoga i le tatou felafolafoaiga o lo o fai nei.

**FOFOGA FETALAI:** Malo, se i ou toe faamanino le itu lea leaga o lo o tuuaina ai pea le Nofoa. E le gata o lea ua toe maua i lau saunoaga lau Afioga e, i le sui usufono mo Gagaifomauga Nu 3, faapea foi ona faalele ma faasalalau i nusipepa ma televise. O le le tutusa o avanoa, ia ma oo ai lava i se tulaga ua sui le faiga o le Fofoga Fetalai. Se i ou faamanino atu lava ia itu ia, e le mafai ona faaauau ni saunoaga a ni sui pe afai o le mea lea sa finauina e le isi sui, toe tu mai foi le isi sui toe finauina, toe tu mai le isi sui toe taua. E le mafai ona tataua ona faa... o le faamalamalamaga a le Tulafono Tumau, o le mea lena e igoa o le faasoesa i totonu o taualumaga o le fonotaga. A ua saunoa i ai le isi sui, see ese le isi sui mai le tulaga lena. Ma ia malamalama lelei, o le faamalamalamaga a le Malo, o le faaiuga lena o faamalamalamaga. Ioe, o Faiga Faavae foi e saunoa i ai le Malo pe a fai e see ese le sui usufono o saunoa mai se mataupu, ona tulai mai lea o le Malo e faasao Faiga Faavae o la ua see ese mai ai le sui o lo o saunoa. A o le eseese lea e tulai nei, e manao lava le sui o saunoa, ia faapea atu le Malo, e sao oe, ae sese le Malo. E leai, e le faapena se mea, o lea ua faapea se i, time will come. Ia faatali se i oo mai le taimi lena e te saunoa ai, ona faamalie lea o lo outou finagalo. Ae le faapea e faamalamalama atu e le Malo, ae manao ia o atu le Malo i le mea lena...e leai. Se e le faapena se faiga o se mea. O le mea la lea, o au o le toeaina ou te loto faamagalo. Laauli, se alofa ia see ese mai le tulaga lea.

Aua le toe taua lena vaega leaga e tau mai i ina, tou te le o malamalama i a tatou Tulafono Tumau. O le a la lou finagalo? A tuu pea e tulai mai tu atu le Malo tu mai tulai atu le Malo, seia tau lava nanei i le 8 i le afiafi. O le a lou finagalo? O lea e tau faafoe atu le tatou fonono...a o lea sa e tietie i i le Nofoa lea.

**Susuga Hon LAAULI POLATAIVAO LEUATEA:** Malie ia, Toleafoa, ua ou tapa fua i lou suafa e le o se tuli ua vale. Faamalulu atu, faamalulu atu.

**FOFOGA FETALAI:** Foi mai foi se upu a le Nofoa, ae faaiu maia le saunoaga.

**Susuga Hon LAAULI POLATAIVAO LEUATEA:** O le a ou le toe agai i nisi tulaga e tupu ai le tatou vevesi, ae tuu ia i le faamasinoga a le Atua ma le atunuu. E mama lau upu na fai atu nei, ia ae paga lea e le uma lava le faaoloataua a le Taitai o le Malo. A lea e sagatonu lava lau Afioga, e mama lau upu na avatu. Ae le mafai le tafutafu afi o le Palemia, e le mafai, faaoloataua ma agai ai e faaleaga lo ta va Toleafoa. Se i silasila i ai, fai mai nei ou te faaaloalo atu, ae se i vaai i le le faaaloalo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Ua e silasila o lea foi ua toe... e lelei ona faasao... o le mea e fia faasao lau Afioga. Se i silasila i ai i saunoaga e le migao, ae sau sao lava lana ia saunoaga. Ae o le mea lea ou te tulai atu ai, o au lea e tali ou te le o usu. O mea uma lava ia e tuuaia ai le Malo, o au lea e tali, ou te le o usu.

**FOFOGA FETALAI:** Ia malie ia Laauli. Faaiu mai lau saunoaga. Silasila o lenei e tauanau lau Afioga e faaiu mai lau saunoaga. Aua a na o se isi Fofoga Fetalai, ua sesele lau saunoaga, tulou sala le gagana vae atu le faafofoga mai o le itumalo ma le atunuu. Aua na ona... ia ua muta le saunoaga a le sui. Ioe, o le mea lena na sau ai aso ia, a o lenei lava e fai atu, se alofa ia faamaea mai le saunoaga. Ae ua uma lou taimi. E na ona ou faapea atu lava, tulai mai se isi sui ua uma lou taimi.

O le mea la lea Laauli, ua ou faamolemole atu, ia i le avafatafata, se faauma mai lau saunoaga. Ona uma lea se i saunoa mai se isi sui usufono.

**Susuga Hon LAAULI POLATAIVAO LEUATEA:** Faatea ia ia pisa... e tumu i le ava ma le faaaloalo i lau Afioga i le Fofoga Fetalai, o se upu ma se tala ua le tau tamalii i le matou taumafai atu, ia vaatele i lou finagalo. O oe o lo o i ai le pule tutasi i le tauaveina o le tatou galuega ma le faafoefoaina o le tatou Fonotaga. Toleafoa a i ai ni ou alofa, ia alofagia le matou tagi a le pumate. O le ala lea o le matou soso atu ma le agaga faaaloalo. O lo o i ai

pea i le Malo le malosiaga atoatoa e fai ai tala ma upu i taimi uma ma aso uma. O le latou Tulafono foi lea tatou te agai atu i ai, e fai se manatu. Ae afai la o lea e tu mai faasao faasao faasao, o le a la le mea o le a fai? Ae ui o lea, o le gaumaleau so matou taofi, o le a taatia i paga le tia a tautiaga aua le faalelegafulu i lenei aso.

Le paia e ma le maualuga o le tapuai mai a Samoa, i ona mamalu ma ona paia eseese. Ia alofagia e le Atua le tatou faigamalaga ua faataumuaava, i le tatou oo atu i le faaiiuga o lenei Nofoaiga. Ua toe sao ai i faga le sa o lenei itumalo matou te o mai e faaauau le matou tautua. A o le tatalo ia outou ooloo pitovaa ma outou alepuna ma aleaga ina ia sao le sa folau o Samoa. Faamasino outou, faamasino outou, le aufaigaluega paia o le Talalelei, tatalo faamolemole ia alofagia Samoa ma ona upufai o Malo. Tapuaiga i tafa e fia i le atunuu, tatou nono manu ma faamoemoe mo le Atua, ina ia tatou aulia le faiga filifiliga aloaia a Samoa mo le lumanai.

Le tapuaiga i lenei aso a lou itumalo, faafetai i la outou titifaitama, i lo outou afifio mai ma tala mai aao. Le tatou Vaega Faaupufai, lafo la outou maa ma le le masalosalo. Faafetai ua tatou faatasi i lenei aso tou te silasila ai i Tualumaga a le Palemene, mo le faatinoga o ona tiute. Tatalo pea ma lo tatou faatuatua i le Atua o Samoa ua tasi, ina ia manuia faiva o le tatou atunuu. Manuia lau Afioga i le Fofoga Fetalai ma le Palemene o Samoa. Soifua ma ia manuia.

**FOFOGA FETALAI:** Malo faafetai saunoa. Tulai mai le sui usufono mo Faasaleleaga Nu 4.

**Afioga PESETA VAIFOU TEVAGAENA (Faasaleleaga Nu 4):** Lau Afioga i le Fofoga Fetalai, e momoli atu le faafetai tele mo le avanoa. O lea foi ua uma ona malele le Taitai o le Malo. O paia ma sa o le Maota, o le a le oo i ai se faamatalaga a lou nei sui usufono. Ae ua ou manatu, ona o lea e vaai atu ua vave lo tatou taimi. Ae ua ou tulai atu ma le agaga maualalo, e fia molimoli atu se manatu o lenei itumalo. Ona o le teuteuga lea ua aumai nei, i le tatou Faiga Palota. E matua lagolagoina lava e lou sui usufono ia teuteuga ia ua i ai nei, sei vagana lava vaega ia o le teuteuga. O le saolotoga, e le o aafia ai le tele o itumalo i le teuteuga lea, seivagana ai se tasi o itumalo o Gagaemauga Nu 1. Ona o lea ua vaavaai atu i le teuteuga lea, o lea ua i ai le saolotoga. Ae o le a tuusao pea sau faamatalaga ina ia manino ma malamalama. Afai o au o le matai Leauvaa, e le o faia se tautua i Savaii Samalaeulu, ae ua ou fia alu e palota i Samalaeulu, Saleaula, Patamea ma Mauga. E leai sau monotaga o faia ai. O lea ua sau i le teuteuga lea, o lea ua mafai ona ou alu ai i le palota. A o lea ua i ai le tatou Tulafono, na o lē lava e matai ma fai lau tautua i le 3 tausaga. E foliga mai i i le teuteuga lea lau Afioga i le Minisita, se i toe silasila ifo lava i ai. Ona e pei e le alagatau le tulaga lea, e matai i le isi afioaga, ae leai se monotaga e fai i Savaii i le mea

o lea o le a alu ai i le palota, ae o lea e fai le monotaga i i. O se amiotonu lenei mea? O le agaga lea...

**FOFOGA FETALAI:** Malie le sui usufono o lo o saunoa, se i tulai mai le Minisita e ana le teuteuga.

**Afioga Hon FAAOLESA KATOPAU T. AINUU:** O lea ou te tulai atu ma le agaga faaaloalo, o lea sa talanoaina foi lea mataupu i le aso ananafi, a o lea o le a ou toe tali atu foi i le mataupu lenei. E pau lea o le auala e laugatasia uma ai tatou, itumalo ia e aafia. E pau lea o le auala o le fai faapea. Pei o le mea lea e tupu ia e silasila i ai, o itumalo ia e fai ai mea ia, o itumalo faa-alalafaga. A faapea la e aafia se itumalo faa-alalafaga i se vaeluaga, so o se nuu lava mai totonu i itumalo faa-alalafaga lea e i ai le suafa matai, e mafai ona aumai lana monotaga e alu ai i le isi igoa matai, i totonu lava o le itumalo faa-alalafaga lea. E le mafai e se isi itumalo faaalalalaga ona aumai se monotaga e faalava ai le monotaga i le itumalo lea. O le faamalamalamaga lea, e pau lea o le faiga e laugatasia uma ai ia tatou. Ma le faaaloalo lau Afioga.

**Tofa Olo Fiti Afoa Vaai:** Lau Afioga i le Fofoga Fetalai, si mea lava lea e fia malamalama i ai lou sui usufono.

**FOFOGA FETALAI:** O ai lea e te .....

**Tofa Olo Fiti Afoa Vaai:** O le lauga ia Peseta Vaifou Tevaga. Lau Afioga i le Fofoga Fetalai, o Peseta o le Palemia lagolago. A o le Tulafono o le Tulafono a le Palemia, a o lea ua toe tetee Peseta i le Tulafono a lana Palemia. O le mea la lea, o lua talanoa ea i le Tulafono lenei pe leai?

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, ua ou le iloa pe ua agai nei i le 4 ia Nofoaiga a le sui lea na saunoa nei. O le Minisita lea sa tulai i le taeao nei e ana le Tulafono, o le suafa o le Minisita, o Faaolesa, e Minisita tonu lava i mea ia. Lau Afioga i le Fofoga Fetalai, ua e silasila mai la i le mea e ala ai nei ona pisa. O lea o le a uma le Nofoaiga e le o silafia lava e Olo, o le Minisita o mea tau palota o Faaolesa. F A A O L E S A faamamafa i luga o le S. Lau Afioga i le faamalamalamaga lena.

**Tofa Olo Fiti Afoa Vaai:** Lau Afioga i le Fofoga Fetalai, o lea la ua manino matou, i le mafuaaga e faaletonu soo ai a tatou Tulafono. O lona uiga, e le i avea le Tulafono a Faaolesa ia Tuilaepa ma Peseta. E le o malamalama mai laua i le Tulafono.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o le a ou toe tu atu foi e faasao le isi sese. A lea sa auai ananafi, ou te ofo sa auai ananafi ae le malamalama lava, o lona uiga pe faafia sefulu ona faamalamalama i le taeao lenei, e le malamalama lava. A o le a le mea o le a aumai ai fua le Tulafono a le Minisita e tau tilotilo i ai au a ua uma ona fonu ai le Kapeneta? Lau Afioga, ua uma ona fonu ai le Kapeneta. So o se Tulafono lava e aumai i totonu o le Maota, e fonu ai le Kapeneta, e aumai foi lava la e le Minisita na tofia e vaia mea ia. O le a le mea na e le fesili ai ia Laauli? Fai ma e fesili i lou taitai e faamalamalama ane. Ia, lau Afioga i le Fofoga Fetalai, pe e te fesili ia Fiafame lena e i ou tafatafa.

**FOFOGA FETALAI:** Malo. Se i...

**Susuga Hon Laauli Polataivao Leuatea:** O le mea e fia faasao lau Afioga i le saunoaga a le Palemia, ia o lea lava e puipui a tatou Tulafono Tumau. Ia o lea lava e elieli mai e faapipii mai Olo ia te au. Olo is the independent member in Parliament. Ioe. A o lea lava e taumafai mai pea le faaoloataua ina ia alu Olo e fai lana faiga palota. O le mea lena o lea e tupu, e toe maumau ai foi nisi tupe ma nisi mea se tele...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Se ua salalau le Vaega lenei i fax a Olo e tau uma ai lava latou ia. A o le saga pepelo, pepelo, pepelo i totonu o le Palemene, vaai i ai i lou le toe? E toe alu fai mai au interview i luga o le TV ae e laei mai i laei o le FAST. Se i vaai i ai i lou... O le a ou faalo atu ia oe, ia, the King of the Crooks.

**Tofa OLO FITI AFOA VAAI:** Ia o lea foi o le a ou faalo atu ia oe. E sili atu le FAST i lo le HRPP i le mea lea ua ou tilotilo i ai.

**FOFOGA FETALAI:** E i ai se mea sa e finagalo i ai le Minisita o Aoga?

**Afioga Hon Loau Sola Keneti Sio (Minisita mo Aoga, Taaloga ma Aganuu):** Ioe lau Afioga i le Fofoga Fetalai, ona o lea e matau atu i le Tulafono le tulai ae o le Sui Minisita ma aumai lana faataitaiga. A o lea e matau e sao lelei lava le Tulafono e pei ona tau faamalamalamaina e le Afioga i le Minisita e ana le Tulafono ina ia ogatasi ai itumalo ia ua mavaevae. Ae mamao lava le eseesega o Leauvaa ia ma Samalaeulu ma le mea e sau ai le sui usufono. E matua mamao lava i Sini, a o lea ua talanoa ia Leauvaa ma Samalaeulu ae le talanoa sao ia i lona itumalo. E le o vaevaeina lona itumalo, ua ala ai ona toe lagalaga finagalo o le... A o lea e manino lelei ma... ae pei e foliga mai o lea foi e fia tauva ma ia i Samalaeulu ma

Leauvaa. Ia, ma lou taumafai e tau faafoefoe lau Afioga, a o lea e matua manino lava le faamalamalama a le Afioga i le Minisita e ona le Tulafono. Ia, ma le agaga faaloalo.

**FOFOGA FETALAI:** Malo. Ia, se i onosai mai lava le sui usufono, leaga o lea e tuuaiina le Nofoa i avanoa. Ioe. Ia, ua faafofoga la le Maota i le mea lea ua tupu? O lea ua pule lava le tagata ia i lona taimi e tulai mai ai. Ua pei e foliga foi lele o le a foi le lafu lea... ua leai se taitai. Ioe, ua leai se taitaifono, ia o lea ua tuu atu lava. O a la avanoa tou te mafaufau i ai tou te tuuaiina ai le Fofoga Fetalai? Ma le isi mea, o le tulai mai, e tulai mai oe Olo o le matua faamisa lava. Ia, e faapena lava le faiga o le tatou galuega, ioe, e i ai lava le taimi e tiutalaloa ai ona pule lava lea o outou ae ou nofonofono ma ou matamata. Ioe. Ae i ai foi le taimi ou te matua oso atu lava i lalo tatou te matua fusu. O le mea la lea, ae le faapea o le fai fai o tatou galuega i i ona outou o lea i o tou tauaimaa mai ai. O le mea lena e igoa o le lima i maa, ioe, a o lenei lava e tuu atu avanoa ia outou.

O le sui usufono lea o Faasaleleaga, ia o le a e toe tau fesili foi na e malamalama lava ananafi. Ia o lona uiga ua galo ia oe a o ananafi na e matua malamalama lelei lava. Ia, se i e toe tulai tasi mai lava pe i ai se isi mea o totoe, a o lea ua ou vaai atu o lena ua e malamalama.

**Afioga PESETA VAIFOU TEVAGAENA:** Ia, faafetai lava i lau Afioga i le Fofoga Fetalai. Masalo tasi lea mataupu sa ou lagalaga ai ananafi, ae faatoa maua mai lava le tali o le mataupu lea ina ua ma omai ma le afioga i le Komesina i fafo ma matua faamalamalama mai ai ia te au le mea lea. O le ala la lea ua ou manao ai e toe avatu le mataupu ona o lea ou te tautala i le tatou Tulafono. O lea e manino le Tulafono Tau Faaofi, afai o le tagata e fia tauva i le afioaga lea, e omai ma le pulenuu o le afioaga lea ma matai e toalua e aumai le sui lea i i e resitala. O lau fesili la i lau Afioga ona o le itumalo lea o Gagaemauga Nu.1. O lea ua aumai le Tulafono o faapea mai, e tusa lava pe te le matai i Samalaeulu a o lea e te matai i Leauvaa, leai se monotaga e fai i Samalaeulu, ua mafai e le tagata lea e i Leauvaa ona alu atu momoli i Samalaeulu. Silasila la lau Afioga?

Lua, o lea ua uma ona i ai nuu e patino i ai le nofoa lea, o le afioaga i Saleaula, o Mauga, Patamea, Samalaeulu. A tuu la i ai le saolotoga o le Tulafono lea, lona uiga ua alu atu ai foi ma Leauvaa. Leaga foi o le mea lea, ou te fai atu la lau Afioga, o lea e faafofoga mai le afioga i le Komesina, e faapefea la ona alu le sui lea e resitala? o fea le pulenuu e o ma le sui lea e resitala? O le pulenuu i Leauvaa i le mea e fai ai le monotaga po o le pulenuu i Samalaeulu i le mea e leai se monotaga? O lona uiga la a omai le pulenuu foi lea mai Samalaeulu e omai e resitala, mataulia foi pepa lea lau Afioga i le Fofoga Fetalai, o lau tautoga lena. O lona uiga o le a pepelo le pulenuu

ma matai ia e omai e molimau le sui lea? O le mea lea lau Afioga o lea ou te tau faamalamalama atu.

**Afioga Hon Faaolesa Katopau T. Ainuu:** Lau Afioga i le Fofoga Fetalai...

**FOFOGA FETALAI:** Tulai mai le Minisita.

**Afioga PESETA VAIFOU TEVAGAENA:** Ae manaia lava le Tulafono lau Afioga i le Fofoga Fetalai, a fia alu lava le tagata i Savaii, alu e fai le matai i Savaii, fai le matai i Savaii, leaga e eseese osiganuu a Leauvaa ma matou i Savaii. E pei o le agaga lena o lea ou te tau faamatala atu lau Afioga, o lea e fetau le Tulafono i Nofoa ia Tu Taulaga, leaga o lea ua faatolu ona fai i ai suiga, o la e fetau lau Afioga.

**FOFOGA FETALAI:** O lea ua manino lou finagalo, se i tulai mai le Minisita se i tau faapupula atili, aua o lata foi lena faalogo ananafi, e ese le manaia o le faamalamalama e le Komesina o Faiga Palota ae faapea foi le Afioga i le Tamaitai Loia Sili, ua atili ai foi ona pei a nunumi atu ai ma lau channel ia i lou le malamalama. Se i tulai mai le Minisita.

**Afioga Hon Faaolesa Katopau T. Ainuu:** E pei o le mea lea e confuse ai le sui usufono faapea a au ua uma faamalamalama a ua le iloa po o le a le isi faamalamalama, e tatau lava ona i ai sou matai i Leauvaa po o Samalaeulu ona mafai lea ona faaaogaina le monotaga mai Leauvaa po o Samalaeulu. Mo le faataitaiga lea e te aumaia, e tatau ona i ai sou matai i Samalaeulu, ae o le matai lena e le atoa tausaga e 3 o le monotaga, lea la e mafai ai ona faaaogaina le monotaga mai lou matai i Leauvaa e mafai ona faaatoa ai ma e agavaa ai lea i lou matai lea e te alu ai. Ae na o le pau foi lenei o le palota e mafai ai ona faatino lena fuafuaga, e uma loa maea. Ma ua sao uma tatou itumalo.

**FOFOGA FETALAI:** Ioe. Tau tuutiitia lou fefe i le sui lena e te lua tauva ae faamalamalama lelei le mataupu lea aua e mamao lava lou malo mai. Ia, se i... po o lena ua e...

**Afioga PESETA VAIFOU TEVAGAENA:** Lau Afioga i le Minisita, leai e pei o le vaega lena. Silasila foi lau Afioga, afai o au lea e alu atu i Leauvaa o le a alu i o i Savaii e leai se monotaga i Savaii ae o lea o le a ou alu atu ma le monotaga lea e fai i Leauvaa ou te alu ai i Savaii, o lea la o le a sau le pulenuu o Samalaeulu ma matai Samalaeulu e aumai au i i e resitala e alu, o le a la le fua i lea mea? Ona aumai loa lea o le form lea e aumai i inei, o lau tautoga lena. O lona uiga e tauto pepelo le pulenuu? E tauto le pulenuu, e le

malamalama le pulenuu lea e omai e aumai le sui leaga o le monotaga lea e fai i Leauvaa.

O le agaga lena o lea e tau avatu lau Afioga.

**Afioga Hon Faaolesa Katopau T. Ainuu:** Lau Afioga i le Fofoga Fetalai, leai, o le pulenuu o le nuu lea e i ai le monotaga e tatau ona faamaonia. E le mafai ona alu atu le pulenuu lea e i i po o Leauvaa e le mafai ona... e tatau lava ona sau le pulenuu o le nuu lea e faaoga mai le monotaga, lea e atoa ai lau monotaga. O le faataitaiga la a faapea mai o Leauvaa ma Samalaeulu, a faapea e te fia alu i Samalaeulu, ae e le atoa lau monotaga i Samalaeulu i se igoa matai o lo o i ai, e mafai ona e faaogaina lau monotaga lea i lou igoa matai lea i Leauvaa e faatoa ai lau monotaga i Samalaeulu. A o le monotaga foi lea, e faamaonia e le pulenuu a Leauvaa ae le faamaonia e le pulenuu a Samalaeulu.

**FOFOGA FETALAI:** Se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, leaga o lau Minisita Lagolago i te i foi ua faitio mai se isi. Masalo o le mea lea o lea e misi atoa e lau Minisita Lagolago ona o le tele o taimi e fai ai la faamasinoga ma Laauli, o le mea, o lea e le i pasia le Tulafono. O lea e tasi lava le itumalo. O lena e tasi lava le faipule, e sao au? O i ma o. O i i Leauvaa ma o i le mea lea e finau ai, o Samalaeulu. O la e la e tasi lava le itumalo. I le taimi nei la, e leai se mea e popole ai fua i lena mea, o la e tasi le itumalo. O lea la ua uma ona faasilasila mai e faaoga lava le monotaga, leaga o le monotaga lava i i o le monotaga lava lena i o i le tulaga o lea e tasi le itumalo. A o lea la o le a lua itumalo, seiloga lava la e pasi ona faatoa lua loa lea o itumalo, ia, faatoa aai loa lea o kia o le Tulafono, a o lea lava e tasi.

O le ala lena pei na o le pau lea o le faiga e fetuutuunai ai o le tofa fetalai lea e fai ai.

**Tofa Olo Fiti Afoa Vaai:** Lau Afioga i le Fofoga Fetalai, na o si mea lea faamolemole lau Afioga o le mea e fia faasao. O le Tulafono ua uma ona pasi i le vaevaeina o itumalo, ae le i faapea e le i pasia.

**FOFOGA FETALAI:** Malie, o le tulai mai o le Palemia o le faasaoga o le... a o lea o le a e faamisa ese ai fua oe ia. Se i vaai i lou faamisa, ioe. Ae... se i fai ma... se i tulai mai lava le sui usufono mamalu mo Faasaleleaga Nu.4.

**Afioga PESETA VAIFOU TEVAGAENA:** Lau Afioga, masalo o lea ua avatu se lagona o lou nei sui usufono, aua ou te talitonu o lea lava e lava le



taimi e toe silasila i ai lau Afioga ma le Matagaluega. Aua o lea e te saunoa mai e mafai la ona sau le pulenuu o Leauvaa e ave le sui e sau mai Savaii. Ua e iloa foi la e le fetau aua e ese le sui o Leauvaa ese le sui o Savaii. Ae na ona tuu atu i ina lau Afioga se talosaga, afai lava e i ai le tagata iinei e fia alu i le nofoa i Savaii, alu e matai i Savaii ma fai lana monotaga i Savaii. Ua fetau lea lau Afioga.

Ia ma lou faaaloalo lava.

**FOFOGA FETALAI:** Malo faafetai. Ia, tulai mai le sui usufono mo Gagaemauga Nu.2.

**Tofa Hon FAASOOTAULOA PATI TAULAPAPA (Gagaemauga Nu.2):** Lau Afioga i le Fofoga Fetalai, o au ua matua numi sau atoa lou mafaufau i le Tulafono lenei. O lea lava na ou malamalama i le Tulafono, a o le mea lea ua ou vaai atu i ai, ua matuai ou le... o lea lava sa ou nofonofono lava ma ou mafaufau i le Tulafono lenei, a o lenei foi ua toe lagalaga mai. O le mea lea e pei ou te mafaufau agai i ai, o le upu lea faapea, o le Tulafono o Faiga palota, ae le o se Itumalo mavae. O le mea lea ua ou mafaufau agai i ai, o lou itumalo e le o se itumalo faipalota, o le itumalo mavae. O lea foi la ua feteenai nei mea ia e lua i le Tulafono lea pei ona faaali e le sui usufono lea ia Peseta, o lea lava ou te tumau i lau mau lea e fai ona ua sui le Faavae, o lea e aafia le Tulafono lenei i le Faavae...

**FOFOGA FETALAI:** Ou te faamalulu atu i le sui usufono mamalu, ona o lea e pei a foliga o le a toe toso foi i tua lou finagalo i le Tulafono...

**Tofa Hon FAASOOTAULOA PATI TAULAPAPA:** Leai ou te le o fai atu faapea o... o lea ou te fai atu o le mea lea ou te fai atu ai, o lea e aafia le mataupu lea ou te fai atu ai i le faavae. O lou itumalo o le itumalo faavae.

**FOFOGA FETALAI:** O le tulaga lava lena o lo o i ai e le i aveesea.

**Tofa Hon FAASOOTAULOA PATI TAULAPAPA:** A o lea ua aveese le itumalo faavae lea i... lea ua avatu isi itumalo...

**FOFOGA FETALAI:** Leai o lea e liliu faa-palota i le mea e palota ai, ae a faatino lava le tulaga faaleaganuu ia, e le mafai ona aveesea, o Samoa ua uma ona tofi.

**Tofa Hon FAASOOTAULOA PATI TAULAPAPA:** Ia o mea ia faatoa fai nei, a o Samoa ua uma ona tofi mai lava le amataga, a o mea nei o mea lea faatoa fai nei. O le ala lea o lou tulai atu, o le Faavae lea o Samoa lea na fai lea ua tatou lote ai nei le Faavae lea ua fesui ai itumalo.

**FOFOGA FETALAI:** Malo faafetai. O lea ua tulai mai le Palemia se i...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai ou te fia tulai atu lava i se mea lea e fia faamalamalama atili, na matua malamalama lelei lava i le aso ananafi. O le mafuaaga lea o lea tatou te fono ai i le aso, o le faamaninoga o monotaga ia. A pasi loa la le mea lea, ona faaoga loa lea o le tulaga lea, leaga o lea o lo o tatou i ai i le taimi lenei o lea e tasi le faipule e kava uma ai itumalo, itumalo i le alu atu lava i Leauvaa e tau i o. O lea la e tasi. A uma loa la le Nofoaiga lenei ona tatou agai loa lea e faatino le Tulafono o le a eseese ai. O le tulaga la lena o lea e mafua ai le monotaga lea, ae faigofie lava. Ma e le mafai... e sao le mea lea e saunoa ai le sui usufono i nisi Paeaiga o i luma, ae na o le Paeaiga lava lenei o lea e faatino ai le mea lea, ina ia faaoga le ituaiga monotaga lea e fai i i e faaoga i Savaii ona o lea lava e tasi le tatou Paeaiga lenei. Ia, a uma loa le Paeaiga lenei ona faigofie lava lea ma sologa lelei le mataupu.

A o le tulaga lea e tulai mai ai le sui usufono mo Saleaula, ua uma ona tatou savalia le tulaga lena, ma tatou aloina le ogasami lena, o lea foi ua taoto Tulafono i le vaevaeina lea o itumalo ina ia faatino ai le agaga lea e agaga i ai le tatou faigamalo e fofo le mataupu lea, le faafitauli lea na faafeagai ma tatou Palemene mai lava i le 1962, i le tau faasoasoata tatauina o tofi o itumalo ma le faitauaofai o tagata, lea sa fai ai e faigamalo ua tuanai e tau mai lava i suiga ia a o le i faia suiga ia, ua 2 sui o isi itumalo ae tasi isi itumalo.

O le tulaga la lena o le tau fofoina o le mataupu lenei na taoto mai lava i le 1962, lea faatoa faataoto le fofo tumau, ona le toe pisa ai lea i le mea lea o le tai 2 o sui usufono o isi itumalo, 2 palota a tagata palota i le isi itumalo, ae oo mai i le isi itumalo, e tasi le sui, tasi foi le tagata tasi lana palota. O se faiga la lea e fofo ai le gasegase lea ua leva ona faafeagai ma le Maota lenei, na ou sau lava i le Maota lenei o faafeagai lava ma finauga ia e fai e tatau ona toe faaopopo se matou 2. Na o mea e tupu ai le fenumiai. O lea la, o mea nei o faiga palota, e le o ni mea a tatou, o mea mai fafo. Ma o le fofo foi e fai e fafo i ituaiga temokarasi, o le fofo foi lena e tatau ona fofo ai le mataupu lea. Aua e matua le mafai lava i se isi ituaiga fofo ona fofo ai. Ia ua faafia ona fai Komisi Suesue e tau fofo le mea lea, o le tau fua faalaugatasia o le aofai o le toatele o tagata, ma sui usufono e avea ma sui i totonu o le Maota lenei. Ua uma ona alo le tatou vaa i le itu lena lea na tetee i ai Laauli, a o le taimi na taoto ai le mataupu i totonu, na matua io fiafia Laauli. Ae ina ua alu ese loa ma le Vaega lenei, ia ona toe palota foi lea e tetee i le mataupu lea, lea la e tulai mai ai le sui usufono o Saleaula e lagalaga pea le mataupu lenei, a o lena ua uma ona faamaioio ma faamalamalama i totonu o le Maota lenei.

**FOFOGA FETALAI:** Malo faafetai. Ia, Laauli.

**Susuga Hon Laauli Polataivao Leuatea:** Ioe lau Afioga ma le agaga faaaloalo, se ta te tatalo atu lava o lea e tapuai le atunuu. Se paga lava lea, o lea foi ua toe fai mai le isi faaoloataua. Ou te le i ioe, na ou leai i totonu o le Palemene.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o le mea e fia faasao.

**Susuga Hon Laauli Polataivao Leuatea:** Ioe, o le agaga lena o lea e faamalamalama. O le faamaoniga o lau leai, na faatino i lou palota tetee i le Tulafono lea faamolemole. O le finagalo lena o lau leai faamolemole.

**FOFOGA FETALAI:** Ia, taatia ai faapea lea mataupu. Se i saunoa mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** O le mea lea e fia faasao, na ioe i totonu o le Kapeneta a o Minisita o Faatoaga. Ou te le taofia lava lana ioe mulimuli i totonu o le Palemene, a o aga na faa-Kapeneta o le taupulega, e te io loa i se mea ua uma, ae a e tetee, faamavae. A e tetee i se mataupu, faamavae mai ma lou tofi i totonu o le Kapeneta. O lea ou te talanoa atu, o la e sao Laauli i totonu o le Palemene, a o lea ou te talanoa atu i totonu o le Kapeneta.

**FOFOGA FETALAI:** Malo. Ia, malie Laauli ou te faamalie atu... Ou te faamalie atu, o lea e manino auofala, o lea e ioe le Palemia i lou finagalo, sa e tetee i tua i le tatou fonotaga faa-Palemene, ae o lo outou taimi foi o e avea foi ma se tasi o aao taumatau o le Kapeneta, ia e faapena sa outou felafoai ai ma faamaopopo ma maua ai le autasiga i le tulaga o lenei Tulafono. Ua ou manatu, leaga e le tuumamaina, e te tulai mai tu atu le Malo, tulai mai tu atu le Malo, ia o le a matou nofonofa ae fai la oulua ae matou nofonofa. O le mea la lea o lea e mafua ai ona ou fai atu, malie, se malie ia, o le toa e pule i le loto, ioe, e iloga lava le toa e pule i le loto.

**Susuga Hon Laauli Polataivao Leuatea:** Ia, o le a faia lou finagalo Toleafoa.

**FOFOGA FETALAI:** Faafetai.

**Susuga Hon Laauli Polataivao Leuatea:** O le a faia lou finagalo, o le a ou pule i lou loto, ae sese le mea lea e saunoa i ai le Palemia.

**FOFOGA FETALAI:** Ia, o le a taoto ai ia faapea, aua e le mafai ona le tulai atu foi le Palemia e faasao. E pei o le tulaga lena, ua fia faagasolo le tatou galuega.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaioi:** Lau Afioga i le Fofoga Fetalai, ia o lea foi o le a ou pulea lou loto ma ou faamagalo atu ia Laauli. Ae i le 4 vaiaso talu ai, sa ou faasilasila mai ai le Pepa a le Kapeneta, o lea e saofai ai Laauli na fai ai le iuga i le mataupu tonu lava lea. Ou te le o talanoa la i ni mea sese, o lea ou te talanoa atu i mea amiotonu. Sa ou faasilasila mai i le TV ona o le tetee lava lea e fai. O la e ou te nofonofa ma pepa faamaoni o mea sa fai.

**FOFOGA FETALAI:** Malo faafetai. Ia e i ai le manatu...

**Susuga Hon Laauli Polataivao Leuatea:** Ioe lau Afioga...

**FOFOGA FETALAI:** Se malie Laauli, se Laauli e, se ia e malie, o le a la le tonu? E faapena, ioe. E i ai le taimi, e faapena, e ave foi le faaaloalo i le isi taimi, ioe, i le tulai mai foi o le Taitai o le Malo. E faapena, afai lava e le atoa lou finagalo e te malie i le mea o lo o tulai mai, ia, e faapena, o la e tapuai mai le atunuu ma fai mai le latou faaiuga. Ioe. Ae le faapea o le a finau lava ina ia... E faapena se lagona, ioe, se o le tatou aganuu e faapena, e faavae i le faaaloalo ae salani i le alofa, e faapena. Malie Faasoo, se ua e faatupu vevesi se. Ia o le a e toe foi i tua, malie ia ua lava lena lauga o mea foi sa e lauga ai muamua o lea foi o le a e toe asa ai foi i tua... Se malie ia lou finagalo.

**Tofa Hon Faasootauloa Pati Taulapapa:** Leai, leaga e ese Leauvaa ese matou. O matou e lua nuu, o Saleaula ma Salamumu lea matou te i ai. O anapo na vili mai ai le tamaloa o le matou nuu e fia palota atu i Savaii ma lana fanau. Ou fai atu, o lena lava e palota matai. Ae fai mai o lana fanau e fia palota. O le mea lea lea ua ou tu atu ai i le tulaga lea faapalota ma le tulaga o nuu mavae. O lea ou te talanoa atu ai, e tatau foi ona tau fuafua faapena le tatou... e le faapea na fai nuu palota na fai i ni fuainumera, na tatou omai lava o fai palota o i ai, o Saleaula lava lea na i ai, e le i faia i ni fuainumera ni itumalo. Ia ua lelei, ae na ona ou fai atu leaga o la e faalogologo mai lou itumalo i te i foi ua ou toe alu i le palota.

**FOFOGA FETALAI:** Ia, malo. Faafetai. Se alofa ia, o lea lava o le a tatou toe o i tua. Malo. Se o le mea lena e i ai oe, o le a malolo manumalo e tai pei lava o le faalupega o le faifeau Toeaina. Ia, o Faasootauloa Pati ua

malolo manumalo. Ioe. Ia se i tagai i ai. Ae leaga le alu atu e malolo manumalo faamisa. Ia, se i tulai mai...

**Tofa Hon Faasootauloa Pati Taulapapa:** Faafetai tele lava lau Afioga i le Fofoga Fetalai, o le a ou malolo.

**FOFOGA FETALAI:** Faafetai. Ia faatasi le Atua ma oe.

Ia, se i tulai mai le sui usufono mo... Faapea e te le fia saunoa o lea ua... o ananafi na maea lelei... ae ui i lea, ua ou iloa ai e le umi sau saunoaga.

Ia, tulai mai le sui usufono mo Faleata Sisifo.

**Tofa LEALAI PULE RIMONI AIAFI (Faleata Sisifo):** Ioe. Faafetai i lau Afioga. E le nofonofoai foi, e tatau ona fai se manatu o lenei itumalo i lenei Tulafono Tau Faaofi. Afai foi ua tatou toe fono faapitoa i lenei Tulafono Tau Faaofi, ia ua sala ina tatou fono ona e i ai fesuiaiga e tatau ma talafeagai e tatau ona fai.

Ae muamua ona avatu lau faamalo i lau Afioga Laauli mo le toe nofoia o le nofoa o le itumalo. Malo le finau.

O suiga ua aumai nei i le Tulafono Tau Faaofi lau Afioga, ua talafeagai, aua a tatou tilotilo ma matau i le fesuiaiga o upufai i totonu o Samoa, o lo o sui pea mai lea taimi i lea taimi, e le mafai ona tatou faatumauiina ni faiga faavae, ae tatau ona fesuisuiaia o i ai le siosiomaga o tatou ola ai mai lea taimi i lea taimi.

E pei la ona i ai lenei suiga tele, o lea o le a tatou faamutaina nei nofoa nei sui tu taulaga ma aveese ai e tusa o le tatou Faavae sui nei na amata mai i sui tutoatasi, na amata mai o tovalu mai le amataga, faalaitiiti mai lava seia oo ina toalua, fai le tatou Paeaiga talu ai faamatai uma le Palemene o Samoa, o lea la ua oo mai i lenei Paeaiga, o lea la ua tatou pasiaina e tatou o le Palemene ina ia faamuta loa nofoa nei. E le o se mafaufauga la na fau ananafi po o talatu ananafi lau Afioga, ua leva ona foufou mai ma taumafai mai lenei faiga. Ma e mai lava i le Paeaiga talu ai, sa i ai le manatu, ua tapena uma tagata e fia o i nofoa nei o le taulaga i le tulaga lea. O lea na faamanino lava talu ai vaega ia, lea e aafia ai foi lou itumalo.

O suiga foi o tuaoi, ou te talitonu, e le gata i i, aua foi tatou te tilotilo pea ma matau le femeiaiga o tagata aemaise lava i totonu o le taulaga, aua e le o se mea talafeagai le taofiofi pea o numera i i i le taulaga, a ua faatupulaia, faaluaina, faatoluina tagata e o i le palota. Ina ua ou sau i totonu o le Palemene o le a ou taumafai ou te sau i totonu o upufai, na o le 700 le lola a Faleata. E oo mai i le palota lona lua, ua 5,000, e oo mai i le palota na uma atu nei, ua ova i le 6,000. O faiga la ia o lea e ala ai ona foufou e le Malo fuafuaga faapenei. Afai foi la ua i ai ni fesuiaiga i le mea lava foi lea ua misi i le vaai, e tatau ona tatou onosaia, a o le mea faafetai, o lea ua aumai le Tulafono e sui ai. O le upu lea e faapea mai e fai e le Malo Tulafono ina ia

pui-pui ai o latou sui faipule, o se upu tuulafoai ma le talafeagai. Ina ua fai suiga talu ai e vaelua nofoa foi ia sa tailua sui palota, na tele sui usufono o le vaega lenei, na toe tauva lava latou. Na iu ina le toe omai isi.

O le fesuaiga lea e i ai nei, o lea foi e i ai isi sui o le Vaega lenei o la e toe tauva latou. O i ina e atagia ai, a finagalo le Malo e fai suiga ina ia talafeagai ina ia atagia ai mea e tataua ona fai, e tataua lava ona fai. E le faia faaituau ni mea.

Ma o le Temokalasi, e leai se faiga Faa-Temokalasi e fetau lelei ma Samoa po o se isi atunuu o le lalolagi. E ese le Temokalasi a Samoa, ese le Temokalasi a Fiti, ese le Temokalasi a Niu Sila, Ausetalia, Amerika. E eseese uma lava faiga, ona fai lea e le atunuu, o se faiga e talafeagai ma mautu ai ia ana Faigamalo.

Ia ua o tatou vaai nei i le mea lea e tupu i Niu Sila. E ave atoa e ese le faiga o le latou Faiga Palota e faaoga le mea foi lea o le MMP, e ave ai ia le malosiaga i tamai pati laiti. O fea se mea e malo mai le isi pati, ae Palemia le isi o le isi pati.

O Ausetalia, e faalima ona sui ia latou Palemia i le 2 tausaga. O mea la na e ala ai ona pui-pui i ai ia lo tatou Malo, Faigamalo ina ia taofia ia Faigamalo lelei. O Faigamalo mautu lelei, e i ai mea e tau o P e 3, e o faatasi lava ma le mea lenei. Political Stability, Peace and Prosperity. E le mafai lava ona alo ese ai.

O le mea la lena lau Afioga, e tataua ona tatou ave ai ia le faafetai i nei suiga ua i ai. O le fesuaiga o le political development i faiga upufai i totonu o Samoa, e i ai fesuaiga nei. Ae e i ai nai mataupu ia lau Afioga, o le mea e tataua ona tilotilo o mea laiti. E tataua ona tilotilo i faatinoga o palota, leaga o tatou lea o i ai le tomai, ua i ai le experience foi lea, le iloa i nei mea o faatinoga o palota.

O lea la e ta te tau tuualalo i le Afioga i le Minisita ma le Matagaluega, e fetuutuunai e latou, fetuutuunai e latou mea e talafeagai aemaise i aso e faatino ai le palota. O suiga na e tataua ona toe tagai i ai, aua e moni lava o lea ua... ae o lea e lava le taimi e tataua ona toe fetuunai ai ae e le i faatinoina ia le faiga palota.

Lau Afioga o le vaega lea, lea na avatu ai foi se manatu leaga e tataua ona sui ia le Tulafono, pe afai o lena, o vaega ia e... o le faiga o palota, e fesoasoani tatou i le process, i le faatinoga o le palota, sui tauva. Faafetai o lea ua sui mai i le lesitala, lea sa compulsory ai le lesitala, lea ua faatutusa lelei ma le palota. Aua o le mea sa i ai, sa tigaina tatou e lau mai e faalesitala, ia ae oo i le palota e pule lava le tagata ia. Ae e le alu atu e piki mai, e le sau. E eseese atunuu, e eseese foi faalogona o tagata. Leaga o lo tatou atunuu e faapena foi ia o tatou uiga, uiga o tatou tagata, a tatou le o e aumai, e le fia omai. E tatou te fiatagata uma lava. Ae faafetai la o lea ua i ai le vaega lea, leaga o le palota o le mea e taua. E fai sou sao ma sou leo i le atunuu.

Ma e o le faiga foi o le tatou Temokalasi, e ala la ona tulaga ese ia le tatou Temokalasi i atunuu uma o le lalolagi, o tatou e ave le faamuamua i le kerisiano ma le aganuu. E ta aofai mea nei i le tatou Temokalasi. A fai tulafono a isi atunuu, e le aofia ai fua talitonuga faalelotu. Ao tatou, a fai le Tulafono a Samoa, ia e mautinoa ia fetuunai ma talitonuga faalelotu, ia aemaise le tatou aganuu.

**FOFOGA FETALAI:** Toe 2 minute o le sui usufono...

**Tofa LEALAILEPULE RIMONI AIAFI:** Faafetai lava, e toe 1 le minute uma loa. O le mea la lea, lea e faamamafa mai ai le monotaga, ia e faafetai, leaga o le igoa o le tamaloa lea e sau ai nei, o Lealailepule o le tautua. Ioe, se o le mea se i fai ia se tatou tautua. Ma e leai lava se Samoa e loaloa vale. O lenei foi mea o le monotaga faalelotu, e le o se monotaga o le tautua faalelotu. Na tatou faaaogaina lava i le Paeaiga na tea nei faatoa faaaoga lava lea i totonu o le tatou Tulafono, ina ia agavaa ai ia sui ia i le taulaga. O lea la ua le toe i ai nei, ae o lea ua faaaoga le tautua lea, leaga e talafeagai, o tatou uma lava e fai nuu. O mai e fai ia le tatou Malo ia lelei. Ia ia iloa, e puiyai ai foi i le 3 tausaga lea, tagata foi lea e fealuai ae sau e fia alu, ma le tagata e sau ma le miliona sau loa alu, ae ua leva ona tautua nai isi tagata.

Ae o le mea la lea lau Afioga i le... e oo foi i le aso o le palota, i le lauga o tagata palota, e tataua ona toe tilotilo i ai lau Afioga i le Minisita. Se o tagata ia o tatou ua popoto le atunuu. Pule lava le tagata i le mea e palota i ai. E i ai... fesoasoani i le process lea a outou, ia toatele ia tagata e mafai ona palota i le aso lea. E oo foi i le taimi lenei, i le faiga o le lesitala, ia finagalo malie, sa tuli lou afafine o upu moni lea na ou fai atu ai ananafi i le tatou fonu, alu e fai sana lesitala faatoa foi mai i fafo. E alu au ae fai mai, e le toe talia ia ni tusi a ni Pulenuu, tele tele faafitauli i tusi a le Pulenuu. O le mea lea lau Afioga, afai o i ai se Pulenuu o faaletonu, ia o le mea lena a le tou Matagaluega e fai, molia, ae aua le taoafaiina i Pulenuu uma o Samoa ma Pulenuu o la e faamaoni.

E tataua ona tagai uma i nai mea ia, e fesoasoani i le tou galuega. A i ai ni tagata ua tuai na lesitala, tatala ina ia toe o atu e lesitala ina ia lava tou galuega, fesoasoani ia outou. E le se... o le mea la lea lau Afioga,

**Tofa OLO FITI AFOA VAAI:** Lau Afioga i le Fofoga Fetalai o le.....

**FOFOGA FETALAI:** Maea le taimi o le sui usufono.

**Tofa Olo Fiti Afoa Vaai:** Leai lau Afioga o le Pulenuu. O lea e i ai le sui lea e tuli ma le Pulenuu o le latou nuu i Vaitele. O la e fia alu i le palota, ia le sui usufono o Faleata.

**Tofa LEALAILEPULE RIMONI AIAFI:** Ia faafetai, le sui o le FAST, aua le taofiina le tama. Se faaalu, faaalu e faaeleelea pepa palota. Se faaosoni sui feoloolo. Ia a le sainia e le Pulenuu le pepa a le tama lea Olo, aumai e saina e Leala.

Ia lau Afioga i le Fofoga o le Fono, ia o nai motugaafa na, tatou te fesoasoani... ma o lea foi e faafofoga lau Afioga, se e leai lava se manatu o lenei itumalo ma itumalo uma nei e oti i tua. O lea e omai e faaali atu. We are all free, manuia le Fono.

**FOFOGA FETALAI:** Faafetai, fai fuafua lau saunoaga o lena toeitiiti lavea le isi sui usufono i ou aao. Ioe, malo saunoa.

**Tofa OLO FITI AFOA VAAI:** Lau Afioga i le Fofoga Fetalai...

**FOFOGA FETALAI:** Ia, tulai mai le sui usufono o Salega Sasae.

**Tofa OLO FITI AFOA VAAI:** Faafetai, faafetai i lau Afioga i le Fofoga Fetalai, ia e le umi foi so matou manatu. A ua malamalama foi i nisi vaega o le tatou Tulafono, ia e faamalieleina le itumalo nei i le tele o vaega o le Tulafono ae na o ni nai vaega laiti lava ia e avatu ai nai motugaafa e na ona faatupu manatu. Ia ma se i tau fai ai ia se tatou Tulafono foi lea e le o o ma avatu i tua o tama foi ia ua matua maonaona lelei ia le tino o le Tulafono.

E agai ia se matou faamatalaga lau Afioga i le Fofoga Fetalai i nisi o vaega o le tatou Faavae. E le gata la i le malupuipua o aiataaui a tagatanuu o Samoa i soo se mea i totonu o lenei atunuu, ia ae faapena foi ia le saolotoga mai i le faailoga tagata. O lo o maioio mai lava vaega na i totonu o le Tulafono Faavae o le tatou atunuu. O se faaitaiga, a faapea e tuua e le tagata lotu lea lana ekalesia ae fia faatasi atu i se isi ekalesia, e matuai free lava le agai o lena tagata ona o le tulaga o le aiataaui ia ma le leai o se faailoga tagata.

E i ai la le manatu ia te au, e faapena foi ona i ai le tulaga lea i totonu o sui usufono i Vaega Faaupufai. O le tuua o le Vaega Faaupufai ae faatasi atu i le isi Vaega Faaupufai. E leiloa po o lea ou te fia alu atu i le HRPP ae o lea ua loka au i i. Silasila lau Afioga i le Fofoga Fetalai o le tulaga lena o lea ou te tau talanoa atu ai, i vaega ia e 2 o le Tulafono Faavae o le Malo Tutoatasi o Samoa.

Ia o le faaitaiga muamua, lea na saunoa le Afioga i le Minisita, o le taimi lenei o lea e agai atu i le tatou Faiga Palota ua vaevae itumalo i Itumalo Faa-palota. Ua see ese ma Itumalo Faa-alalafaga. Ae a oo loa ina filifili sui e tauva i le Palota, ona toe see loa lea i le Faa-alalafaga po o le Faa-aganuu. O le a avatu ia le faaitaiga lau Afioga i le Fofoga Fetalai ma le mamalu o le Maota i le itumalo o Leala, Vaitele Tai, Vaitele Uta, Vaitele Fou. O le itumalo lena na filifili faa-palota, ae filifili mai sui na o Vaitele Tai ona e



faapea mai o le nuu mavae. O lea la e afio mai ai Leala. A o Vaitele Fou ma Vaitele Uta, e uma le olaga nei, e le oo i se tofi tauva mai i i le Palemene.

I le agaga lena o lea e tau avatu ai sou lagona vaivai lau Afioga, e faailoga tagata le tulaga lena...

**Tofa Lealailepule Rimoni Aiafi:** Lau Afioga i le Fofoga o le Fono leaga o lea e taua lou itumalo...

**FOFOGA FETALAI:** Ia malie le sui usufono...se i tulai mai le faauilavea a Faleata.

**Tofa Lealailepule Rimoni Aiafi:** E pei ona ou talanoa atu lau Afioga, o le tatou fuafuaga lea e i ai nei, e le o se fuafuaga fou. Ua leva ona faataatia mai. Ina ua ou lauga i le vaevaega o tuaoi talu ai, na ou tatalo ai i se nofoa i le vaevaega lea, sa i ai lau upu faapea sa fai, o le afifio mai o le atunuu i Vaitele, e le o se finagalo o lenei afioaga. O fuafuaga tuutuu mamao a le Malo. E pei ona ou taua i lau lauga lea na fai nei, o palota o le Faigamalo a Samoa, muamua faakerisiano ma lana aganuu.

O nai matai ia o latou ia ua afifio ma papaaao nei i Vaitele, o la e tatala avanoa e o ai e tauva i o latou sui o la e fai ia o latou monotaga. Aua foi o la e fai ia latou monotaga i le faiganuu a Vaitele. Ae o lau fesili la ia Olo, o le a sou silafia? o le a sou faalogona? Ae alu atu ia Lealailepule nofo i lou itumalo alu ai i le palota? E manaia? Leaga o lea ua e pei ua e faavasega ua na o i i Vaitele, ae faafefea nuu uma o le taulaga? Ma isi nuu uma o Samoa? Aua a tatala loa le avanoa lea, po o fea lava e nofo ai le matai, e tatau foi la ona alu o le sui tauva.

Ae manatua, auga atoa o le suiga o le Tulafono lea e aumai o le monotaga. O le mea e fai lau monotaga, ia e tatou te le o faailoga tagata la, leaga foi o la e tatala le avanoa e o e palota ai pe a matai. A le matai... ia manatua foi, ia o lea ua omai, well.. opogi lelei e matou. Ia o lea omai avatu, avatu eleele avatu ma tofi ae faafefea nai tagata, fai atu ai foi. Faafefea matou nei?

O Olo, e na o le 2 lava fale e ma te va ai. E tu ai nei le tootoo e tuli ese.

**FOFOGA FETALAI:** Malo... Tulai mai lava ia le Minisita. O lona uiga Lealailepule o Olo e nofo i i i Vaitele.

**Tofa Lealailepule Rimoni Aiafi:** Lau Afioga o la e nofo i lalo o lau faamalumaluga. Ae o lea ou te le malu ai.

**FOFOGA FETALAI:** Ia se i saunoa mai ia le Minisita.

**Afioga FAAOLESA KATOPAU T. AINUU:** E leai se faaituau o le faiga lea. Ua uma ona filifili ia lo tatou atunuu i le aganuu lea o le faiga o le matai.

E na o matai, e na o matai e fai i nuu mavae. E le fai se matai i Vaitele, e fai i nuu mavae. O le agaga tonu lea ua ala ai ona faapea ona fai le Tulafono. Ae e le faailoga lanu ia le Tulafono.

**FOFOGA FETALAI:** Malo, faafetai, ia se i tulai mai Olo e le o toe umi foi sou taimi.

**Tofa OLO FITI AFOA VAAI:** Faafetai, o lea ua faalogologo atu ua uma ona lesitala faaletulafono faiganuu a Vaitele Fou ma Vaitele Uta, e tusa ai ma aiaiga o le Tulafono lea na tufatufa atu ai a tatou kopi. Ia peitai, ou te faamalulu atu i le Afioga, se uso e le o se tulaga foi lea e pei ona saunoa mai ai ae na pau lava lau tilotilo e faailoga tagata le tulafono. O le mafuaaga o lou fai atu ona o lea na aumai i le tulafono e 2 mea e te palota ai. E palota i lou matai ma e palota i le mea e te nofo ai. O le mea la lea e tulai mai ia Vaitele Fou ma Vaitele Uta, e uma le olaga nei afio mai Iesu, e le oo latou i se mea e tau o le filifili mai o se sui tauva, e le oo mai i totonu o le palemene. O le uiga lena o lau faamatalaga ae na ona ou faataoto atu faapena ia se lagona. Ona ou oo mai lea i le isi tulafono, le isi teuteuga. A e tuua lau Vaega Faaupufai ua e toe alu e toe fai lau faiga palota ua le mafai ona avea oe ma se sui tutoatasi, ua le mafai ona e toe alu atu i se isi Vaega Faaupufai. O le a le mea lea e aliali mai i i? Ua aafia lau aiatatau a le tagatanuu tatou ia o sui usufono, e saoloto i ou lagona ma e tulai ese i se mea e te le fiafia i ai. O le isi vaega, aafia ia le saolotoga ma le aiatatau a le itumalo ma e sa filifiliina mai se sui usufono i i.

O le a le faasalaga lea e aumai nei? E tuli ese le itumalo mai i le Nofoa lea i totonu o le Palemene, pe a soli le Tulafono lena. O vaega na lau Afioga i le Fofoga Fetalai, o lea e taumolimoli atu ai ia se matou faamatalaga, ona o le ogaoga o tulaga o lo o aumai i le Tulafono lea.

**Afioga Hon Faaolesa Katopau T. Ainuu:** Lau Afioga...

**FOFOGA FETALAI:** Malie lau Afioga, se i tulai mai le Minisita.

**Afioga Hon Faaolesa Katopau T. Ainuu:** O le vaega lea o le Tulafono lea e saunoa i ai le sui usufono, o la e mulimulitai lava i le faatonuga la e sau i le Faavae. O le faatonuga la e sau i le Faavae o la e faapena lava le faiga o le... toetiiti lava mirror image o le o le wording la e i le Faavae lea ua tuu mai i le Teuteuga lea o le Tulafono. O lona uiga la a fai ni ai o le finagalo o le sui usufono mamalu mai i Salega, e sui le Faavae.

**FOFOGA FETALAI:** Ia, tulai mai le sui usufono.

**Tofa OLO FITI AFOA VAAI:** Lau Afioga i le Fofoga Fetalai, o le Minisita o le Loia. O lana Tusi Paia lea o le Faavae, Tusi Tulafono. Ae o lea e talanoa mai i le Faavae i lalo o le Vaega lea i le Faiga Palota. O le isi vaega lea ou te talanoa atu ai, vaega o le faailoga lanu, vaega o le aiatatau. E tele ia o vaega eseese na lau Afioga i le Minisita, e te silasila lelei i ai e fetuunai uma i ai ma e aiga ma fetuunai i ai mea o Tulafono.

Ui i lea, o le isi vaega lau Afioga i le Fofoga Fetalai lea ou te fia talanoa atu ai, o lea e maioio mai ia manaoga o le...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Ao le i see ese le...

**FOFOGA FETALAI:** Malie le sui usufono se i tulai mai ia le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O le mea e fia faasao. O le tulaga lea e saunoa ai i le faailoga lanu, i le itu lea ua e manao e te alu ese mai i se pati, e te alu e faatu se isi au pati. O le mea tonu lava lea sa ou talanoa ai i le taeao nei. E le tatau ona e faia se mea faapea o le faaoleole na i lou itumalo. E tatau lava ona e foi e fesili i lou itumalo.

Ia a palota mai oe, ia ona e toe sau lea o lea ua i ai le faamanuiaga a lou itumalo, ma e alu atu e fai atu i ai, folafola o au e alu i le SNDP. E malo mai ai lea, e sau e nofo i totonu o le SNDP peitai ua e le... ua i ai mea ua e manao e te saoloto. E te le toe fia usitai i Tulafono a le SNDP, e alu ese loa, la e fai mai le Tulafono o le mea e pito i amiotonu, ua tatau loa ona e toe foi i tua e fesili i lou itumalo, pe latou te talia ia le mea fou lea o le a e faia. Vaai la i ai i le faigofie. Ae o le tagata lava e mimilo, mimilo ina ia talitonu ia lana finau, ae o le faigofie ia.

E pau lava na o le mea lea e talanoa atu ai ia le Tulafono, o lona uiga, a e fia alu ese lava oe ua e saoloto, ona e alu lea e fai ia le mea lena e te manao i ai, ae ia e foi muamua i tua e te fesili i lou itumalo, ona o le mea la lena, e le o tulia oe. E le o tulia oe. O lena e fesoasoani le Tulafono, ina ia avea oe ma sui usufono faamaoni, faamaoni i lou itumalo, ae e le o lou sau e felafiai solo i i, ia ma fai le mea e te manao i ai. E ala la ona ou taua le mea lea, leaga ua i ai mea na tutupu, i totonu o nofoaiga. E le lelei mo le atunuu, aemaise o le vaavaai mai a atunuu i fafo, i se atunuu vevesi. E toe fia aumai ia ni a latou fesoasoani i ni atunuu vevesi? O le uso o vevesi, o le faaoga sese o a latou fesoasoani e aumai. E uso mea ia e lua.

O le ala la lena, e taua tele ai mea ia, o lou faamaoni i lau Vaega na e sau ai. E le gata la ina le omai ia ni fesoasoani, ae e matua mumusu ma latou, e fia fai ni atinae i Samoa, e maua ai ni galuega a o tatou tagata. Se i vaai i le faigofie. E le o se Tulafono la e faailoga lanu, ao le Tulafono ina ia avea ai

le sui usufono le faamaoni, ina ia faamaoni i lona itumalo. Toe foi, e toe fesili i le Faiga Palota.

O le upu foi faapea e foi atu ia le soalaupule, ia ua o tatou iloa lelei lava, Fonotaga e fai i luga o le vafealoaloai. Ae e tuu pea i le Faiga Palota o i ina e maua mai ai le tali. Ia ua vaai la i ai, a sau lava le tali, ua e toe foi mai, ua mama, se ua faamama oe ma le va ma lou itumalo. E pau lava lena o le mea lea e fai atu ai ia le Tulafono, e le o tulia oe, aua foi o la e ia te oe ia le tulaga o lou saolotoga. O lou saolotoga e faaauau ai lou nofo i i se i uma le Paeiga. O le mea lena o lea e fai mai ai le Tulafono, sole faamaoni. Ia nofo ai i ina i le atoaga o le 5 tausaga, ae e fia alu ese loa, ia o lea e sau ia le Faiga Palota ona i ai lea e tau ai i lou itumalo, ua ou fia alu ese, ona alu ese lea. Ae e le o taofia foi oe i lou alu ese i totonu o se pati, a e fia tulai lava oe tulai.

Ae e i ai la aiaiga lea e i ai, e tatau ona e toe foi i lou itumalo, e fai se Faiga Palota, se i toe saili, saili. Aumai ia le latou tofa, faigofie. Ae o lea ua e tulai mai o le Tulafono e faailoga lanu. E le o se faailoga lanu, o le Tulafono o le amiotonu, e faamiotonu ai, le sui usufono e le amiotonu.

**Tofa OLO FITI AFOA VAAI:** Ia, faafetai, manaia si faauilavea i le faalogologo.

**FOFOGA FETALAI:** Tulai mai le sui usufono o Salega.

**Tofa OLO FITI AFOA VAAI:** E eseese itumalo, e eseese foi le faiga o nuu. O isi itumalo o isi sui usufono, e folafola mea i o latou nuu ma o latou itumalo o au e alu i fea. O lou itumalo, e faatonu au i le mea ou te alu i ai. E i ai la le mea lea ou te tutoatasi ai nei. O le faatonuga lena ia te au, ia e alu e te tutoatasi. O lea foi la ua toe aumai ia le isi faatonuga, a oo i le isi Faiga Palota ona e alu lea i le FAST, ou fai atu ia faataatia la, se i uma lelei la le Paeiga ona ou alu lea i le FAST i le mea e te finagalo i ai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai...

**FOFOGA FETALAI:** Ia se i tulai mai le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O le mea e fia faasao, ua vaai la i ai mo le sui usufono e le amiotonu. Ua leva lava ona FAST, ae o la e faatali se i oo i le taimi e faaaloaia ai lana mea pio lea e fai, o le faaleiloga. Ia aemaise o le nofo ma faasau i nisi o le Vaega lea e tosina atu ai i o, o le matou Vaega lea. Ae a tu mai i luga o le TV, e matou te le o i ai i se Vaega, o lea matou te Tutoatasi. Ua vaai la ua oo lava i totonu o le Palemene. O la

e faafogafoga mai Samoa. Ua oo lava i totonu o le Palemene, o aumai ai upu faapea, e se sui usufono e le faamaoni.

Ia o le faamatalaga na o si au mea e fia faasao.

**Tofa OLO FITI AFOA VAAI:** E a, ua uma oe? Ia, faafetai. O le mea lava lea a... o na ua uma ona faamanino atu i lau Afioga i le Fofoga Fetalai, ma le mamalu o le Maota. E eseese ia itumalo. O le itumalo leni e le faia ia se loto o se sui tauva. E pule ia le itumalo.

Ou oo mai loa lea i le mea lea e mafua ai ia Tulafono ia. O le faapea mai e taofiofi ina ia stable e manaomia ia se Stable Government, lea na ou faalogologo ai ia Leala, e 1 le tausaga ua 2 Palemia a Ausetalia. Ia o le a le mea na oo i ai? O stable pe le o stable? O la e stable lava.

**Tofa Lealailepule Rimoni Aiafi:** Lau Afioga...

**Tofa OLO FITI AFOA VAAI:** O lona uiga, e le o faamaonia ia le ituaiga mau faapea se o le mea... Se o Samoa lea e tupu ai mea ia.

**FOFOGA FETALAI:** Ia o le a pule oulua po o ai o oulua e tulai mai. Ia pe a oulua alala mai uma i lalo se i fai atu sata tala. Ia se i tuu atu le avanoa i le Taitai o le Maota mo se lafo e faaauau ai ia le tatou galuega, aua o lea ua tatou manava. Ua maea ia le tatou taimi galulue. Se i tuu atu i le Malo.

## LAFO MO LE FAAUAUINA O ITULA FONO

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, ou te tulai atu ma le agaga faaaloalo ina ia faaauau taualumaga a lo tatou Fono i le aoauli nei, faamaea ona pasia ai ia Teuteuga o le Tulafono o Faiga Palota Nu.2. 2020, ona tolopo ai lea o Taulaumaga a le Fono Aoa.

Lau Afioga i le Fofoga Fetalai o lea ou te faapea atu o le aoauli nei, a le uma ona tatou faaauau pea se i oo taeao.

**FOFOGA FETALAI:** Malo, faafetai, ua faatuina mai le lafo ma ua faaluaina, ina ia faapena ona faaauau ia le tatou galuega seia maea ia le tatou Tulafono ona faitau faatolu.

*Faaluaina e le Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Pisinisi Alamanuia ma Leipa.*

*Na faamaonia le lafo.*

**FOFOGA FETALAI:** Ia se i tulai mai le... masalo faapuupuu mai le faauilavea Leala faamolemole.

**Tofa Lealailepule Rimoni Aiafi:** Ia o le ava atu i lau Afioga, leaga o lea e pei e maua finagalo o le sui usufono i lau lauga. E ao foi la ona ou talanoa i ai. Muamua o le mea lea o le palota, fai mai o le itumalo.

Lau Afioga, o le finagalo o le itumalo, e faaali i le taimi e fai ai lana palota. Ae o le sui ia e faaoga le mafaufau, e tau sao i le itumalo, o au ou te alu i i. Ou te alu i le... i le mea ou te talitonu i ai au. Ae o le filifiliga a le itumalo, faatoa fai le filifiliga a le itumalo i taimi e fai ai le Palota. O le mea la o le Palota a le itumalo, o lona faatoa iloa ia le finagalo o le itumalo.

Ae o le mea lea leaga o lea ua oo i le stability lea na ou talanoa ai lau Afioga, se onosai mai oe tama lau Afioga, leaga e taua vaega ia. Leaga o lea e faapea mai e na o Samoa e tupu ai. Muamua, o le atunuu lea o Sapani e tulagalua i le lalolagi, ua leva na... ova i le 50 tausaga o pulea e le Vaega Faaupufai e 1. Aisea? Lelei le faafoega o le atunuu. Fiu isi pati e lui e le maluelue.

Sa maua le avanoa e ma te fonu ai ma le tamaloa le Palemia o Vanuatu i le fonu na ou alu ai lua tausaga talu ai na tuli i ai au e lau Minisita. Ioe, ou alu atu loa uma ona tatala e le Palemia le fonu ma o loa i lona Ofisa ma talanoa loa. Na ma talanoa loa tonu lava i le mataupu lea o le stability, fai mai le tamaloa, e te iloa Leala, e ese le manaia o le tou Faigamalo. E te iloa le mea lea e tupu ia matou, ta te fefe e malaga. E ta te alu i le fonu faalogo mai i o ua sui ia le Faigamalo. Faafefea ona outou faia le mea lea? O lea ua mautu ai ma mausali ia le tou Faigamalo? Ia ona ou faamatala lea i ai. E pei lava o au na faia le Tulafono, aua foi sa ou aoga, faalua ona ou sikolasipi i Ausetalia lau Afioga. Ia o le isi lava au mataupu lea o mea tau polokiki.

**FOFOGA FETALAI:** Ia, o le faauilavea lea e te tulai mai ai...

**Tofa Lealailepule Rimoni Aiafi:** Leaga o lea ua, a e manao loa e faalautele, ia ua lava na mea, faafetai.

**Tofa OLO FITI AFOA VAAI:** O lea ua toe lauga ia le sui usufono o Faleata. Ia o le a ou le tapa ia ni faamaumauga i ni a la talanoaga ma le sui o Iapani po o le a le... ia o le a taatia ia faapea aua e le sao ia tala. Ae e pau lava le mea lea na ou talanoa atu ai, e na o tatou e faia ia le Tulafono lenei, o le sa ne i feafioai ia sui usufono mamalu, ae o isi o la e faataga lava ona e alu i le isi pito, ae o le stable ia o latou Faigamalo.

Ou oo mulimuli mai lava lea lau Afioga. O si au mataupu mulimuli lea, o mea ia o requirements ma manaoga o le Tulafono e agavaa ai i le Faiga Palota. I lau tilotilo lau Afioga i le Fofoga Fetalai, a..lea e manaomia, e te matai ua aumai lau pepa matai, faamaumauga mai i le Ofisa o Fanua ma

Suafa. O aso e te nofo ai, aumai lau passport e faamaonia ai. O monotaga, ua saina mai le Pulenuu. Ae e oo mai loa i le sitiseni, e leai se suesuega a le Matagaluega e faia i ai. Sitiseni lea e faamaonia ai o oe e te sitiseni Samoa.

O le mea la lea ou te fia talanoa atu i ai, leaga e i ai le isi sui lena sa alu, na sao atu lava i le Faiga Palota, ae e toe maua ifo lava, e le sitiseni. Oi e leai, e toe maua ifo lava, faatoa atoa ia le tausaga faatoa sitiseni. Ao le Tulafono lea i lou suafa matai ma lou monotaga, e tataua ona 3 tausaga. Ae manatua foi lau Afioga i le mea lena, e i ai lava le Tulafono foi lea seiloga e na o le tagata Samoa e matai. Afai la o lea faatoa atoa le tausaga o matai o lona uiga, e faatoa tau mai i ina lana monotaga ma lona suafa matai. Aua o lea ua sitiseni tasi le tausaga, e le tataua la ona qualify e run.

**FOFOGA FETALAI:** Tulai mai le Minisita.

**Afioga Hon Faaolesa Katopau T. Ainuu:** E le o se mataupu lea e talanoaina i lalo o le Tulafono teuteu lau Afioga. E ese aiaiga lea e aumai i le Tulafono teuteu ese le mataupu lea ua oo i ai le sui usufono mo Salega. A o lea ua talanoa i sitiseni, e le o se requirement foi lena o le Vaega 8 o le Tulafono o Palota, e pau lava le requirement ia sitiseni. Po o le a le umi e te sitiseni ai, e pau lava le requirement ia sitiseni. Ae pei e faalogologo atu i le sui mamalu, e manao e sui le vaega lea o le Tulafono o Faiga Palota. E le o aumaia se tulaga faapea i teuteuga ia e aumai.

**Tofa Olo Fiti Afoa Vaai:** Lau Afioga e le o se mea lelei foi ia te au e le o se loia, ona fai se aoga faapea i i, i le mea lea. A silasila o le mea lea ou te tau faamatala atu i le Afioga i le Minisita, o le tagata e sitiseni, faatoa faaee i ai le suafa matai. Afai la o le tausaga na tea nei na sitiseni ai faatoa aloaia i ina lona matai, faatoa faitau mai laia. Na e i lalo lau Afioga, a e silasila i ai i le mea lea ou te talanoa atu i ai. Ona e silasila lea i le Tulafono lea o le Samoa Status Act 1962. O i ina e maioio ai le matai Samoa ma matai a tatou lea e faamatai ai nai toeaiina ia lea e o mai e asiasi mai i inei. O le mea la lena o lea e tauanau atu, ia broad le tou silasila i mea e ta'u o le sitiseni. Ae aua foi...ou te ofo au i le Minisita, o la e muamua mai lava i luma. Ia e sitiseni, ae la e fai mai e le o i ai

**FOFOGA FETALAI:** Taatia mai le mea lena se i toe silasila i ai le Minisita ma le Matagaluega.

**Tofa Olo Fiti Afoa Vaai:** Alofagia lau Afioga e le Atua ma le tauaveina o le galuega, malo foi le soifua i lau Afioga i le Palemia ma lau Afioga i le sui Palemia ma le mamalu o le Kapeneta ma le Vaega Faaupufai. Soifua ma ia manuia.

**FOFOGA FETALAI:** Malo saunoa, ese le malie o saunoaga i mea anoa foi nei, e faapena foi ona puupuu foi le taimi e saunoa i ai. E ui foi ina le sao isi mea, a o lea ua taai uma i le tulaga.... malo le saunoa Olo i lau Afioga i le sui mamalu. Tuu atu le avanoa i le sui usufono mo Nuu Tu Taulaga Sisifo.

**Afioga FAUMUINA ASI PAULI WAYNE FONG (Nuu Tu Taulaga Sisifo):** E momoli atu le faafetai tele i lenei aso. E faapena foi i lena itu, afio le Afioga i le Palemia, le mamalu foi i Afioga i Minisita, aemaise foi Minisita Lagolago. A o lenei itula, e fia avatu foi se manatu i le tulaga foi o le tatou Tulafono ua taatia nei i paga. O le mea muamua lau Afioga i le Fofoga Fetalai, e momoli atu le faafetai tele i le Afioga i le Komesina aemaise le Minisita mo lenei Tulafono taua. O le taua o lenei Tulafono, ona o lo o faufau pea aua foi mo le agai i luma. E i ai foi ona tulaga e vaivai ai le Tulafono i le toe aumaiga. E aoga foi le faamasinoga na tulai mai, lea ua toe oo mai ai le Tulafono i totonu o le Maota, ina ia mafai ona toe puipui ma toe faaatoa lelei le tulaga e tataua ona i ai.

**FOFOGA FETALAI:** Malie le sui usufono o lo o saunoa se i tulai mai le Minisita o Faiga Palota.

**Afioga Hon FAAOLESA KATOPAU T. AINUU:** E na o sina mataupu e fia faasao i le saunoa a le sui usufono. E le o teuteuga ia na tapena ona o le faamasinoga. Ua leva ona tapena, e silafia foi e lau Afioga, o Aperila sa pasia ai le Tulafono teuteu o le Faiga Palota, lea e sui ai masina o le nomination. O i ina sa fofou mai ai ia le Tulafono lenei. A faafofoga foi le sui mamalu i lau faamatalaga analeila. E leai se ta'ua o le faamasinoga. E leai se fesootaiga o le teuteuga lenei ma le faamasinoga. O le mea e fia faasao.

**FOFOGA FETALAI:** O lea ua tulai mai le faasaoga e le Minisita.

**Afioga FAUMUINA ASI PAULI WAYNE FONG:** Faafetai tele lava i lau Afioga. O le folasaga a le Minisita analeila, e uma lelei lava ou te le malamalama ai. Sa taumafai atu lava ia ou fia malamalama ai, ae o lou faitauga o le Tulafono, lea ua ala ai ona ou malamalama ai. A o le tulai mai ma fai mai o le folasaga mai analeila, a o le a la le mea na le aumai ai i totonu le Tulafono lenei? Aua a na le faia le faamasinoga e le oo mai i totonu iinei. O le mea la lea, ia onosai mai, o lea se i taumafai atu se faamatalaga, e uiga i le Tulafono lenei. A faapea la o lea sa i ai le teuteuga, o le a le taimi e aumai ai? A o lea o le a fai le tatou faiga palota. A o lea e taumafai atu se manatu e au i le Tulafono. O lea e manaia, o lea ua toe tapue ma lelei le faiga o le Tulafono. Ona o le a? Ona o le faamasinoga. Atonu la e le alagataua pe tutusa foi le aumaiga o le faamasinoga ma le tulaga lea. A o le mafuaaga



lena lea ua ala ai ona tatou toe fono i le aso. A o lea o lo o taumafai atu lau Afioga ina ia malamalama ai ma manino....

**FOFOGA FETALAI:** Se i toe tulai mai le Minisita.

**Afioga Hon FAAOLESA KATOPAU T. AINUU:** Ia manino, o lau folasaga i le aso analeila e leai se taua o le faamasinoga, o le mafuaaga lena o le teuteuga lenei. E leai ua leva ona fai mai teuteuga, aafia i le faamai o le Koviti ma mea faapena. Ae leai se fesootaiga o le faamasinoga....mo faamaumauga a le Maota.

**FOFOGA FETALAI:** Ua maua atu. Malie oe le sui usufono, see ese ma le itu lea e taua ai le faamasinoga. Ae saunoa i nisi o mea o lo o i ai lou finagalo.

Tulai mai le Minisita o Galuega a le Malo.

**Susuga Hon Papaliitele Niko Lee Hang (Minisita mo Galuega, Felauaiga ma Atinae Esee):** Faafetai mo le avanoa. E na ona ou fia fesoasoani atu i lou uso a faipule lea Nu'u Tu Taulaga Sisifo. O lea e le o malamalama, sa auai le sui usufono ananafi i le matou semina. Malamalama uma lava mea ia na faamalamalama e le Minisita. Ae fai mai a na le faia nei... o lea e tau fia malamalama ai, ona o le saunoaga le malamalama a le Afioga i le Minisita. O lea ua matou malamalama uma lava, ae ou te le iloa i lea lafoga, na fai foi ananafi i le semina, ia faamalamalama foi mea ia ananafi, a o lea foi ua toe lagalaga mai. Ae o lou alofa atu i si ou uso, ne i te i ua afaina maua Nofoa Tu Taulaga, a o lea e le o... e tataua ona tulai mai loa, faafetai i teuteuga, e le o aafia maua i faiga palota. E momoli atu le faafetai i le Tulafono, ae o le tulaga lea i le faauilavea i le saunoaga a lou uso. Ia, ae sa tatou fono uma ananafi. E leai ma ni au fesili aua sa ou malamalama lelei lava i le taatiaga mai. E pau lava le mea na ou popole ai, po o aafia a ta palota i le teuteuga. Ua ou malamalama e leai se aafiaga, ua ou fiafia. Ma lou faaloalo lava.

**FOFOGA FETALAI:** Malo. Ua e faafofoga mai i le saunoaga a lou uso matua.

**Afioga FAUMUINA ASI PAULI WAYNE FONG:** O lea lava lau Afioga. Ou te le iloa po o le a le mea e ala ai ona tulai mai fua. O lea ou te malamalama, o lea sa ou faafetai i le Afioga i le Minisita, o lea sa ou faafetai i lau Afioga. O lea sa ou faafetai atu, sa ou malamalama ananafi. O le uiga o lau tala, ou te le i malamalama i le taimi lea na tu ai i luga le Afioga i le Minisita ma fai mai le Tulafono. O au e faapea ai o se Tulafono fou, ona e pei e alu i luma ma alu i tua. A o le uiga o lau tala, o au ou te au i le Tulafono.

O le a ou le oo i le tulaga lea e saunoa mai ai le Afioga i le Minisita, aua o le mea lava lena tau maua. A o le Tulafono lea, na lavea mai ai lava maua mai le taimi na pasia muamua ai le Tulafono. E leai la se mea o le a tatou toe popole ai fua. O le agaga o lou tulai atu, o le avatu o le faafetai. A o lea e avatu le faafetai, ae pei e tauau ina faasagasaga mai, ae o lea ou te malamalama lelei lava i ai.

Malie Faumuina se i tulai mai Papaliitele.

**Susuga Hon Papaliitele Niko Lee Hang:** Faamalulu atu i si ou uso. Na manino lava i le saunoaga, e te le i malamalama. O lau fesoasoani la i lau Afioga, ou te le iloa po o le a le isi mea lea e te toe fia... a o lena na manino le saunoaga a le Minisita. Na toe tolaulau nei Tulafono, ae na tatou malamalama uma lava ananafi, na maua foi le avanoa e fesili ai se sui pe a i ai se..., ae na ou faalogo foi o lena e i ai nai au fesili. O lona uiga o lena ua e malamalama lelei lava. Ia faamalie atu pe a faapea e te le malamalama. E sao lava o le saunoaga lava e te le malamalama. Ma lou faaaloalo lava.

**FOFOGA FETALAI:** Maumau pe a na e maua le mea lea e i ai le finagalo o le Minisita.

**Afioga FAUMUINA ASI PAULI WAYNE FONG:** O le mea la e mananao i ai Afioga i Minisita, e aua le tautala, e aua le fai atua se manatu. E le mafai ona ou nofonofo i i, e tatau ona avatu se manatu. Pe e te malamalama pe e te le malamalama e tatau lava ona e tulai e fai se fuafuaga. Ia o le a outou mananao nei la e aua le faia se manatu, ona nofonofo le malamalama ai lava lea e leai se tulaga. E pau le mea e momoli atu ai le faafetai, ona o le Tulafono sa i ai muamua, lea na ala ai ona ou sau i totonu o le Maota lenei lau Afioga. O le Maota o le Tu Taulaga Sisifo. Lea sa pasia ai le Tulafono, ou te sau ai i le Palota, lea la ou te ....

**FOFOGA FETALAI:** Tulai mai le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O le mea e fia faasao. O le mea o lafoga foi ia e le lelei le tulaga o le fai mai, e le mananao e aumai ni o latou manatu. O lea lava e silasila mai le sui usufono, o lea e oo lava i le vaega nei o lea e finau le vaega nei. O lea e fai le finau tele lava a le Minisita ma le Afioga ia Peseta. Ia tu mai foi Leala ia aumai foi nai ana ia manatu, o le mea lea ou te tau maua atu. O le faaoloatauaina o e faafogafoga mai. E pei e foliga mai o lo o i ai se taumafaiga e taofiofi, se tala'u mai. Tala'u mai manatu aua le tuua. Ae manatua foi la, e i ai le aia i Minisita o le Kapeneta e tulai atu ai e faamalalama se mea. Aisea? E leaga o Faiga Faavae lea e alu atu i inei. O lea la e talia ni mataupu e aumai e toe silasila i

ai le Minisita, ae le mafai ona le fesiligia ina ia malamalama atili le mataupu. Faafaigofie i le Minisita ona toe tilotilo i ai ma toe tilotilo i ai ma saga tilotilo i ai.

O le tulaga foi i lau Afioga i le Fofoga Fetalai i mea nei o Tulafono, i le upu lea, o le le atoatoa. Lau Afioga, e i ai le mea lea e tupu, tatou te agai i luma tutupu mataupu e tulai mai, tatou te le iloa, e i ai le Koviti. O lea la faatoa tuu le Koviti i totonu o le Tulafono, e faapena le tulaga o le soifua lea tatou te i ai. E tatou te le nofonofo, o le Tulafono na pasia i le 1962, e le o tusia ai se Koviti aua e le i oso se Koviti. O lea la ua oso le Koviti i le taimi lenei. O mea foi ia e tataua ona fai e le Malo, e teuteu ma aumai i le Maota lenei, ina ia mafai ai ona ogatasi Tulafono ma le taimi lea tatou te i ai. O le faulaiga Koviti lea e i totonu o le Tulafono lenei. A o le upu lea faapea o le aumai le atoatoa, lau Afioga i le Fofoga Fetalai, e leai lava se isi na fanau mai i le lalolagi lenei, seivagana Iesu na te silafia mea o le a tutupu taeao ma talaatu taeao. Ia manatua ai, o a Tulafono e aumai e teuteu e i ai le mafuaaga e teuteu ai. Ona e le o gatasi le taimi na tusia ai ma le taimi lea ua tatou i ai.

Lau Afioga i le Fofoga Fetalai, o le fesoasoani atu atili lena. Ae a i ai ni manatu se tala'u mai.

**FOFOGA FETALAI:** Malo faafetai. Tulai mai le sui usufono.

**Afioga FAUMUINA ASI PAULI WAYNE FONG:** Lau Afioga i le Fofoga Fetalai, o lea e tau tala'u atu a o lea foi ua taofi mai. Ae a onosai, tau onosai mai ma lava papale mai...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Se i fesili atu lava, o ai lea na te taofia? Lau Afioga i le Fofoga Fetalai, o ai lea na te taofia oe, e ala ona tutulai atu, o lea e tulai atu i mea e faamalamalama, ma mea e faasao. O le vaega lenei, e i ai lana anava mai lava i le tausaga 1983. O le anava, a sipa loa se mea faasao loa i le taimi lea, ia aua ne i tuuloa e alu. O le ala lena o le matou tutulai atu ai, lau Afioga i le Fofoga Fetalai. A faaletonu loa se mataupu, tutulai atu loa le vaega lenei e faasao. O le ala lena e tutulai soo atu ai Minisita o le Kapeneta leaga o totonu o le Kapeneta lea e alu atu faiga faavae, e afua ai lea Tulafono ma lea Tulafono.

Lau Afioga i le Fofoga Fetalai, o le tulaga lena, ae le o taofia atua oe, tala'u mai.

**FOFOGA FETALAI:** Ou te fautua atu i le sui usufono, e aua foi le avea le fautuaga a le Nofoa ma mea e tuuaina ai foi, ae se i e alofa e fai fuafua foi au saunoaga e le faapea e tuufaua. E le tuufaua e le Malo ma le Kapeneta, e ao ona faasao le tulaga o lo o i ai. O le mea lea se i fai fuafua foi. Ae tulai mai le sui usufono, i te i ua faapea ua taofi atu foi e le Fofoga Fetalai, nisi o

mea o e finagalo i ai e aumai. Aua le avea le mataupu ma auala foi nei e saili masei ai, ona foi loa lea i le tulaga ua faasoesa le lauga.

**Afioga FAUMUINA ASI PAULI WAYNE FONG:** Faafetai lava i lau Afioga i le Fofoga Fetalai, o lea e tau mafaufau po o le a le mea lea e tupu. O lea e taumafai atu se manatu e uiga i le Tulafono a o lea e tutulai mai. Ou te le iloa la po o le a le faamatalaga o le a taumafai atu....

**FOFOGA FETALAI:** Faalogo mai la, faalogo mai la o lea o le a ou fai atu. E le tuumamaina lou faapea mai e te le malamalama i le saunoaga a le Minisita. E ese le tu toilalo lava o na upu, o le matua tu toilalo lava. O le manatu o oe e poto oe ae valea le Minisita se i tulou. Leai o le mea lena ou te fai atu ai, e fua upu. Ona fai mai lea i le isi taimi o lena e te malamalama ae fai mai i le isi taimi o lena e te le o malamalama. Ua le iloa po o fea o i ai? E tai pea lava o le upu a le isi tamaloa lea na fai i lona atalii, a fai atu e alu e taele ae fai mai e fefe. A fai atu e alu e tafao ae fai mai i te i ua lavea i se taavale, ae tulai mai e saunoa i le tulaga... faamolemole le sui mamalu.

**Afioga FAUMUINA ASI PAULI WAYNE FONG:** Faamalulu atu ua uma foi na taele lenei itu. Ae e faamalulu atu i lau Afioga i le Fofoga Fetalai. E avatu foi le faamaualaloga i le Afioga i le Minisita, pe a faapea ua avatu se faamatalaga i le tulaga lea. E leai o la e malamalama i le Tulafono, ae pei ta te le malamalama i lana tautala. A o le mea sili o lea e matua malamalama lelei lava. Ae momoli atu le faafetai tele i lenei aso. Na ou taumafai atu ona o le Tulafono lea sa i ai muamua. O le....

**FOFOGA FETALAI:** Malie le sui se i tulai mai le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, se aua e te faailoga tagata. O le mea e fia faasao, aua e te faailoga tagata. E fai lava si maualalo tele o le lafoga lena na e lafo mai. Na ona ou fesoasoani atu, o si tuualalo atu. Leaga e uiga lau upu lea e lafo ia Papalii.

**FOFOGA FETALAI:** Se i tulai mai le Minisita o Aoga.

**Afioga Hon Loau Sola Keneti Sio:** Se i vavae foi foe, ua ou vaai atu e pei ua tau le mautonu le sui usufono. O le Tulafono e lua ona version, o le faa-Samoa ma le faapapalagi. Ioe, a ua alu alu le faitau faa-Samoa ua le malamalama liliu ane i le faapapalagi... I just because I am the Minister of Education, I can help you out with the English version...understand really...se i ta le...ona tatou o lea i tua ou faamalamalama atu lea ia te oe. Ma le agaga faaaloalo.

**Afioga FAUMUINA ASI PAULI WAYNE FONG:** Faafetai lau Afioga i le Fofoga Fetalai, ua atili ai na ou le malamalama. A o lenei itula, e na ona avatu o le faafetai foi i le afioga i le Minisita. O le mea lea e taumafai atu ai, o le Tulafono sa i ai muamua. O le Tulafono lea na ou oo mai ai i totonu o le Palemene, le tulaga lea Tu Taulaga, ina ia mafai ai ona o i latou i le palota, i le mea o lo o nonofo ma alala ai. E pule lava latou po o le a le suafa matai e sau ai. A o lea la ua toe aveese la le Tu Taulaga, o lea la ua oo mai i le taimi lenei. O lea e momoli atu ai le faafetai i le Afioga i le Minisita, o lea ua taatia i paga le vaeveaga ona ua manuia le vaeveaga e fuafua i le aofaiga o i latou e nonofo i lea vaega ma lea vaega.

E pau lava le agaga lea sa taumafai atu ai lau Afioga i le Fofoga Fetalai, o le tulaga lea o le faasee atu o le tagata tutoatasi e toe alu e toe fai lana faiga palota pe a alu ese mai i se Vaega Faaupufai. Ona o tulaga lea sa i ai muamua, e mafai lava ona e alu ese ona e nofo ai lea i ina, i le tulaga o le tutoatasi. Aua e sao sa ou sau i totonu i le tulaga o le HRPP i le vaitaimi lea na ou sau ai i totonu. O lea la ua le toe i ai se itumalo na ala ai ona ou sau i totonu. O lea foi la ua i ai le tulaga lea, ona o le eseese i le tulaga o Tulafono. E i ai lava isi e i ai le latou talitonuga o le Tulafono lea e lelei, e i ai foi isi e i ai le latou talitonuga o le Tulafono lea e le o lava ona sauni, ma e le i lava ona tapena. Lea la e i ai le tulaga lea sa ou i ai i le taimi lenei, lea ua ou see mai ai la i le vaega lea lau Afioga i le Fofoga Fetalai. Ona tuu laia faapea. A faapea la e tuu i le isi tausaga pe a faapea e toe o mai, o lona uiga a faasee ese loa o le a e alu ese, a o i latou ia e taumafai e lesitala i le tutoatasi pe a oo nei ia Oketopa, o lona uiga ua le toe i ai se aiatatau ia i latou e mafai ai ona faasee atu i lea vaega ma lea vaega i le tulaga lea o le tutoatasi.

**FOFOGA FETALAI:** Se i saunoa mai lava Leala.

**Tofa Lealailepule Rimoni Aiafi:** Lau Afioga i le Fofoga Fetalai, toe tasi lava si vaega lea e tatau ona faamanino. Faamalulu foi i le Afioga. O lena e manino le Faavae, o le vaega 46 o le Faavae. O lena e matua manino i ina e le o se mea fou. O lea e taua mai lau Afioga, a i ai se sui ua faamavae, faui ese mai pe ua suia lana Vaega Faaupufai, e okometi lava le alu ese ma le Palemene. A o lea e olo le fua i le tatou Palemia ma le Kapeneta ma le tatou Palemene ma le Vaega Faaupufai. Ona o lea e feteenai ma le Tulafono o faiga palota. A o le Faavae lea e i i, e manino lava, o lona uiga o le mea lea e saunoa i ai le sui, ua leva...o lea e i totonu o le Faavae ua leva ona sau ai e le o se mea fou. Ma le faaaloalo lava.

**FOFOGA FETALAI:** Ua leva ona ou fia soso atu ae ua ou manatu i te i ua ou faia le galuega a le Minisita o le Malo o le faamalamalama. Ae leaga o lea o le a e toe tosoa le tatou fonu. Ae o lea na saunoa, na lava foi si taimi o Olo na saunoa i ai, lea na tali mai le Minisita o la e i totonu o le Faavae,

ina ia uniform faatasi le Faavae ma le TulafonoTumau. O lea la ua e toe saunoa i ai, ona ou manatu lea, e tasi lea vaega e lavea i le tatou Tulafono Tumau, o le toe aumai i luma o se saunoaga, ae ua umao na saunoa ai foi isi sui. O le mea lea ou te faamalulu atu, ou te le fia faia le galuega a la Malo o le faamalamalama ma faasao, ae leaga o le a toso ai le tatou Fono, pe a tuu e faamalie lou finagalo.

O le mea la lea, see i se isi mea faamolemole.

**Afioga FAUMUINA ASI PAULI WAYNE FONG:** Ia pau na o nai manatu lau Afioga a le Fofoga Fetalai, aua o lea sa taumafai atu lava e tau avatu se manatu, ae o lea e pei e foliga mai, o le fai atu lava o le manatu fai mai e...e tele mea o le Faavae ua tatou faaletonu ai. Ae mafai lava foi ona tatou toe talanoa i ai, o lea foi tatou te teuteu lava i ai i taimi uma. E ala ona teuteu lo tatou Faavae i le tele o taimi ona ua vaivai foi lau Afioga i le Fofoga Fetalai. A avatu la se manatu, e leai o lea e avatu e faufau ai ia nisi manatu ua i ai i ina. Aua o lenei vaitaimi, atonu o lea e aoga mo tatou aoga mo outou. Ae i ai le taimi e tulai mai ai, ua le tatau ona toe i ai foi lau Afioga i le Fofoga Fetalai.

Ae o lenei itula, e momoli atu le faafetai i lau Afioga aua foi le tau faafoeina o le tatou Fono o lenei aso. Manuia fuafuaga o totoe o le Fonotaga i lenei aso. Faafetai.

**FOFOGA FETALAI:** Malo saunoa i lau Afioga Faumuina, e tele lava i pesega ae matua lava i nuu lelei ma le finagalo o le Atua, i se mea e maua ai le malamalamaaga ma le faapupulaga o se mataupu. Faafetai mo le saunoaga. O lea e tulai mai se tasi o sui tamaitai mai Gagaifomauga Nu 3.

**Afioga FAAULUSAU ROSA DUFFY STOWERS (Gagaifomauga Nu. 3):** Faafetai i lau Afioga i le Fofoga Fetalai, ua ou manatu ou te tulai i le taimi lenei e tau vavae ai foe, ua na o tamalii lava ua tulai, ae ua alu le taeao. Ae se i tulai atu foi tina ia, se i vavae ai foe i lenei itula. Ae momoli atu le faamalo i lau Afioga mo le faafoeina o finagalo i totonu o le Maota. Faatalofa atu foi i le Palemia ma lena itu, faapea foi le itu nei, Ofisa Sili o Pulega o Matagaluega a le Malo faapea Samoa ua potopoto. Faapito augafa foi se faatalofa atu i si o ma itumalo ma le Afioga ia Laauli lea e afifio mai totonu o le Maota Fono, malo le soifua manuia ma le lagi e mama. Faapea foi ona faatalofa atu i sui filifilia o le faafaletui o le Afioga ia Laauli, o lo o tatou faatasi ai foi i totonu o le Maota.

Ae ua ou tulai atu e faaleoina ai foi se lagona e tusa ai foi o le tatou Tulafono Tau Faaofi. E matua lagolagoina lava e lou sui usufono ia le Tulafono Tau Faaofi. Aua e talitonu foi lou nei tagata e pei ona malie ai foi i saunoaga a sui mamalu. A faatulai pe faamaite mai Tulafono e i ai mafuaaga tatau. Po o ua vaivai ni Tulafono ua tuanai, ma toe siitia ma faaleleia atili ai le auuuna.

Ma o i ina foi e atagia mai ai, o lo o galulue le Matagaluega, o lo o galulue ma fai le latou galuega e tusa ai mai lea taimi i lea taimi. O Samoa foi, o lea e laalaa, ma e faapena foi ona laalaa a tatou Tulafono e tatau ai mai lea taimi i lea taimi. E tatalo atu i le Minisita ma le Komesina ma le mamalu o le Matagaluega i nai tuualalo foi e avatu. Ona ua matauina foi e lou nei sui usufono i faiga palota talu ai. E tele lava ni vaivaiga na i ai, ae o lea e taumafai lava le tatou Tulafono e tapue vaivaiga ia ina ia lelei le faatinoina ma ia atagia mai le amiotonu i le faiga filifiliga a le mamalu o le atunuu. Ma e matua tatau ai lava nei Tulafono e taufaaofiofi mai. O tulaga foi ia e pei, o lea e maua le faaleoina o aiatatau a tagata e o i le Palota, aua nei taotaomia i pulega a alii ma faipule. Ia ogatasi lelei foi ma le faataatiaga maiga o le aiatatau a le tagata i totonu o le tatou Faavae. O lea foi ou te talitonu o lea e taumafai ia align uma Tulafono agai, ia aua ai ne i faaletonu se sui e alu i le faiga palota, ona o le pulega lea a alii ma faipule. O lea e talitonu, o lea e taumafai e amanaia ma faaaloaia ia pulega a alii ma faipule, ae tatau foi ona agaia lelei ma le tatou Faavae ma le fausiaina mai o le tatou Faavae, i le aiatatau lea e te tamoe ai i palota ma le faiga o lau filifiliga, aua ne i taotaomai. Ia saoloto le filifiliga a le tagata Samoa. Ona ou tatalo atu ai lea i le Minisita, ina ia pei o mea ia o lea ua faatalatalanoaina nei, ou te iloa lava na faaleoina foi i Fonotaga ua mavae ia le vaega lea ua leai ai ni special pools foi lea mo matou i Savaii, ae o lea o le a malaga uma tagata i Savaii. E tatalo atu i lau Afioga i le Minisita o Galuega, i le tulaga foi i le silasila mamao, po o le a se faiga e mafai ai ona fesoasoani i le au palota o Savaii i le malaga atu lea mo Savaii. E talitonu foi lava, e le mafai ona taofi le agaga o le alofa ia i latou o lo o fia malaga i Savaii ae faigata le feoaiga, aemaise o taavale e malaga ai ma tulaga faapena. Aemaise foi o matou itumalo ia e fai si mamao tele i tua i Savaii. Po o le a se isi ituaiga auala e mafai ai ona maua se fesoasoani a i latou ia e o e fai a latou faiga filifiliga i Savaii. E faafaigofie ai ia i latou ia femalagaaiga lea i nuu ma afioaga ia e palota mai ai.

O le isi foi mea na ou matauina foi i faiga palota nei, e oo foi i faiga palota laititi lea na i ai nei. Po o le a se ituaiga auala foi lele, aua o lea ta te iloa o lea e taumafai lava Tulafono ia faaleleia, ia saoloto lau faiga filifiliga. O le a le mea e le matua faamamao ai lava fale ia e nonofo mai ai ia alii ma faipule o se afioaga mai le mea lea e fai ai le palota, leaga e influence ai. O lea e faaleoina lava, e mama lava le faamatalaga lea e fai atu, ona o tulaga na o lea e i ai. E le tatau foi ona i ai ni...ia matuai tele ni leoleo e tutu solo ia faamautinoa ai, aua ne i i ai se isi e alu atu e influence le tagata lea e alu i le laina, e alu i o i le faiga o le palota. Ou te iloaina e tele lava nettigritty o le faatinoina o le aso lea ma le faiga palota ae tatau lava ona faaleoina atu i totonu o le Maota lenei, ina ia mafai ai ona silasila mamao i ai e faatauaina.

Ia ma se tuualalo mulimuli, o tatou Tulafono ma le tele o tatou Tulafono lea e i ai, ua matauina foi a, e pasi le Tulafono, o le toatele lava o le mamalu o le atunuu e le malamalama, e le iloa. Ae o lau tatalo atu i le Komesina o

Faiga Palota ma le mamalu o le Ofisa, ia fai ni tou faalauiloa, faamatala ma faamalamalama lelei, e le gata mo i matou lea e i totonu o le Maota, ae faapea foi mo sui usufono ia o lo o fou mai e tamomoe i le tatou faiga palota i le tausaga fou ina ia matua nofo malamalama ai foi le latou iloa ma le silafia i tuutuuga ma vaega uma o Tulafono e tatau ona i ai, ina ia faafaigofie ai le latou o i le palota. Ia lava le faalauiloa, lava le faamatalaga ma le faamalamalamaina o le Tulafono. Ma e faapena foi lava i le au voters, ia malamalama lelei le voter i le taua o lana filifiliga saoloto, aua ne i taotaomia ona lagona. Ae ua ala ona ou faaleoina, aua ou te talitonu, a faapea e matuai faamamafa lava e le Ofisa o Faiga Palota ia vaega ia aua ne i taotaomia le mamalu o le atunuu i ni tapu foi lea po o ni sa a alii ma faipule i totonu o nuu ma afioaga, pe tasi le tatou sui palota uma i ai. O ituaiga mea faapena lea e tau faaleoina atu ai se vaivaiga, ina ia mafai ona matuai hammer lava le vaega lena mo le silafia uma e i latou o lo o tausia le filemu i totonu o nuu ma afioaga, faapea foi ma i latou o lo o palota ina ia saoloto ai lana filifiliga, e le o taotaomia ona lagona.

Ia o se fesoasoani atu lena ma se tuualalo i le Tulafono Tau Faaofi i lenei itula, ae faafetai tele i lau Afioga i le Fofoga Fetalai mo lou avanoa.

**FOFOGA FETALAI:** Malo faafetai, faafetai lava.

Faafetai. Ia, sosoo mai ma le Alataua i Sisifo.

**Afioga ALIIMALEMANU ALOFA TUUAU (Alataua Sisifo):** Faafetai mo le avanoa. E faatalofa atu i lau Afioga i le Fofoga Fetalai ma le paia o le Palemene faapea sui usufono ua tatou faatasi i lenei itula. E puupuu lava se manatu o Alataua Sisifo. E lagolagoina le Tulafono Tau Faaofi i ona tulaga tetele e 4 e pei ona sa tau faamatala ma faamanino.

Ae na pau le tulaga i se manatu ua fia faaalua mo le tatou Tulafono, o le tulaga lea i tatou monotaga lea e faapea o tausaga sosoo e 3, ia ma o se isi foi o nofomau i totonu o Samoa. Lau Afioga i le Minisita, o se manatu e fia faaalua, pe mata e le talafeagai loa i totonu o nuu lava ma alaafaga ona aumai a latou by-laws ia agai i mea nei o monotaga e aumai e register i totonu o le Matagaluega o Tina ma Tamaitai i le itu o pulenuu, aua e eseese uma lava nuu ma a latou faauigaina o le monotaga. O isi e uma loa le matai fai loa le \$2,000 o lau monotaga lena mo le fia tausaga faatoa toe fai mai se isi tala po ua 10 tausaga e toe fai atu se isi monotaga. O isi nuu ua alu i le value, lea lava e te tigaina e fai lau monotaga ma lau auaunaga e 3 tausaga, ae alu atu lava le isi ave le \$1,000 fai mai ia ua kava le 3 tausaga. Ae manuia ae aumai by-laws, tulafono a nuu taitasi i le latou tagatagai i ai i totonu o latou pulega a alii ma faipule i le mea latou te faauigaina o le monotaga lea faaauau e resitala i o ona ogatasi atu ai lea i le isi palota lea e i luma. O le mea tonu e tau o le monotaga, fua agai i le faauigaina e alii ma faipule i totonu o nuu ma afioaga.



Ia, o se manatu vaivai lena o lenei itumalo. Faafetai mo le avanoa.

**FOFOGA FETALAI:** Malo faafetai. Ia, masalo e le o toe toatele nisi e saunoa i le tatou mataupu, toe o le sui usufono lea o Faasaleleaga Nu.2.

**Tofa NAMULAUULU SAMI LEOTA (Faasaleleaga Nu.2) :** Ia, e momoli atu le faamalo ma le faafetai i lau Afioga i le Fofoga Fetalai mo le avanoa o lenei itumalo. Ou te manatu foi ua vela le fala i le paia ma le mamalu o le Fonousu a Samoa. Ia e le toe faaumiumi foi se faamatalaga. O le tele foi o manatu o lenei itumalo, o lena ua uma ona tuuina atu i le aso ananafi.

Ae e taua tele lenei Tulafono ua tatou talanoa i ai i le aso, leaga o le Tulafono e faapena ona agai atu i le auivi o le filifiliaina o taitai o le Maota o Samoa. E tasi lava le mataupu lea e fia talanoa atu ai lau Afioga i le Minisita, ona e le na ma le laina o lenei itumalo o le itumalo lea sa muamua ona faatino ai le Tulafono leni i le matou faiga filifiliga i le faiga palota laitiiti. Masalo o le tele o isi manatu lena sa tuuina atu ananafi ma ou te manatu foi ua faamauina ma e le toe afea i se faamatalaga. Ae tasi lava si mataupu lea na ona ou toe tuuina atu mo le silafia e lau Afioga ma le mamalu o le Ofisa, o le vaega lea e agai atu i le faamaoniga a pulenuu. Mo le silafia i le mataupu lea e taua tele ona e i ai nisi o tagata palota sa faamaonia e se tasi o pulenuu o le matou itumalo. Ina ua maea le faiga palota a le matou itumalo, e toalua ni pulenuu sa faapea ona molia e le Ofisa o Faiga Palota ona o le faatinoina o latou tiute. O le mea ua tupu, ua faamaonia mai e le isi pulenuu, ae tatau ona vaai totoa le tatou Ofisa, ona o le sui tamaitai, e komiti i le isi sui tauva, ona take lea e le tatou Ofisa le faamatalaga a le sui tamaitai i le faamaoniaina o nisi o tagata palota ia.

Mo le silafia e lau Afioga i le Fofoga Fetalai ma le mamalu o le Fono, e toa 5 tagata o lau lola sa faapea ona aveese mai le vaega lea. Ina ua faatino la galuega a le Ofisa Palota ina ua tuuina atu i le Faamasinoga ma tulaga faapena, ma faamaonia ai e leai o tagata nei e moni lava, ona o le tele o fanau ia ma tagata nei, e moni e agai mai i Apia mo galuega ma aoga, ae nofomau lava i Savaii. O le uiga la o lau faamatalaga, ua take e le tatou Ofisa le faamatalaga mai le isi sui ae sa tatau ona vaai totoa i ai ma nofo loa aveese tagata ia mai luga o le lola. A na decide nei la le matou palota i le tasi pe lua, e faapena ona tele le afaina o sui tauva. Na o le fautuaina foi lea se i tagai i ai lau Afioga ma le Matagaluega se i iloilo totoa le tulaga ona faatino lea o moliaga.

Faafetai i lau afioga i le Komesina ma le mamalu o le Matagaluega, o lea la ua toe sau nei le lola fou lea ua ia au, o lea ua aumai ai lalo igoa o tagata nei sa teena e le Matagaluega mai le matou faiga palota talu ai ona o tuuaiga faapea e le o ni tagata o le matou itumalo. E taua le tulaga lea, aua e pei ona ou fai atu, afai nei ae felatai le tulaga o le tauvaga, o lona uiga e tele le afaina

o i latou. Ia o lea la ua toe tuu i totonu. E lua la pulenuu o le matou itumalo sa molia. O le isi foi la ia vaega sa tatau ona tuu atu ai ia o moliaga nei sa fai ina ua maea le faiga palota ia Mati i le 2019, e oo mai i le taimi lenei o lea lava e le i finalise ina moliaga o le isi pulenuu. O le avega lena e feaveai foi e si na toeaina ia ma le mataga i totonu o le nuu e le taugofie.

A o le isi vaega, sa ou talanoa i si pulenuu lena i le vaiaso lea na tea atu nei, o lea lava e agai faafia mai i Apia nei, e faa 3, faa 4 ona agai mai i Apia, na o le tolo, tolo, tolo, ona o le Ofisa o Faiga Palota ma a latou faamaumauga, e le o maea ona ave faamaumauga i luga o lo o moomia mai e le Ofisa o Faamasinoga. E taua vaega ia e talanoa ai o le practical experience o le matou itumalo, leaga e ono tupu i se isi o sui usufono mamalu o le Fonousu a Samoa ma i latou tauva, a o le mea lea tatou te agaga i ai, ia fair le tatou process, ma ia vaavaai totoa i le tulaga lea i le faiga o moliaga agai atu i pulenuu leaga e le faigofie le mea o le tauleagaina i totonu o le nuu, o la e ua molia ua faamaonia e sese. O lea la ua sao la le isi pulenuu e le faamaonia moliaga ona o la e sao ia, ae toe toatasi le isi pulenuu lea lava e tolo le...

Ia, o le mataupu lena, ae pei lava ona ou fai atu lau Afioga i le Fofoga Fetalai, pau lena o si mataupu na pau i lou sui usufono i le ananafi, a o le tele o isi mataupu e agai atu i ai se faamatalaga ma se fautuaga i le Minisita ma le Matagaluega, o lena ua maea ona taatia i lumamea i le aso ananafi. Manuia le Fonousu a Samoa. Faafetai.

**Tofa Hon Lauofo Fonotoe Nuafesili Pierre Lauofo (Anoamaa Sisifo):** Lau Afioga i le Fofoga Fetalai e puupuu se manatu, pe a tusa ai ma lou finagalo.

**FOFOGA FETALAI:** Faafetai. Ia tulai mai le sui usufono mo Anoamaa Sisifo.

**Tofa Hon LAUOFO FONOTOE NUAFESILI PIERRE LAUOFO:** E faatalofa atu foi i lau Afioga ma sui usufono mamalu uma o le Maota i lenei itula o le aso. E manatu foi e faapuupuu lava se tautalaga ma se fesili mo le Afioga i le Minisita e ou le Tulafono.

Ou te manatu foi ua logo faa-Tutuila le Maota i le saunoaga faamalamalama a le Afioga i le Minisita. Ae e iu ina loaloa le mafua ae o le a tuli ia na o le manu ua faasee. O le mataupu e tusa ai i teuteuga o le Tulafono lenei e agai tonu lava i le faamai o le Koviti-19. O le manaoga o le Tulafono o lo o i ai nei, e 3 tausaga e nofo ai i totonu o le atunuu, a o lumanai ai le faiga palota ona agavaa lea e tauva i le faiga palota lautele a le atunuu. O lea la ua aumai i teuteuga, e le aofia ai i latou sa poloka i fafo ona o sa ma tapu foi ia po o le lockdown, ina ua malaga atu i atunuu e mamao ae lavea ai latou i le lockdown. E omai la, foi mai i Samoa nei ua ova atu i le 60 aso pei ona i ai le Tulafono i le taimi lenei, 60 aso e tatau ona e i ai i atunuu

mamao, e le tatau ona sili atu. O lona uiga ua le agavaa i latou e tauva i le faiga palota. O lea la ua aumai le teuteuga, o le a le aafia latou ia aua o le tulafono lea ua teuteu nei, na teuteu i le tausaga na tea nei e manaomia ai lou nofo i Samoa i le 305 aso o le tausaga i tausaga taitasi, i tausaga e 3 o lumanai ai le faiga palota. Lona uiga na o le 60 aso e mafai ai ona e malaga i atunuu mamao. O lea la ua aumai i le Tulafono lenei, e matau atu e pei o se faiga faapitoa mo i latou nei sa malaga i fafo ae ua faafuaseia ona loka ai latou i tapu ia i atunuu i fafo. E le gata ia latou nei ua toe foi mai, ae faapea foi i latou o lo o faapena ona le maua se avanoa e foi mai ai a ua aulia atu le aso e faaulu ai sui tauva. O latou la na e tatau ona foi mai i Samoa nei toe 2 vaiaso e le i faia le faiga palota, po o le sao lea. O lona uiga la pei ona ou talanoa o latou ia e lavea i totonu o le lio lea, ua pei o se faiga faapitoa lea ua fai mo latou, o le a le aafia latou i le Tulafono lea o le 3 tausaga.

A o le fesili; faapefea la latou ia sa amata mai lava le 3 tausaga o usitaia le Tulafono lea sa i ai, 240 aso i totonu o Samoa, 125 aso i fafo? Ae teuteu loa le Tulafono i le tausaga na tea nei, le agavaa loa? O le mea lea pei ou te tau tilotilo atu i le vaega lea o le Tulafono lau Afioga i le Minisita, o le faiga faapitoa lea ua fai mo sui ia ua aafia i le Koviti-19, ua pei ua foliga mai e faailoga tagata. O lea la e mafua ai lau fesili ma ou tulai atu ou te talanoa atu i le vaega tonu lea po o le a se silasila a lau Afioga, aua o lau Afioga foi o le Loia, pe le o feteenai ma le Fuaiupu 15 o le Tulafono Faavae, discriminatory legislation. E mafua ona ou fesili i le mataupu tonu lea, leaga e i ai latou ia ua talanoa mai ia au, o lea e aafia tonu lava i le mea lea, ua le mafai ona tauva. Ae i ai le manatu, e talitonu foi o lena e silafia aua o lau Afioga foi o le Loia, as a matter of principle, e tatau ona treat tutusa uma tagata nei i lalo o le Tulafono.

O le mafuaaga lea o le tulai atu e avatu se manatu ma talanoa atu i le issue lea po o le a se silasila a lau Afioga i ai, po o talafeagai ma le Tulafono Faavae pe tatau ona fai i ai se faataau. Ou te le iloa i ai, ae pei na ona avatu faapena e faataatia atu i luma mo se finagalo o lau Afioga.

Lau Afioga i le Fofoga Fetalai, ia e puupuu lava sou manatu e fai ma sao o lenei usugafono. Manuia le Fono. Faafetai mo le avanoa.

**FOFOGA FETALAI:** Malo faafetai. Ia, ua ou manatu, a i ai nisi mea o totoe... Ia, tulai maia lau Afioga e te saunoa e faamalamalama i nisi o mea o totoe sa le oo i ai.

Ia, masalo toe pau lea o le saunoaga toe o le Afioga i le Sao Faapito ia Fiamē. Tulai mai le sui usufono mo Lotofaga.

**Afioga Hon FIAME NAOMI MATAAFA (Lotofaga):** Faafetai lava i lau Afioga i le Fofoga Fetalai mo le avanoa. Ae ou te le i faia se sao puupuu mo le tatou Tulafono o lo o faasoā nei i ai, e muamua ona fia fai sau upu puupuu e tusa ai ma nisi foi o sauniga nei i le taeao ma le saunoaga foi a le

Taitai o le Malo. E faamauina le faamalo i le tatou sui usufono mo Gagaifomauga Nu.3 le Afioga ia Laauli, o lea ua toe foi mai ina ua iu le faiga palota laititi a lona itumalo. A o fai atu se upu faafetai, e ao foi ona ou faafetaia le Afioga i le sui usufono ona o le ua ou maua, e ui ina ua uma foi ona talanoa ma lau Afioga i le nofoaga o lenei usugafono, ia ae ai ua faao mai se faaloalo a le sui usufono ou te see mai i le nofoaga lea ae afio ia i le nofoaga o lo o i tua. Ma e ao lava ona faamauina le agaga faafetai mo lena faaloalo.

Lona lua lau Afioga i le Fofoga Fetalai, ua saunoa foi le Palemia, ua silafia foi ua suia le tulaga o le usugafono a lenei itumalo, e tusa ai ma lou see ese mai ma le Kapeneta. Ma ou te faafetai atu i le Afioga i le Palemia i lana saunoaga faalaeiau i lenei taeao, ma le amanaia foi o se auunaga a lenei itumalo i le tele o tausaga. Ma e silafia e le Atua le agaga faafetai ona o le valaauina mo na tausaga e tele e fai ai foi se sao e ala atu e le gata o le galuega i totonu o le Vaega Faaupufai, ia aemaise foi i totonu o le Kapeneta. O lea ou te faafetai atu ai i le Afioga i le Palemia. O le a foi se le atoatoa o le auunaga, faafoi mai pea i lou tagata.

Ae lau Afioga i le tatou Tulafono Tau Faaofi e pei ona taatia i le Laulau a Fono, i le aotelega e lagolagoina le Tulafono a le Afioga i le Minisita. Ma e pei ona saunoa mai i le aoatetele, e 4 ni vaega o lo o silasila i ai le tapenaga lenei.

Muamua, o nisi o aafiaga foi lea o e fia tauva i le faiga palota o le tausaga fou ona o le suiga o tatou itumalo, tuaoi o itumalo.

Lona 2, o nisi o aiaiga ona o aafiaga o le Koviti-19.

Lona 3, o nisi o vaivaiga o le Tulafono ua matauina e le Komesina ma le aufaigaluega, aemaise foi o le faatinoga o nisi o faiga palota laiti talu ai nei.

Ma le lona 4, o le faamalosi lea o le tulaga o monotaga e fai ma manaoga aemaise mo i latou o e fia tauva i faiga palota.

Lau Afioga i le Fofoga Fetalai, e maua foi i nisi o saunoaga i lenei taeao le tulaga lea o le aafiaga o sui tauva ona o le suiga o tatou tuaoi po o le toe faatulagaina o tatou itumalo. Ma ou te faafetai au ia i le tapenaga lea ua fai, aua o le mea moni pei ona manino mai foi i le aso ananafi i le faamalamalama e le Komesina o Faiga Palota ma le Ofisa o le Loia Sili, i le agaga foi lea o le tutusa lea o le faatulagaina o avanoa o tagata i lalo o Tulafono ua fuafuaina mo vaega eseese o manaoga o le Tulafono o Faiga Palota. E pei la e maua atu o le suiga foi lea autu o le vaega lea, e pei o le taatiaga o le Tulafono ae le i aumaia le Teuteuga lenei, e pei sa agai i a tatou Itumalo nei Tu Taulaga, aemaise foi lea i le Vaimauga ma i i Faleata.

Ae o lea la ua manino mai, o lo o faatumauiina pea le tulaga lena, a ua faalautele atu i isi tatou itumalo faaalaalafaga o lo o aafia i suiga o le toe faataatiaga o tatou tuaoi o itumalo. Mai luga lava o le manatu autu po o faiga faavae lea foi sa matau atu i saunoaga aemaise le tootoo faatoa mavae atu i le tulaga lea o le faailoga tagata o a tatou Tulafono e saunia ma ia avanoa

tagata uma foi lea ia tutusa se vaai i a tatou Tulafono fai. Ma ou te manatu o le taua lena o le toe teuteuga lea ua faataatia ma ua faalatele atu e le gata i Itumalo Tu Taulaga o Vaimauga ma Faleata, a o lea ua faapena ona faatulaga atu e pei ona aumai i le tatou schedule lea ua taatia mai i itumalo ia o lo o aafia. Ma atonu e mafai ona tatou faapea, o le mea amiotonu lena.

Lau Afioga i le Fofoga Fetalai, sa fia fai atu foi se upu e uiga i le Koviti-19, ae o le a le toe fai atua se upu o lea faatoa faamaui atu le tootoo sa oo i ai i lena tulaga, ia pei ua avea le Koviti ua i ai se faamanuiaga mo le vaega o lenei faiga palota, ae o e ua leva ona sauni mai ua faapena ona le mafai ona faaauau le latou faamoemoe ona o tatou Tulafono sa i ai.

Ou te fia tautala lau Afioga i le Vaega lona 3 o le folasaga a le Afioga i le Minisita i le faapea mai, o nisi o vaivaiga o lo o i ai i totonu o le Tulafono ua vaai i ai le Ofisa ma Matagaluga o lo o tapenaina a tatou Tulafono, ma aumai ai le faataitaiga lea o le suiga o le taimi foi lea e resitalaina ai sui tauva mai le 3 masina sa i ai i le 6 masina lea ua taatia ai nei. Ou te le o malamalama lelei, ma ou te toe fia fesili atu ai i le Afioga i le Minisita i lana tali mai i le faaogaina o le suiga lena o le 3 masina i le 6 masina e fai ma faataitaiga o vaivaiga o lo o i ai i totonu o le Tulafono, e ui o lena suiga o lea na fai muamua, o le mea ua pasia e le o aafia ai i le suiga lea o lo o taatia i luga o le tatou Laulau a Fono.

Na o le pau lava le mea o lea e pei e tau le tonu lelei ma le manino i lou mafaufau lau Afioga i le Fofoga Fetalai i le suiga lea, aua o le suiga lea mo faiga palota tetele, ae o lea foi o lo o i ai se faamatalaga foi lea i Tulafono nei e pei o ia suiga e tatau foi ona vaavaai i ai mo faiga palota laiti. A tatou avea la le faataitaiga lea ua saunoa mai i ai le Afioga i le Minisita o le taimi e resitala ai, lea ua suia nei i le 3 masina i le 6 masina, ia pe lelei le avatu pea o le fesili; po o le faamoemoe a oo i palota laitiiti o le a tuu foi i ai ma le aiaiga lena? Aua i le taimi lenei e pei foi ona silafia, e le umi naua le taimi lea e faataatia ai le faiga o a tatou palota laiti, lea e tuu taimi lava i luga o le Tulafono. Ae pei la i le saunoa mai o le Afioga i le Minisita, o se tasi lenei o faataitaiga ua maua mai e le Ofisa, e pei o se vaivaiga i le faatinoina o le galuga, ia pe e ao pea ona avatu le fesili lena.

Lau Afioga i le Fofoga Fetalai, atonu lava i le monotaga ia ma le mataupu foi sa laga mai e le Minisita Lagolago a le Palemia foi lea, ae atonu o lea lava ua manino ua toe faamalamalama, leai o le fuafuaga o lea o lo o fai mo le faiga palota lea o le a sauni atu i ai, ona faamuta ai loa lea, o mea uma lava ia o lo o lavea i lalo o aafiaga o le suiga o tatou tuaoi faapalota.

Lau Afioga i le Fofoga Fetalai, ou te fia tautala puupuu i nisi o mataupu foi ia lautele e faasino i le tatou talanoaga lea e fai nei o le tatou Tulafono o Faiga Palota. O lea foi sa maua i le saunoaga a le sui usufono mo Salega i le itu foi lea o lea ua i ai tatou itumalo ia, e mafai ona palota sui i le mea o lo o nonofo ai, ae le mafai ona avea ma sui tauva. Ia atonu lava o le tali o le fesili lena e faapea, ia o le sui lava i ituaiga nofoaga ia, e tatau lava ona toe foi i o

latou itumalo ma latou nuu e tauva ai. Ae o le isi lava mea lea e mafaufau i ai, po o fea lava le mea lea ua agai atu i ai a tatou fuafuaga ma lefaataatiaga o tatou faiga palota, e i ai lava se manatu foi lea, ia, po o au lava ia i lou malamalamaga i nei mea o faiga palota, e pei o se faiga faavae, a e palota i se itumalo, o lena foi e tatau ona avea ai oe ma sui tauva. If you are a voter in a Constituency, you should be also able to be a candidate foi lea e tulai mai e tauva mo le nofoa. Ia, atonu lava i le va a lea o tatou tu ma tatou aga na faavae mai ai tatou faiga palota, ma o lea lava ua tatou seese atu i le tatou taumafai lea e faapaleni foi lea ma le faitauaofai o tagata, ia o lea lava o lo o fealuai ai lava i a tatou faatalatalanoaga o lenei mataupu, po o fea tonu lava e taatia ai le faavae o a tatou faiga palota, pe taatia i luga o le faa-matai, po o le mea o lea lava ua tatou sosolo atu lava o le a tatou agai atu i le faiga foi lea o le fuainumera ma le faitauaofai. Ou te le faapea atu la lau Afioga i le Fofoga Fetalai po o fea le sao a o fea le sese, o mea lava o lea o lo o tutupu, ae foi lea i a tatou talanoaga o lo o fai ma le faataua foi o tatou tu ma tatou aga, e tulai mai pea lava ia le fesili lea. Ia, atonu o lea foi sa saunoa le Afioga i le Palemia talu mai ona tatou tutoatasi, o lo o faapena lava ona tali atu le Malo mai lea taimi i lea taimi i tulaga o lo o tulai mai aemaise foi finagalo momoli mai o itumalo.

Ae ou te manatu lau Afioga i le Fofoga Fetalai, o lea foi ua tatou toe talanoaina le tatou Tulafono o Faiga Palota, o se tasi lava lea o fesili autu e ao lava ona tatou silasila totoa i ai. Ia, lau Afioga i le Fofoga Fetalai, e pei e mulimuli atu sa matou faamatalaga...

**Tofa Lealailepule Rimoni Aiafi:** Lau Afioga i le Fofoga Fetalai...

**FOFOGA FETALAI:** Malie le sui usufono, o se mea e fia faasao?

**Tofa Lealailepule Rimoni Aiafi:** E tatau ona fai atu ia sou manatu i le mea lea lau Afioga leaga o lea ua toe laga ia le mea lea e tasi. Leaga e pei e foliga mai, e manaia foi lea i le faalogologo, ae leaga e i ai ia le uiga foi lea e faaoloataua i tagata i tua, aemaise leaga o lea e pei e sagatonu ia... e moi o lea e faalautele, ae e leaga o lea e pei e sagatonu i lou itumalo i le taulaga. Aua foi lau Afioga, e le na o Vaitele, Faleata Sisifo e aafia i le mea lea, e aafia uma ai lava ia Samoa i le mea lenei.

O le mea lea e saunoa mai ai i matai, o le essence atoa o le auga atoa o le Tulafono lea e tatou te talanoaina e pei ona avatu lou manatu i le amataga, e ese le polokiki a Samoa, o le mea e tau o le monotaga. O matai la, o lea e ave ia le filifiliga saoloto, e alu le matai palota ma tauva ai, i le mea o la e matai ma fai ai lana monotaga. A lea e tatala le matai e alu e palota i lona itumalo ma alu ai e tauva ai i lona itumalo. Ae o lana filifiliga saoloto, e palota ai i i le nuu o lea e nofo ai pe a finagalo ai.

O le mea lena lau Afioga, e faigofie ia o le mataupu. Ma e o le talanoaga mai a le Ofisa i le taimi na o ai e faatalanoa i tua, na fai loa le fesili lea i ai, o le a so outou finagalo e tatala le palota o ai lava le matai e nofo i lo outou itumalo alu e fai ma so outou sui tauva? E leai ma se afioaga na manao i lea mea. O le mea moni lea lau Afioga leaga tei ua faapea, o le tala lea e ave i tua i lou nuu, i lou itumalo. E te le taofia lea mea, ae e tatau ona faamalamalama, mafuaaga o le Tulafono. Ma le faaaloalo lava.

**FOFOGA FETALAI:** Malo, faafetai, ia se i saunoa mai...

**Afioga Hon FIAME NAOMI MATAAFA:** Ia, faafetai lava mo le Sui Minisita o le Matagaluega mo le faamalamalama mai o le Tulafono. O lea lava e avatu ia o matou manatu lautele i le tatou mataupu leni. E le o se mea fou foi. Ae e tupu mai pea ma tupu mai pea i le tatou talanoaga.

E mulimuli sa matou faamatalaga i lau Afioga i le Fofoga Fetalai, foi lea o lea ua pei ua atagia i nisi o saunoaga, o le itu lava faapea ona o i tatou o sui usufono, i le tatou lio nei fai Tulafono, e tatou faia ia ni Tulafono foi lea e puipuia ai ia e o lo o i totonu o le Palemene, ia pe o nisi foi o lo o lagolagoina ia vaega eseese o faiga pati po o tulaga faapena.

I lau Afioga i le Fofoga Fetalai, o le mea lea ou te talitonu ai, e ese le taua ai o le tutoatasi o le Ofisa o le Komisi e faia ia tatou Faiga Palota. Aua o le tagata lena e ese mai, mai i le lio leni o tatou, o tagata faitulafono, o tagata polokiki, ma e tatau lava ona tatou puipuia ia mautinoa ia le tutoatasi o le tatou Ofisa lea, ina ia mautinoa ai e laugatasia o le faatinoga o Faiga Palota i luga o Tulafono e leai ni uiga po o ni faiga faailoga tagata o lo o i ai.

Ia lau Afioga i le Fofoga Fetalai faafetai tele mo le avanoa, maea atu ai ia so matou sao puupuu i le tatou Tulafono i le aso, faafetai.

**FOFOGA FETALAI:** Malo faafetai. Ia se i tulai mai le Minisita, e saunoa i nisi o mea sa... e le i oo i ai lau faamalamalama. O lena ua tele ina maea ona faamanino.

**Afioga Hon FAAOLESA KATOPAU T. AINUU:** O lau tau matau atu lau Afioga i le Fofoga Fetalai, ua tele ina maea ona ou tali atu seivagana ai le sui usufono mai Anoamaa i Sisifo, o le sui sinia foi o le Asosi o Loia, e se i silasila ifo i le Vaega 15 o le Tulafono Faavae, 15(3)(a), o na e faapea mai e le apalaiina i lea Vaega o le Tulafono Faavae i le faatulagaga o agavaa o sui tauva. Ua uma foi ona i ai ia Faamasinoga i lea mataupu po o le ruling na a le Faamasinoga. Ae se i silasila ane i lena mataupu. Ae o le tele o sui usufono mamalu, ua maea ona... o lea foi e i i ia le Komesina o Faiga Palota, o lo o lagona lelei atu ia le latou tuualalo ma latou fautuaga lau Afioga i le Fofoga Fetalai.

**FOFOGA FETALAI:** Malo faafetai, e tutusa lelei lava lau faafofoga ma lau foi faalogo. Ua matua maea lelei ona tali le tele lava o mea. Ae se i tapa pea le finagalo o le Palemia, pe i ai lava na i nisi mea o la e misu, e tatau pea ne i tei ua sese lau faafofoga. E faapena, e tapa ma le faaaloalo lau Afioga i le Palemia.

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:**

Lau Afioga i le Fofoga Fetalai, leai o le tasi lenei o Fonotaga taua tele e ma ou te tapa foi ua saausi lava le faaaliga o finagalo. E tele lava ia le Teuteuga lenei ua aumai i le tatou Tulafono. O le itu taua lau Afioga, o lea foi e faafogafoga mai ia le atunuu i le tulaga e le... e oo loa i mataupu faapenei e le milia faauu ia le faaaliga o taofi. O lea foi sa matau i le taeao lenei ia le lagalaga. E le gata o sui usufono o le Vaega lenei, ia ae faapena foi i sui usufono e le o i totonu o le lio o le HRPP.

E taua foi finagalo sa faaaliga e Olo, e faatupu manatu. Ae ina ia manino le mea nei, o le anava lea a le Vaega lenei. E oo lava ia matou sui usufono. E le faigofie i le Minisita ia saunoaga ia sa faaagai atu, e sui lava e le Vaega lenei. E i ai lava ia le faitau eseese e le mafai ona teena lena mea. E tele foi ia fautuaga ia ua faataoto mai e le Sao Faapito. O aga ia o felafolafoaiga i totonu o le tatou Palemene, ae e le lata mai nei ia Faiga Faavae a le HRPP, e i ai loa se mea e fia faasao, faasao ai lava i le taimi lea, ina faafoliga foi lea e pei ua o matou tutulai soo atu. Ma ou te toe taua le itu lea aua e tele lava ina le malamalama ia latou foi e faafogafoga mai i fafo.

O le Kapeneta lea e alu atu ai ia Tulafono ma Faiga Faavae. O lo o i ai foi ma le aufaigaluega a le Malo, o lo o i ai ia latou tomai, e latou te pue vave ai ia le ute o saunoaga o lo o aumai, ia ma faamaumau ma teuteu atili ai ia tatou Tulafono. E tetele lava la ia Pesega ae matua lava i le oo. O le itu foi i le tatou Tulafono o Faiga Palota, talu lava ona tulai mai ia le Malo lenei, e uma loa ia se Faiga Palota, fai loa ma le Komisi Suesue. O le latou galuega, se i tapa se lipoti, ina ia iloa ai po o a ni auala na faia e ni sui faatutu, e ono manaomia ai ia le teuteu o Faiga Palota. Manatua o le agaga po o le faavae o lea manatu, ia tatou taumafai e tuuaititia ia tulaga e ono tulai mai, e ono le sao ai se faaiuga a se itumalo aemaise lava le itu lea o latou e malosi i le tamaoaiga, faafeagai ma i latou e lelava le tamaoaiga.

Ae o sui na, e ono tulai mai ai ni Taitai lelei, mo le Maota lenei ma le atunuu. E fai lava la, e uma atu lea palota fai lea palota ia Komisi Suesue. O lea la e maua ai ia fesuiaga nei ma teuteu atili ai e pei lava ona ou taua, e le o tatou o ni tagata e iloa mea tutupu i le lumanai ma mea o le a fai. O le taimi lenei, i le tulai mai o fesootaiga televavave IT, oka oka le anoano o le mau lavelave ua sau ma le ituaiga tekonolosi lea. Ma le anoano o le mau soligatulafono, e le tatau la ona nofonofoi le Malo. E taua tele la le fesootai



e le gata o tatou i Samoa nei, i loia ae faapea foi ma loia aemaise Malo i lenei itulagi o le Pasefika.

Lau Afioga i le Fofoga Fetalai, o le itu taua lena. Sa ou taua ia le tulaga lea o le tutulai atu o le Kapeneta, aisea? Ona o i lea e fau atu ai ia fuafuaga mamao o le tatou Malo. E i ai foi la taimi lau Afioga i le Fofoga Fetalai, e pei e avane ai ia lo matou naunau e galo ai ia le tulaga foi o tatou Tulafono Tumau. Ia, ae o le naunau e tupu ai le sese. E le gata la i i ao le la foi itu.

Lau Afioga i le Fofoga Fetalai, e le o se tulaga o le taumafai e fau malo i se avanoa e faasao ai. Ao le tulaga lava ia mai lava i le amataga, o le Malo e i ai le tautalaga faaiu, aisea? Leaga o le Malo lea e i ai ia Faiga Faavae. Afai lava la e faa 100 ona tulai mai le sui usufono, e faa 101 ona tulai atu ia le Minisita. A faa 1000 ona tulai mai ia se sui usufono, e fesiligia le Malo, e faa 1001 foi ona tulai atu ia se sui usufono o le Malo po o au po o ai lava, e faasao lava, ina ia uma ane ona talanoaga, o le toe saunoaga a le Maota lenei, o le saunoaga lena a le Malo.

Lau Afioga o le tulaga lena e faamalulu i le faafogafoga mai a latou mai fafo, fafo atu o le Maota lenei. E i ai taimi tatou te talitalie ai, ia ma fai ia tatou Fonotaga. O le manaia ia o le faiga lena, aua o le talie, e faigofie ai mea uma. Ia a alu atu ai foi ma ni mea patupatu, ia o mea lava o suaga. E le faapea e taofia suaga seivagana ua fai i lalo o le talie, ia e sua lava i taimi uma, se o le manaia lena o tatou felafolafoaiga.

Ma e ou te toe tulai atu ai lau Afioga i le Fofoga Fetalai, ia faamalulu atu foi pe afai ua outou matau mai ua siisii ia so matou leo, ma ou faamalamalama atu ai faapea, afai ou te tali tua atu o le Maota lenei, e i ai le mafuaaga. O le mafuaaga, o lea e mafua ona ou tali, e i ai tagata ua usu, ma e le tei tei ou tali. E ala la ona ou tali ua usu, usu i fea? E le gata o faasalalauga i inei ae o faasalalauga i fafo. O le la e pue e i latou o le aufaasalalau, saunoaga i Ausetalia, saunoaga i Amerika ma saunoaga i o i Niu Sila, o le matua maai o mea la e alu.

Ae a ou tali la, e le o se faaoloataua, leai e tataua ona faasao. Leaga o lea ou te nofonofu atu i i, ma mea o pepa o faamaoniaga o mea uma. O le ala lena e laga mai loa se mea e faatatau i le Malo, po o le 30 tausaga talu ai, lea e mau uma faamaumauga, e na ona ou tago atu lava sei mai matala atu, silasila mai i le faamaoniga lea.

Lau Afioga i le Fofoga Fetalai, o le tulaga lena. E aoga foi le fai o si umi, e mafai ai ona ou toe laga mai mea na tutupu ia aso ua tuanai, ona e tele lava mea na tutupu. O nei Fono tatou te fonu ai nei ma nai tamai fetalaiiga lea e fai, e le mafai ona... e le taitai oo i taimi sa o matou faafeagai ai ma le Tamaaiga, i le maoae o le gagana e faaoga i totonu i nei. A o le taimi lenei pei a tau saviligia atu lava le matagi fai mai, oka, oka, oka. A o taimi sa matou faafeagai ai ma matua o isi lea ua faipule, e matautia felafolafoaiga. O i ina na ou faalogo muamua ai i le upu lea, e le milia faauu a tatou upu.

Lau Afioga i le Fofoga Fetalai, ia o lou tulai atu lena e momoli atu le faamalo i le fefaaaliaiga o taofi, a o lea ua ou vaai atu ua tatou agai atu i le auililiga loa o le tatou Tulafono. Ia manuia tele le tatou Fonotaga.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Faiga Palota (Nu.2) 2020 i lona faitauga faalua.*

**TULAFONO TAU FAAOFI O TEUTEUGA O LE TULAFONO O  
FAIGA PALOTA (NU.2) 2020 – iloiloga auilili**

**FOFOGA FETALAI:** E tusa ai ma Tulafono Tumau e amata le iloiloga auilili i le Fuaiupu 2.

**FUAIUPU 2: Ua teuteuina le Fuaiupu 8.**

*Faamaonia.*

**FUAIUPU 3: Ua soloia le Fuaiupu 9.**

*Faamaonia.*

**FUAIUPU 4: Ua faaofi le Fuaiupu 46A fou.**

*Faamaonia.*

**FUAIUPU 5: Ua teuteuina le Fuaiupu 47.**

*Faamaonia.*

**FUAIUPU 6: Ua teuteuina le Fuaiupu 53.**

*Faamaonia.*

**FUAIUPU 7: Ua teuteuina le Fuaiupu 58.**

*Faamaonia.*

**FUAIUPU 8: Ua teuteuina le Fuaiupu 141.**

*Faamaonia.*

**FUAIUPU 9: Ua teuteuina le Fuaiupu 152.**

*Faamaonia.*

**FUAIUPU 10: Ua teuteuina le Fuaiupu 156.**

*Faamaonia.*

**FUAIUPU 11: Ua faaofi le Faamatalaga.**

*Faamaonia.*

**FUAIUPU 12: Teuteuga faatupulaia.**

*Faamaonia.*

**FUAIUPU 13: Aiaiga tau soloaiga.**

*Faamaonia.*

**FUAIUPU 1 MA LE IGOA**

**FUAIUPU 1:** Igoa puupuu ma le amataga.

**IGOA:** Teuteuga o le Tulafono o Faiga Palota (Nu.2) 2020.

*Faamaonia.*

*Na faagasolo le Tulafono Tau Faaofi o Teuteuga o le Tulafono o Faiga Palota (Nu.2) 2020 e aunoa ma se Teuteuga.*

**TULAFONO TAU FAAOFI O TEUTEUGA O LE TULAFONO O FAIGA PALOTA (NU.2) 2020 – faitauga faatolu**

**FOFOGA FETALAI:** Ma lou agaga faaaloalo ou te tapa lau Afioga i le Minisita o Faiga Palota e ana le Tulafono.

**Afioga Hon FAAOLESA KATOPAU T. AINUU:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota (Nu.2) 2020 i lona faitauga faatolu.*

*Faaluaina e le Minisita mo Aoga, Taaloga ma Aganuu, Minisita o Tupe ma le Minisita mo Fesootaiga, Faamatalaga ma Fesootaiga Vavave Faaneionapo.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**FOFOGA FETALAI:** Ia, ua tatou toai i le taunuuga o le tatou galuega ua faapena ona fuafuaina mo le aso i le tatou aso Fono. E ui lava ina manatu foi ua vela le fala, a o le mea sili ua maea le tatou galuega mo le faamoemoe aua le alofaiva o le atunuu. Ona faapea lea, ou te tapa ma le faaaloalo le Taitai o le Maota mo lana saunoaga ma se lafo e tolopo ai le tatou Fonotaga.

**LAFO MO LE TOLOPOINA**

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, ou te manatu o lena ua taoto atu se upu o le faafetai i lau Afioga ma le mamalu foi o sui usufono i

taualumaga ua faaiuina nei. Ma ou te taofi o le a ou agai sao loa i le lafo e tatau ona ou faatuina aua le tolopoina o le Fono.

Ma ou te faasilasila atu ai, *Ia suia Aso Fono o le Kalena e pei ona faamaonia e le Fono Aoa e tusa ai ma aiaiga o le Tulafono Tumau 170 ina ia tolopo Taulumaga a le Fono Aoa Faitulafono, seia aulia le Aso Lua, 17 o Novema 2020.*

A o le i tuuina mai le fesili lau Afioga, ou te toe fia faatepa le Maota i lau folasaga i le taeao nei e faatatau i le tatou tauaofiaga faanatinati lenei e le i aofia i le tatou Kalena o Aso Fono, ae o lo o i ai lava le avanoa e feutagai ai le Taitai o le Maota o au lea, ma le Fofoga Fetalai i se fonotaga faanatinati a le Fono Aoa pe afai e i ai se mataupu taua mo le manuia lautele o le tatou atunuu.

Ou te manatu e ui o lea ua faataoto atu le lafo, ae afai e i ai se isi mataupu taua e moomia ai se fono faanatinati a le Fono Aoa ona o le tausaga mulimuli lenei o le tatou Paeaiga lenei, o le a faapea lava ona logologo puialii le mamalu o le Maota.

A o le lafo lena mo le faamaoniga a le Maota i le ava ma le faaaloalo e tatau ai.

*Faaluaina e le Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Pisinisi, Alamanuia ma Leipa.*

*Na faamaonia le lafo.*

**FOFOGA FETALAI:** Malo faafetai, ua maea galuega o lenei aso ona o le fesoasoani a le Atua, maua lo outou malos e faapena ona faaauau ai le tatou galuega i sui usufono mamalu o le Palemene aemaise lau Afioga i le Taitai o le Maota ma le Kapeneta, malo galulue, e le laeia i se upu, a o le agaga e tumu i le faafetai ma le faamalo.

E faapea foi ona oo atu le faafetai i Ofisa Sili o Pulega o Matagaluega ma Faalapotopotoga a le Malo i la outou galuega e faifaipea e faatino la outou tautua i le atiaaina o le atunuu e ala i le mafuta mai i le tatou fonotaga ina ia faapena ona tapa so outou finagalo e ala i se fautuaga a o faapena ona tatou o nutimea faatasi i le tatou Fono.

E momoli foi le faafetai tele i le Fono Aoa Faitulafono i le Failautusi ma le Sui Failautusi ma tulaga i le Fono Aoa, malo le galulue, aemaise foi o le Ofisa mamalu o alii leoleo o lo o faapena ona latou puipuia le saogalemu o le fonotaga.

Le tapuaiga Samoa, ia malo tapuai, ua faaiuina ma le manuia le fonotaga a lau Palemene ona o lau tapuaiga e pei ona malele le Taitai o le Maota, e le sili lava le tai nai lo le tapuai. Malo le galulue, malo le tui mai o le mulipapaga ua iu manuia ai galuega o lenei aso.

Ae tatou te le i tolopo, o le a ou faaiuina le tatou fonotaga i se tatalo.

*Na tolopo Taulumaga a le Fono Aoaio Faitulafono i le itula e 2:35 i le afiafi seia aulia le Aso Lua, 17 o Novema i le itula e 9:00 i le taeao.*